


DIMBRI MATGRIK

Prabodh M. Sangma




Published by
Miss Bernita R. Marak
Soksanang
P.O. Araimile
West Garo Hills, (Meghalaya)
Mob : 9436165289/
 : 9436303126
 : 9612360825

First Edition 2009


Copy right reserved

Printed at ***Pathi Offset Printers,***
Sukbir Bhawan, Trua

Dam 120/-



Dedicated to
my most respected parents
**Jagat J. Marak &
Meena M. Sangma**



Mikkangchi Chapa Ka·atnagipa Ki·taprang

1. Ku·rambal (Novel)
2. Gronggrika (Novel)
3. Gapchilekni Bikrok (Novel)
4. Manggisiko Bano dongnugnok (Novel)
5. Kagal Maina Ong·sia (Drama)
6. Ang' Gisiko Nangdika (Short stories)
7. Ku·ramdik (Articles)
8. Ka·tong Balgito (Poetry)
9. Glimpses of the Garo Heritage and Philosophy

Chapa ka·atgimin ki·taprang

1. Parakgija Ka·saa (Novel)
2. Dikreni Gitcham Pato (Novel)
3. Jarambongni Walo (Novel)
4. Ka·sara Salme (Novel)
5. Ku·cholsan (Novel)
6. Nanggorere Goserong (Novel)
7. Sing·teka (Novel)
8. Kurambal (Novel)
9. Grenggrika (Novel)
10. Do·de Mesaram (Short Stories)
11. Ka·tongni Chokchimsa Pul (Poetry)
12. Dimbri (Drama)
13. Jugi Silchi (Drama)

AGANSOANI

A·chikkuo Sea-Jotani a·bao kolgapatna nangbeenggipa bak mingsara Dakmesokani. NEHU Tura Campusko kuliantal, songsarni golpoko segiparang bewalan nakatdapjok. Indiba Dakmesokaniko segiparang nangnikani kri baridapjaenga. Dakmesokaniko poraie gisik an·senganiko u·idapaniko man·a. Indiba sa·attalo Dakmesokanirang an·chingo dongsrangja gitan ong·aienga. Dongna gitaba maiko dakmesokgen? Segimin Dakmesokanirang bang·gijanian iani mingsa ja·pang neng·nikani ong·a.

Indake ong·engo, Pa Prabodh M. Sangmani segimin **"Dimbri Matgrik"** Dakmesokaniara balwa gital balnapbaa gita ong·a. **"Dimbri Matgrik"** aganronggimal mite paksa, mande pil·sa ingipa gitan, Ma·ambi pil·sa ong·na krakra banaidapani paksa daka. Bak ra·giparang ba Dakmesokanio Kal·giparang mitama Ma·ambio dongmanchagiprangan; mitamrangara banaidapgiparang.

A·chik Me·chik Dimbrina mai ong·chongmotachim, uko tal·srange serikani dongja aro obosta chong·motko u·ina ja·kol rike ja·kol sane niachi tikkelaniba komia. Iandaka jajaarangni gisepo, Pa Prabodh M. Sangma an·tangni ong·na kranikgipako Ma·ambiming meliate ia Dakmesokaniko sea. Senokgipa an·tangan uni Aganchenganio Dimbrina ong·a a·selko chanchiatang

gita dingtange ra'a aro Dimbriko A'chik Matgrik gita mesokna jotton ka'a ine janapa.

Me'chikrangna Bil-Jak on'na a'gilsak gimikon tikkelmiting chachaon, me'chikrangko skotong done, me'chikni gun-mikkimko golponi ja'pang bisring ra'e Dakmesokaniko seaniara, A'chik me'chikrangna rasong chaani ong'a. A'chikrangni Tibetoni katbamitingo, A'chik me'chikrang ramaoba nokdangni kam- bewalko ja'rikkue, setangtangni bobil dingao dingpae, A'chikni ma'kringko mangkimaatjana jak on'paa baksana, A'chik me'chikni gun-mikkimko de'doaha. Ma'ambiko gualangenggipa, una gisik on'ani komienggiparangna ia Dakmesokani ding'chaoatani ong'chongmota. A'chikrangni skango janggi tangani, kam-bewal aro bebera'anirangko chasong gitalni Senokgiparangko seachi ripinge donna ia ki-tap didiatgen ine ka'donga.

Ia Dakmesokanio on'gipa ja'pang golpoko darang Ma'ambiko See Rakkianioba poraiman'jawa. Bisring dingsa man'akosa, Pa Sangma dokbadale on'jotdape sea. Gisiko wa'sae nikjagringgiminko ua katta me'suao donskaa. Agangrikatanirangoni mitamrang bakrooba, kattarang wa'saani gimin poraimitingo poraigipani gisikko cha'brangatjawa. Jakkalronggija kattarangkoba ia seanio jakkale uarangko tangchapilata.

Pa Sangma songsarni golporangko bang'en seaha. Indiba Dakmesokaniko seanide ian jak on'chenggipa ine ua agana. "**Dimbri Matgrik**" baksana ua minggipin Dakmesokanikoba "**Jugi Silchi**" ine katta bichong on'e sea. Dakmesokaniko seani bewal da'ode una mikgimalangaignok; uni gimin bang'bata Dakmesokanirangko uni jakoniko ka'dongchaksoaniara ong'gramaijawa ine anga bebera'a.

Schoolo, Collegeo aro Universityo skie ra'na man'nagipa aro skina kragipa seanirangko bang'en nangengkua. Ia Dakmesokani iani bidingo on'gilpana aro gipinrangko didiatna man'gen.

Uni segimin **"Dimbri Matgrik"** Dakmésokaniko poraie nicheng giparangoni saksa ong'na aro ia Ki-tapna Agansoaniko sena angna chol on'anina anga Pa Prabodh M. Sangmako mittelbea.



12.7.2008

(Brucellish K. Sangma)

Retd. Director, DERT, Tura.

MITTELANI

Ku·bidikrango rokomari kattarang bang·oba, badiaba gisikni kusiniko aro suakaniko paraknade basakoba kattakon sandie man·chongmotja. Mai kattachi parako ua uni gisiko suakaniko parakna man·gen, ua kattakon ua Ku·bidikoniko am·e man·rongja. Chong·mot, indakgipa mandeni ka·tongo paksatpile kusini aro gisik suakani dongoba basakoba ua kattako parakna mande kragipa kattakon sandie man·ja. Mai kattako agane uni gisiko kusi ong·achi suakaniko parakna man·gen, uko ma·sipilja.

Angni obostaba apsan ugitan ong·aha. Mai kattako minge mittelo angni gisiko kusi ong·aniko anga chu·gimik parakna man·gen, uakon angaba sandie man·chongmotjaha. Chong·motan, 13.7.2008 tariko, anga abi Renangma baksa uamangni seating roomo asonge cha ringmitingo ua angna Dramani bidingo indake ku·pattiaha uko anga baditaba bilsirangoni skibaa gita daknikman·pilaha. Mongsongde, Dramakoba see ninasan skaia, Dramani gimin angni name dake u·iani dongjachim. Indiba abi B. K. Sangma, Dramani 'plot construction' ni gimin uni salo angna indake skiataha, uko anga angni poraimiting somoio man·bajachim gita daknikman·a. Dramani gimin anga bang·akon abi Renangmachiko ma·sie ra·na man·aha. Anga unin chatrochim ine an·tangko chanchiman·pilaha. Uko mittelani maming kattako sandie man·jaoba mittelachian mittelna nangao ga·akaiaha. Miitelbea abi, namen mittelbea.

-Author-

DIMBRI MATGRIK

DIMBRI

Kal·giparangko u·iatchengani

ME·ASARANG

1. Dejangpa	A·chik Matgrik, Nokma
2. Rikampa	Nokmani jonggipa
3. Jachingpa	Nokmani bebegipa Montri
4. Dhobani	Dhubrini Raja
5. Dhaniram	Rajana ku·pattigipa
6. Debarindra	Nokma Chigatpa
7. Songbad ra·ruragipa
8. Nokkol	Ranggat
9. Bijit Narayan	Bijnini Raja
10. Ragu Dev	Koch Bihar Rajani watatgipa
11. Babendra	Montri
12. Jaleswar	Do·ga nitimgipa
13. Lakhiraj	Bijnini Sipai dal·gipa

ME·CHIKRANG

1. Dimbri	Dejangpani demechik
2. Me·gam Nongal	Dimbrini Ma·gipa
3. Toromigipa Me·chik	Mrik
4. Taposi	Rajani jikburing
5. Nandina	Raniko nirokigipa
6. Sagipa ja·rikgipa
7. Gnigipa

MINGSA MINGGNI KATTA

Chong·motde, A·chik ku·sikchi A·chik Jatni Ma·ambiko sea·jotachi maming ripingani dongbajani gimin, A·chikrangni Ma·ambini bidingo name tale ma·sina bilongen neng·beani ong·a. Saobarang Dimbriko Songdu nalsachi nokkol dake donbaachim ine agana aro mitamrang nokkol dake ong·ja, indiba rajani jikgipa dakesa donbaachim ine agananiba donga. Mitamrang me·chik sakprakna te·rik pangprak dake sak ritchagittam me·chikrangko donbaa ine agana. Dimbriko je obostaoba donbachina, indiba A·chikrang Songduko chobatbana skang ua Songdu nalsani rajarangna maiba ka·onangani ba uamangna maiba namgijagipa gisik saani kamko ka·baachimkon ine chanchiman·a. Uni giminsa A·chikrangni Songduko chobatbae neng·take misal cha·mitingoba Dhobani raja aro Koch Biharni raja bolgni nangrime A·chikrangko bobil dingbaachim, Songdu nalsaona rikbaachim. Bobilrangko niksoe A·chik Matgrikrang rang·san mi cha·ako dongale, mil·am sepi ra·bildange – me·a·me·chik nangrime bobilko warachaksona krimkro ku·cholsan ong·soachim ine A·chikrangni Ma·ambio aganani donga. Dongdipgija salgittam walgittam

chri bra watosā, mil·am sepi ra·bildange chingsoosa, Raja Bihari aro Dhobani raja, A·chik Matgrikrangni ka·dongbeako nike, amchakjana kenchake katangpilaiaha.

Misal cha·mitingo bobilrang baksa dakgrikna nangani giminan ia dakgrikram biapkon **“MISAL CHA·RAM’** ine mingaha.

Uni ja·man, A·chikrang ua biaponi bang·gija chel·kalaona jitange **“A·song Neng·abat Chiga Neng·chibat”** minggipa biapo dongeaha. Raja Bihari aro Bijnini raja bolgni nangrime, adita sipairangko rimbibae ia biaponaba A·chikrangko bobil dingna rikbataiaha. A·chikrang jama janggi galpile bobilko warachaksoaha aro ia dakgrikanio me·asarang baksa me·chikrangba rimol sa·am pangpike, sok kanako dongale, mil·am sepi chakpile bilongen dakgrikpaaha. Ia dakgrikanio bilongen an·chi·pari ong·aha aro bang·en siaha. Ia dakgrikanio A·chikrangan bobilrangko amchepataha aro ia biapkon **“GARO MARI TOPLA KHAWA”** - ine da·oba mingkuenga.

Songdu nalsani raja A·chikrangko Songdu chibimako chobatbachina inean te·rik pang ritchagittamko kusi ong·ean on·atode ba on·atachim ong·ode, Songduko chobatbaani ja·man A·chikrangko ia nalsaonade bobil dake dingbana, rikba·chabana nangjajokchim. Indiba A·chikrangni Ma·ambi Aganania Songduko chobatbaani ja·manba ua nalsani rajarang A·chikrangko bobil dingbaachim. Kusi ong·ean Songduko chobatangchina ba chobatbachina ine A·chik Pagitchamrangna te·rik pang ritchagittamko

on·nata ong·ode, Songduko chobatbaani ja·man
maina A·chikrangko bobil dingbaachim? Maina?
Maina bobil dingbaachim saoba aganna
man·genma? A·chikrangni ka·dongana, bilak
wa·saana, bamjana aro ka·grakana mikkangchi
kenchakesa, A·chikrangni bilgriengamitingo,
A·chikrangko mangkimaatna aro uamangni
mikkangoniko chel·atna miksongesa, Songduko
chobatbaani ja·manba bobil dingbaachimma?
Ong·jaode maina?

Ia 'Maina' ine gisiko sing`a nakatani giminan
ia Dakmesokanio ba Drama Dimbriko dingtang
dake mesokna jotton ka`aha. Ua saksa Matgrik
chong`motchim. Rori Sadepa Nokma Chigatpani
A`chikrangko onchep mikchepako aro chonnikako
chaktojaenba Dimbri Matgrik uko budi dake
so`otachim. Dimbri Matgrikni Rori Sadepa Nokma
Chigatpako so`otani koborko man`ne ua nalsani
rajarang jajrengtokaha. Uni ja`man uamang
baditaba bol rajarang tom`dake A`chikrangko bobil
dingbana ku`mongaha.

Songduko chobatbaani ja·manba
A·chikrangko bobil dingbaani a·selko ning·tue
chanchiate niode, indaken ong·achimkon ine
darangan chanchiman·aigen. Rori Sadepa Nokma
Chigatpa siahani giminan, songdu nalsaona
A·chikrangko bobil dingbataigiparangni gisepode
uni bimingko knataina ba mingtaian dongjaha.
Uni orto, uko A·chik Matgrik Dimbrian
so·otchong·motachim. Uni giminsa songdu nalsani
rajarang Dimbri Matgrikni Jatko jakbikpilna aro
mangkimaatna ine songdu nalsaonaba bobil

dingbaachim, a·jak sokbaachim. Maina, a·sel gride
Songduko batsotbagimin A·chikrangko bobil
dingbaani maming a·selko nikatna man·ja. Iani
bidingo maming a·selko ma·ambi aganriting-
baanioba agana dongja. Chong·motan, Dolgoma
gita Songduko te·rik pang ritchagittamko chap kae
batsotbagipa A·chikrangnade Dimbri Matgrik
'Jokatgipa' chacha ong·aha. A·chik Jat gimiknan
Dimbri Matgrik rasong chaani ong·chongmota.
Dimbriko ia Dakmesokanio ba Dramao saksa
ka·dongbegipa, Jatna kas·aagipa aro Jatna
an·tangko on·kanggipa Matgrik ong·a ine
mesokaha. Hai, Dramako poraiangna.....

DAKMESOKA I

MESOKANI I

Bijni, Rajani nokdring

**(Raja Bijit Narayan, ja`man ja`man jako
lekka ra`e Montri napbaa)**

Raja : Ah: mai dikdar! Na`songara angko
dikdiksaba tom`tom neng`takna
on`jawama? Na`an on`tisa chanchie
niboching.

Montri : Raja, ia a`gilsakko nikama nikjaenga;
ia a`gilsak rokomari bosturangko
chile chakchike jrip dongaienga.
Na`ara maina indita dongsiksakenga,
chakchikbo.

Raja : Ha! Ha! Montri, a`gilsak baksa angko
maichi tosusana man`a? A`gilsakkode
indake chakchiknan Isol tariaha –
indiba angade saksa chonbegipa
mandesan ong`aia, cha`na-ringna,
tusina-bamsina, somoi gita neng`tak-
na – ia pilakrangko man`jaode angna
name janggi tangna neng`beani
ong`gen. Niboda, anga da`o on`tisa

aratengaha. Ia pilak lekbarangko attamchipak nina man`aigen; maming koti ong`jawakonba? Manas rikamo dongenggipa Garorang aro gipin bobilrangde da`o bobil dingna re`bajaengakonba.

(Dhaniram napbaa)

Are, Dhar`ram? Re`ba, re`ba, na`a namengakonba?

Dhaniram : Oe, namenga raja, nang`ni ia nokkol namean dongenga. Nang`gita ka`sa-ninggipa rajani ning`o donggipa saobana maiba namgijani ong`na amama?

Montri : (An`tangna agana) Pilakan chu`sok-aignok da`ode – maiko nanga? Ia jaraan pilakko nosto ka`aignok, bijak tognigipakoba mesengataignok! Ia ku`deng dongpaode maming kaman ong`jawaha. Che! Angade re`aignok. Jararangko ja`rikode angni maming lap ong`jawa, indinari neng`gram-aiasan ong`aigen. (Parake) Raja, angni noko on`tisa nangchong-motgipa ka`gni kam dongachim, na`a ge`etode anga da`o re`naha.

Raja : De indide .

(Salam ka`e Montri ong`katanga)

(Dhaniramko miksonge) Mai song-badko ra`bajok, Dhaniram?

Dhaniram : (Ka`dingsmite) Raja, ia buiringni pilak

pulnikon na`a changprakde bitchi opmanaha; opkugijani gisepo gil`mat, makkaligi aro datura pulrang, jean bisi gnanggipa, uarangan bangki dongengkua. Bao? Manas rikamo songdongenggipa ua Garorangni gisepoba nang`na krana gita me`chikkon nikatna man`jaenga.

Raja : Maiko agana? Sagalara basakoba chi gri ong`na amama?

Dhaniram : Maiko agangen raja! Indake pangnan ope dongode pulrangni bitchi maina, sagalni chiba tipe kataigen.

Raja : Indide da`o maiko dakbo, mai chol donga aganboching?

Dhaniram : Donga, uni gimin na`a mamingna chanchina nangja. Ia a`gilsako damsasan ong`ja, damsni sagalrang donga.

Raja : Dhaniram, nang`ni kattarangko knae angni gisik bilongen dongsik-sakbeengaha. Indide da`o maiko dakna nanggen aganboching? Mai chol donga?

Dhaniram : Chol donga, ua cholni gimin anga nang`na ja`mano agangen. Na`a ia noksako name dake nie niboching. Iako nang`na mesokgen inean anga ia noksako ra`baaha.

Raja : (Noksako nitate) Bah! Iara sani noksa mancha aganboching? Indake

silaniko anga maming saloba nika dongkuja.

Dhaniram : Raja, na`asan ong`ja. Indake silako haida ia a`gilsako da`ona kingking darangba nikkuja, nika dongkuja.

Raja : Ong`bebeankon! Is! Mairongpile sila! Oi Dhaniram, ia mongnalara badia chibolo bale dongenga, na`a angna aganna man`genma? Aganode anga da`oan balminduri gita uni sambaona re`angaigen.

Dhaniram : Raja, iani bidingo indita adik sikdik dakode cholijawa. Ia kamko ramram ine chanchinabe. Ia teng`sugipa jajong salgiosa dongenga. Uni wilwilao pangnan matgrikrangsa nitime dongrongenga. Su`sam aro tampi mangsaba uni sambachi re`angna man`jaenga.

Raja : Maina? A`selara maimancha?

Dhaniram : Angangen raja, angangen -----

Raja : Agangalgalboda! Maina kena?

Dhaniram : Raja, iara Manas chibimani rikamo songdongenggipa Nokmani jikgipa Me`gam Nongalni demechik ong`a – uni bimingko Dimbri minga – bilongen sila.

Raja : (Rasong chaa gnang) Chong`mot! (Noksako nie) Dhaniram, na`a aganachim ia teng`sugipa jajong salgisakosa dongenga; chong`motan

uagitan ong`bebeakon! Ah! Je ma`kringo hajak hajak singho gita ka`grak matgrikrang atchiaha, je ma`kringni rasong mikkim ia a`songo gapa, ua ma`kringo ba jato indake silgipa mongnal bibal chajaode bano chagen? Je Isol ia nitogipa Manas chibima rikamo silsila buring bolgrimrangko chaataha nitoataha, uan iakoba silata aro ia nitogipa nomilkoba tariaha, dakaha. Is , nibo, Dhaniram ---

Dhaniram : Ge`etbo, raja.

Raja : Na`a ia Manas rikamo songdongeng-gipa Nokmani bimingko mai minga u`iakonba?

Dhaniram : U`ija. (U`ioba u`ija ine agana)

Raja : Ua Nokmako manderang Dejangpa ine okamronga; uni biming gitan uni kamba ong`a. Ia noksako nike Dejangpani demechik ong`nan krae nika.

Dhaniram : Uara maidake, raja?

Raja : Na`ara jarama! Dipari Me`chik Namari Tirani oko Sikme aro Donse atchiana atchija?

Dhaniram : (An`tangna agana) Na`tok da`osa milsiko minokbaengaha. Da`o iako maiba dake a`gaona de`gatna man`jokon ong`aignok.

Raja : Nibo, Dhaniram!

Dhaniram : Ge`etbo, raja!

Raja : Na`a ia noksako angna on`bo ---

Dhaniram : Raja, anga nang`ni nokkolsan ong`a;
ango je donga ua pilakan nang`nin
ong`a. Indiba -----indiba -----

Raja : Mai indiba, aganbo?

Dhaniram : Chong`motde, ia noksa ia nokkolni
ong`ja; ong`ode da`oan rajana
on`aignokchim. Dumuryani angni
ripeng saksa ia songjinmaona
re`baachim. Uasa ia noksako palchi-
na gita ango donangaha.

Raja : Indide namaha. Nang`ni ripengna
iani kraa damko on`atjokon ong`ai-
genkonba?

Dhaniram : (An`tangna agana) Da`ode bachi
re`anggen? Da`ode ja`gao ga`akaha.
(Parake) Ong`aigen, ong`nan nang-
gen. Ua ia noksako palnasa ianona
ra`bara; uni gimin kraa damko
man`ode maina paljawa? Indiba, ua
je damko aganenga, ua on`tisa
bang`kale agana gita daknik-
man`enga, raja.

Raja : Dhaniram, ia noksa angni ka`tongna
gamchatgipa gamjin gita ong`a.
Nama, aganboching, nang`ni ripeng
badita am`enga?

Dhaniram : (An`tangna agana) Gamchatgipa
gamjin gita ong`a? Indide maina
kena? (Parake) Raja, ua hajal

kolgrikbonga bi`enga. Iana komie ua
maming dakeba on`jawa ine
agananga. Bang`batan una hajal
kolgrikde on`na am`ahachimna,
indiba da`oba ua -----

Raja : Ong`aigen; indide ua jegita bi`a
uagitan on`na nangaigen. Anga
jakrikrana chitti seataina, na`a uni
jakoniko tangkako ra`bae nang`ni
ripengna on`atbo. Bao? Ianode
seatna gita jako maming lekkaan
dongja.

Dhaniram : Raja, ge`etode anga da`oan lekkako
ra`baaigen.

Raja : De indide ra`ebo.

Dhaniram : Indide anga ra`enaha, raja.

(Ong`katanga)

Raja : (An`tangna agana) Dejangpani
jigkipa Me`gam Nongalni indake
silbea demechik donga ine angade
jumangomangba chanchijachim. O
nitogipa mongnal, na`a badia risini
sao-sarapko man`e ia chibolo dongna
nangengaha?

(Sena jako lekka ra`e Dhaniram
napbataia)

Dhaniram : Raja, iakai ra`baaha. (Raja lekkako
ra`chake asonge sena a`bachenga ---
----- an`tangna agana) Muni
nangatani ja`manan bitede nangeng-
aha. Da`o nina, iarang bano maidake

bon`chota. Jotton ka`anio maming gualani dongjawa. Uni ja`man mamingko nangja, cha`ukokrangnade cha`na man`aan lap! Cha`na man`jokode maiko nanga? Maming korosan ka`a dongja, indiba lapsan lap!

Raja : Ia ra`angbo. (Chittiko on`ata)

Dhaniram : Raja, na`a jaksrambegipa ong`a.

Raja : Na`a angna indigita gamchatgipa gamjinko on`aha; uni gimin anga nang`na jringjrotna gro nanga.

Dhaniram : Raja, anga nang`ni nokkol mangmangsang ong`a! Indiba raja, na`a ia nokkolni kattako knachakode, unode na`a nengraen ia me`chik gamjinko man`na amaigen.

Raja : (Chakate) Bebema, Dhaniram? Angara indita rasong gnanggipa ong`ama?

Dhaniram : Raja, na`a Manas chibimani rikamo songdongenggipa Nokmani demechikna ka`saengode ua ka`saani chu`sokchongmotgen; nang`ni ska chu`sokchina anga Gitelo bi`enga. Nang`ni pagitchamrangba uamang baksa nangrimean janggi tangangaha; na`aba kraa gitan chananga sila aro rasong gnanggipa ong`a. Nang`ni rani ong`na Dimbri nomil kra-chong`motgen. Nang`ni bimingko knajokode haida Dejangpa demechik-

tangko nang`na pakwatna maming
saloba jechakjava.

Raja : Oe --- uamang baksa angni
pagitchamrang nangrime meliean
dongangachim; indiba angade saksa
dingtanggipa gisikni ong`a; ua iani
bidingo ku`rachakjaode, jechakode,
angni kratcha`ani ong`gen.

Dhaniram : Raja, na`a Saljagring ma`chongni
bon`kamgipa ong`a. Dal`gipa man-
derangde an`tangtangni giminde
gualtokaia. Uni gimin na`ade
an`tangni rasong mikkimkon ma`sija.
Giting raniara Dikkiko chonnik-
soachimma?

Raja : (Chanchia gita dake) Atcha - na`a
changsa montrioka okamatboching.

Dhaniram : De indide, raja.

(Ong`katanga)

Raja : (An`tangna agana) Nina, montriara
maiko ina. Iani bidingo ta`rak ta`rak
adik sikdik daka kraani ong`java.
Nokma Dejangpa ku`rachakode,
jechakjaode, anga bilongen kusi
ong`begen, an`tangko rasong gnang-
gipa ine chanchigen. (Asonga)

(Montri baksa Dhaniram napbataia)

Montri : Raja na`a ku`watode, ia adita
chittirangko nang` mikkango poraina
nangengachim.

- Raja : Don, don! Uarangko ja`mano nina man`gen. Da`o asongchengbo. Nang baksa angni dingtangmancha katta aganani donga.
- Montri : (Asonge) Maiko dakna nanga ge`etbo.
- Raja : Nibo, Montri, Nokma Dejangpani badita sak bi`sa-di`sarang donga, angna aganna man`genma?
- Montri : Oe, baditaba sakrang donga.
- Raja : Badita sak depante aro badita sak demechikrang?
- Montri : Aganna man`jawa, indiba uni demechikgipa Dimbrini giminsan angna knana man`aha. Uamang Gaur A`songoni katbae Dhubrio songdong-mitingosa Dimbri atchiaha. Dhubrio atchiani giminsa uni bimingko Dimbri mingaha. Dhubrini Dhobani raja uamangko uno bang`a bilsina dongna on`jani giminsa uamang da`o ia Manas rikamo re`bae dongenga.
- Dhaniram : Raja, Nokman` demechik Dimbri silbebeama?
- Montri : Mitam manderang agana Giting Rani an`tangan a`gilsako atchitaiaha ine.
- Dhaniram : Indide montri, na`a an`chingni rajana ia silbegipa Nokman` demechikko man`e on`na maina jotton ka`jaenga? An`chingni rajaba chong`mot Dikkian atchitaia gitan ong`a!

Montri : Maina jotton ka`jawa? Indiba iano on`tisa champenga donga gita daka.

Raja : Ua champenganiara mai?

Montri : Oe raja, Kamagiri a`songni Nokma Sae-Bonge aro Kateni su`gipa baksasa uni bia ka`ani katta ong`ahachim, indiba ua siahani gimin kam chu`sokna man`jaha. Anga da`o knana man`enga, ua a`songni saksa matgrik uko bia ka`na ine uni skaniko Nokmana parakaha. Ua matgrikni bimingko Baucheng minga.

Raja : Chong`motma? Tom`betbet dakari ua jajongko rim`na jotton ka`engama? Ia Bauchengara Ginje Me`chikni depatchi bi`sasa ong`a, uko a`gimikni manderangan u`itoka. Ua Nokman`demechik Dimbriko kimna am`enga? Aiao inmana! Amakba me`chikna mikbokna changama? Nibo, montri na`a da`oan Nokman` a`songona mande watatbo. Angna Nokman`demechik Dimbriko nanga. (Chakate) Baucheng iano seng`a dakode, indide uko anga kraagita sasti on`gija tom`tomna man`jawa!

Montri : O toromi raja, da`o iarangna chanchie sko sae dongani somoi ong`ja. Nibo, bobilrang a`songni wilwilao sal salna bilakbaroroengaha.

Raja : Ah: bobilrang! Na`a bobilrangni gimin chanchie adha pagla gita

ong`pilengaha. Saksa Pragjyotish-
purni raja, uade da`ode bisi grigipa
chipu gitasan ong`aiaha. Gipin-
rangnade kenja. Uamangde tangka
sonarangko man`jokode kusi ong`ai-
gen. Na`a re`angbo. Na`a da`o ta`rake
mande watatna jotton ka`bo.
Bauchengni mai ka`donga ua` ang-
ming kajia ka`nasa jikenga.

Dhaniram : (Gipinchiko nie) Raja, ia nokkolko
wataton ong`aigenchim!

Raja : (Gipinchiko nie) Iade namgenan.
Na`a saksa bilongen chalakki mande;
na`a re`angon nambatgen. (Parake)
Nibo, Montri, na`a Dhaniramkon
Manas rikamona watatbo, bian
nambebegin.

Montri : Nang`ni ge`eta gitan ong`china.
(Dhaniramchipakko nie) Mamasong,
indide na`a ang` baksa re`bapabo.
Iani bidingo mai maiko dakna nanga
uarangko tik ka`na.

Raja : Re`angbo, Dhaniram, re`angbo.

Dhaniram : Nang`ni ge`eta gitan ong`china.

(Montri aro Dhaniram ong`katanga)

Raja : (Iachi uachi re`jingjange) Ah, indaka
silbegipa gamjinko man`aniara angni
rasong kopalo dongama? Nina, Gitel
maiko daka. Dhaniram bilongen
chalakkigipa mande ong`a; ia kamko
ua chu`sokatna man`jaode sawa
man`gen.

(Dhaniram napbataia)

Dhaniram : Raja -----

Raja : Mai ong`a, na`a da`o maina re`bapilaha?

Dhaniram : Oe raja, montri baksa angni mingsa kattani bidingo jegrikna nangao ga`akaha. Uni giminan da`oba nang`ona re`bataina nangaha.

Raja : Uara mai katta?

Dhaniram : Oe, ia nokkolni chanchia gitade adita sipairangko rimangpaode namgenchim; indiba montriara ang baksa sipairangko watatpaode koros bang`gen ine aganenga.

Raja : Ha....! Ha....! Ha....! Budepa ong`jokode indakarangko chanchiani gisiko nakatbaaia! Indide montriara nang`ko saksan watatna skengama?

Dhaniram : Oe, indaken ong`enga.

Raja : Che, kratcha`ani katta! Indinarian anga da`ororo gisiko sukjaenga, ka`onangna nangode pilakan bikpil bawil ong`anggen.

Dhaniram : Ong`chongmot raja, iani gimin chanchinan nangja. Ia nokkolba indaken aganachim.

Raja : Atcha - na`a montrina indake aganebo, ua nang baksa mang ritchasa gure, mangbonga mongma aro sak hajalsa sipairangko watatpachina. Indaka kamrango tangka paisani gimin chanchiaide cholijawa.

Dhaniram : Raja, na`a teng`achi Salgra, bilakachi Goera, ka`onangachi Susime, jaksramachi Rokkime, ka`saachi Sagal, rinokachi mongnal aro u`ianichi Tatara Rabuga chong`mot. Chanchie nibo, jensalo Gitel Tatara Rabuga, a`gilsakko dakna ge`etaha, unon Nostu Nopantu, Machi, Chipong Nokma Balpong Gitel aro Chiching Barchingmaangni dakchakachisa ong`atna amachim. Saksande maming saloba dakjachim.

Raja : Nibo, Dhaniram, ----

Dhaniram : Ge`etbo raja ---maiko dakna nanga.

Raja : Jegita Tatara Rabuga Chongchong Mindako Salgisakoni A`gilsakona aro A`gilsakoni Salgisakona kobor ra`rurana jakkalachim, uandake angaba nang`ko watatenga. Nibo, Dhaniram, simsake ka`angbo angni skani indinari ong`jachina.

Dhaniram : Raja, nang`ni ska-namnikaniko chu`sokatna angni janggi sipilna nangoba anga watgaljawa; indiba rajao angni mingsa mol`molani dongachim.

Raja : Uara mai?

Dhaniram : Raja, Tatara Rabuga jensalo Chongchong Mindako watatachim, uno una ge`sa sonani gol`dikko on`atpaachim; ia nokkolniara maia donga raja?

Raja : (Ka`dinge) Iakai ra`bo. Na`a ia jakstemko ra`bo.

Dhaniram : Raja, na`a Rokkimeni depante chong`mot ong`a.

Raja : Indide da`o maina ruutkuenga? Na`a montriona re`ange da`alan re`chakat-angna tariebo. Re`angbo, ruutna-beha. Anga da`o bariona roramangkuna.

(Ong`katanga)

Dhaniram : (An`tangna agana) Da`ode na`a bachi re`angnaka re`angaibo. Angni kam chu`sokaha. (Re`jingjange) Dhaniram indinari ramramgipa mande ong`ja. Manas rikamni badinggipani jakoniko noksako maming paisa grian indinari ra`rikaiaha; aro ua noksakon rajana pale bang`e tangka man`aha! Iara ramram budini kamma! Ha....! Ha....! Ha....! Hajal kolgrikbonga tangka! Ha....! Ha....! Ha....! Iani gisepon ia jakstemkoba man`aha! (Jakstemko nie) Bah! Badita silbea ia muni! Angni ambiatchurangba indaka gamchatgipa muniko nikangja! Jeba ong`bo, mittela Dhaniram nang`ko! Nang`o aiao inmangipa budirang, dongchongmota, bang`chongmota! Chinga rajani ge`etarangko manigiparang ong`a; rajachiko indaka bosturangko tol`e togieba man`na amjaode

sachiko man`gen? Indaken ra`na nanga. Are, ia chasongode agre namdugae mesokode mamingnan cholijawa! Basakoba somoini kri namgijakoba nambea inna nangao ga`akaia; basakoba indinari saobarangko dosi ong`a gita aganna nangaia; tol`eba aganna nanga aro basakoba kajia ong`atna man`a nanga -ian songsarni niam. Iani orto, jegitaba an`tangni miksongako chu`sokatna jotton ka`angna nanga! Indake cakgija, jean an`tangni gisikni kattako aganaia, ua mandeko mande mingna kraama? Uni gisikde nagande donggipa gitan apsan! Maming pindapanian dongja. Jeba jekoba dakangna man`aia - indake kakketgipa manderang a`gilsako name janggi tangangna man`ja. Siani ja`man ---mai siani ja`man? Siani ja`man maming a`gilsakan dongja - Salgi-Norokba tol`asa. Simanahaode mande mamingko ma`sijana, okkrijana, sin`jana, grapa-chrikaba dongjana --- indide ua Salgini sukko aro Norokni dukko maiko ma`sigen? Ha....! Ha....! Ha....! Re`gnok, re`ange tangkarangko jakkipchengna nangen; uni ja`man montrichiba re`angna nangen. Ah! Montrian angni ramani bu`su gita ong`a! Namen namaha, nina, montriniara badita mancha budi donga!

(Ong`katanga)

MESOKANI II

Bijni, Taposini Nok (Taposi napbaa)

Taposi : (An`tangna agana) Aiao inmanani ong`a, rajara da`al indake maina ruutengaha, indake ruutbaani a`selara mai ong`na nanga? (Rang`spee) Nama - anga ia denggugipa Dhiman Barmanna maidake gisiktangko on`kangmanaha? Angni ia chadambe gisikni ching`doa-chadoanichi jeko jakpattalo jakkipe nokkol dake rakkigen ine chanchiachim, bikpil angasa be`entangni chiktet-cha`tetana, gisikni dongdikana uni nokkol ong`pila gita ong`aha! Angara do`o gita adal am`rame majalosa ga`akahama ? Indake ong`jaode, angni gisik maina rajako nikjani gimin indita dongsiksakbena nanga? (Rang`spee) Rajani re`baani

somoiba ong`aha; angko da`al mai
rokom dakeba nikenga sawa ma`sia?
(Janerani mikkango chadenge)

(Nandina napbaa)

(Parake) Nandina re`baama? Niboch-
ing, angni mikkang bimangko da`al
janerao maidake nikenga?

Nandina : Bilongen ilbee nika, mongnal balsa
rongtalgipa chibolo balgae dong-
enga gita daknikman`pila! Jeba
ong`bo, uarangko gualbo! Da`o anga
je kattako agangen ine re`baa, ua
kattako nachil songe knachengbo.

Taposi : Mai, mai uara? Raja re`baengahama?

Nandina : Mai Raja? Rajara nang`ni ong`e
dongkuengama ua nang`ona re`ba-
nara?

Taposi : Maina? Maina? Uara mai katta? Mai
ong`aha aganboching -

Nandina : Maiko knagen? Ua Dhaniramko
nikjokkonba, uni giminde na`a
namedake ma`sia dongkuja. Ugita
dake choletgipa cha`chipilgipa
denggu mande saoba dongkuama?

Taposi : Maina? Uara maiko dakjok?

Nandina : Maiko ua dakjawa? Nang`ni uko
dakchaka dipet ua nang`ni katta
gitan choliachim; indiba da`ode ua
dingtang ramako re`na chanchieng-
aha.

- Taposi : Maiko inenga? Angade nang`ni maming kattarangkon ma`sina man`jaengaha.
- Nandina : Na`a maiko ma`sigen? Na`a Manas chibimani rikamo songdongeng-gipa Nokma Dejangpani bimingko knajok?
- Taposi : Maina knajawa? Ua saksa bilongen ka`donggipa, an`tangni dakbewalko rim`kingkinge dongaigipa ong`a; uni bimingko sawa ma`sija?
- Nandina : Nang`ni namnikbatgipa ripeng Dhaniram ua Nokman` demechik Dimbri baksa rajako bia ka`e on`na jotton ka`engaha, u`ijok?
- Taposi : Ia kattako nang`na sawa aganjok?
- Nandina : Maina? Ia songjinmao nang`na agre haida ia kattani gimin pilakan u`itoka, ma`sitoka! Dhaniram an`tangan iani bidingo knalan Nokma Dejangpaona re`angna tik ka`aha. Ua da`oba Dhaniram ong`e dongkuengama? Ha! Na`ara maina grapenga? Che! Che! Ia kattako knae mangmang grapna nangama? Rajade nang`ni segipa ong`jaba, na`aba uni jikburingsan ong`a - na`a maina hangjang nang`ni segipa chong`mot ong`gijagipana grapna nangjok?

Taposi : Re`angbo, na`a da`o re`angbo-
(Grapa)

Nandina : Che! Iara mai? Na`a mikron
mikchikon rakkina man`jaengaha!
Da`o mai dakgnok. Indake grapgen
ine ma`siode anga nang`na ia
kattarangko aganjawachim; -- uara
Dhaniram iachipakan re`baenga.

Nibo ripeng, na`a ia a`seloni
naljokna skode uni ramakosa
am`angbo. Mikron mikchichide
maming kam chu`sokna amja.
Nang`ni mikron mikchiko nike
nang`ko raja gisik ra`genma ma
Dhaniram kengen?

Taposi : Hai ripeng, an`ching ianoni on`tisa
jite chadengna. Haiwa Dhaniram
re`baengaha. Nina, ua ianona re`bae
maiko daka? (Mittinao dongnua)

(Dhaniram napbaa)

Dhaniram : (An`tangna agana) Ha....! Ha....!
Ha....! Montri ang baksa sipairangko
watatpana skaan dongsrangjachim;
indiba indaka budiko dake bon`kama-
ode angni namnika gitan dakna
nangaiaha. Ha....! Ha....! Ha....!
Rajaba ong`bo montriba ong`bo,
Dhaniramni ja`gao ga`akna pilakan
nangtelaigen! Dhaniram kamtangko
maming saloba gualja! Da`o
sipairangna chamgipa tangkako
jako man`chengna nanggen; uni

ja`man, ramarango jeko man`a
uarangkoba watjawa. Indita sipai-
rangko ang baksa watatpaenga,
angna mai kenani? (Chanchia gita
dake) Taposina ka`sa-ka`paka rajani
ka`tongoni sal salna chel`ang-
rikrikengaha. Da`oara maina? Uade
da`ode angko mamingchiba dak-
chakna bil man`jawaha, dongjaha.
Indiba ia me`chikba bilongen silade
sila. Jeba ong`bo, changsa ukoba
grongangsrangna. (Parake) Bao?
Taposi bachi, bano? Bao darangba
maina aganchakjaenga?

(Taposi napbataia)

Taposi : Mai, Dhaniram? Maiko chanchie
re`baa, aganboching knana?

Dhaniram : Maiko chanchigen? Nang`ni sila-
nitoani giminan gisiko chanchienga-
chim.

Taposi : Angni sila nitoani gimin? Indake
tol`na sawa nang`na skiaha agan-
boching?

Dhaniram : Sawa skigen, angni mikron rong-
gnian angna skiaha.

Taposi : De! De! Oi Dhaniram, na`a da`oro-
rode bilongen bal`ekna changgipa
me`asa ong`baengaha, mo?

Dhaniram : Ong`jaode mai ong`gen? Nikjama,
Tatara Rabugani ge`etako man`e
Nostu-Nopantu a`gilsako, aski-

tanoriko dakaha - - angaba nang`ni
nokkolsan ong`a - ge`etaibo maiko
dakna nanga.

Taposi : Nama Dhaniram, namen nama,
knaman`enga na`a saoba me`chikni
kingsa noksako rajana hajal
kolgrikbongana palahana, ong`ama
ong`ja?

Dhaniram : S-----sawa nang`na ia kattako
aganjok?

Taposi : Jeba aganchina. Indiba ia kattara
kakket ong`ama ong`ja?

Dhaniram : Ong`ja ---- tol`asa. Indaka kattako
sawa nang`na aganjok? Na`aba saksal
Da`ororo hajal kolgrikbonga tang-
kako sawa sana indinari on`aigen?

Taposi : (Dhaniramni gangipa jakstemko
nike) Are, iara mai? Na`a ia gamchat-
gipa jakstemko banoniko man`jok?

Dhaniram : (An`tangna agana) Ah! Ia me`chikara
ong`ai ong`jai kattarangkosa sing`e
roengaha da`oara? (Parake) Ia
jakstemko raja name tarie donchina
angna on`aha.

Taposi : Bebema? Ong`bebeankon! Nama,
Dhaniram, mikka wajokode chibol
jegita chiko chimonge rakkia,
uandake na`aba rajani maiba
bosturangko man`ode simsake
rakkironga, ong`ama ong`ja?

Dhaniram : Ong`naba donga, sawa u`ia? Na`a mai
maiko aganenga angade ma`sinan

man`jaengaha.

Taposi : Maidake ma`sina man`gen? Nang`gita dake sontolbegipa mande saoba banoba dongama? Anga indakesa aganachim, je a`ran kario ran`kreke donggipa chibolba mikka chiko man`ahaode chiko chimonge rakki-ronga, na`aba rajani maiba bosturangko man`ode indaken rakkironga, ong`ama ong`ja? Uarang jeba ong`china; mingsa kattakosa anga nang`o sing`na skengachim – chong`motan – na`ara Manas rikamo songdongenggipa Nokman` demechnik baksa rajako bia ka`e on`na jotton ka`engana, ia kattaara kakketma?

Dhaniram : (An`tangna agana) A`i maidakesa! Ia matcha bimara ia pilak kattarangko maidake u`itokaha, knaaha?

Taposi : Mai ong`aha, maina katta agangija jripjrip dongenga?

Dhaniram : Atcha, nang`na indake tol`a kattarangko sawa aganjok?

Taposi : Tol`a? Anga nang`ni chalakki daka budirangko indita sal nirikkie ma`sina man`aha; na`a ang baksa je bewalko mesokaha aro je kattarangko aganaha, ia pilak kattarangko raja knaode, nang`ko Manas rikamo songdongenggipa Nokmaona watatgija, Chitmangonasa watatgenchim! Ia kattako na`a u`iama u`ija?

Dhaniram : Na`ade indake agangenan da`ode. Nang`ni maming dos dongja. Indakaan ia chasongni torom ong`a! Ian chasong gital ong`a. Ia chasongo dakchakgipakon cha`sotani chasong ong`a. Na`a an`tangni giminan chanchie nichengbo, na`a maichim aro da`o mai ong`aha! Da`o na`a rani chacha gita suk ong`e janggi tangna man`enga; iara sani dakchakachi, gualahama? Da`o na`a angko cha`sotna jotton ka`jaode sawa ka`gen? Na`aba saksa ia chasong gitalni me`chikan ong`ajokna.

Taposi : Oe – angaba ia chasong gitalni me`chik ong`a! Indiba na`aba chasong gitalni togirakgipa saksa Saitan ong`a. Na`a angko angni batanggimin salni kattarangko gisik ra`ataha, indiba na`a an`tangba on`tisa an`tangni gimin chanchie niboching. Na`an tangkana mikboke angni cholono kakketani toromko nosto ka`chenggipa ong`ama ong`ja. Anga kangalni demechik ong`oba kakket cholonon janggi tangen-gachim. Da`ode, Dhaniram, na`an aganboching, badiã denggu mande ia dos grigipa do`oko rim`e ra`bae ia pattok gita dakgipa sonani gringo donenga? (Grapa)

Dhaniram : (An`tangna agana) Ia me`chikna pilak kattarangko aganade kraani

ong`jawa, ua bang`bata kattarangkon
ma`sitokaha; una agreba, raja ia
kattarangko knana man`jokode
obostaan namsrangjawa. (Parake)
Knabo, Taposi, anga da`ona kingking
nang`na maming namgijako daka
dongkujaenga, jeko dakengoba anga
nang`ni namgninan dakkuenga ;
na`a angni kosako indinari maina
ka`onangenga?

Taposi : Indide rajana bia ka`ani kattako sawa
nakatchengata?

Dhaniram : Uko anga maidake ma`sigen?

Taposi : Maidake ma`sigen? Na`an iani `dalali`
ka`enga, na`a ma`sijaode sawa
ma`sigen?

Dhaniram : Ha! Ha ! Ian na`song me`chikrangni
ma`sisokgijagipa gisik ong`a, budi
bakkandikani ong`a! Anga `dalali`
kamko ka`na nangengaha nang`ni
namgnini giminan! Na`a bebera`jama
anga `dalali` ong`e re`angahaode ia
bia maming saloba ong`jawa ine? Iani
bidingo na`a tom`tom jajrenggija
dongaibo! Iani ja`mansa na`a
ma`sigen, Dhaniram nang`ni badita
nambatgipa ripeng ong`a.

Mittinoni : Knajokma, Dhaniram ia noko
dongama? Raja uko changsa
grongna am`engana.

Dhaniram : Ua knabo! Anga da`o ianoni
re`nakaha. Na`a iarangni gimin

on`tisaba mamingnaba jajrengnabe.
 Raja ua me`chikko kimoba, angni
 tangenga dipet na`a mamingnaba
 jajrengna nangja. Nang`ni ia
 chadambeni bimang, rajani gamjin
 ong`a. (An`tangna agana) Nang`ni sila
 bimangko ra`ean dongbo, anga
 nang`ni skoon narikelko dokpretna
 re`angengaha!

(Ong`katanga)

Taposi : (Rang`spee an`tangna agana) Da`o
 rasong kopalo maiaan sea donga
 mamingkon ma`sina man`ja. Bao?
 Raja da`asalde angona re`bachipjaha.

(Nandina napbataia)

Nandina : Mai rokom ripeng? Anga jeko agana
 ua kakketkonba? Indiba da`o iani
 gimin maiba chol dongama? Ia bia
 ong`ode, na`ade jringjrotna saksan
 sikdikdik janggi tangna nangaigbok.

Taposi : Mai chol donga aganbo.

Nandina : Chol donga. Mamingna jajrengnabe.
 Dhaniram chanchienga una bate
 chalakkigipa darangba dongja,
 indiba da`osa ua ma`sina man`gen
 uni badita mancha budi donga. Hai
 re`bo, ang baksa re`bapabo. Bigita
 dakgipa dengguko togina maming
 neng`nikani ong`jawa.

Taposi : Hai indide.

(Sakgnian ong`Katanga)

DAKMESOKA II

MESOKANI I

**Manas Chibimani Rikam, Nokmani Nok
(Me`gam Nongal aro Toromigipa
Me`chik napbaa)**

Me`gam
Nongal

Abi, angni dukni kattako maiko
sing`enga, maiko knagen! Anga tange
dongenga, iaba Rengsa Balsa
Salgrani ka`saachisa ong`a! Maiko
dakgen, Nokmani mikkangko nik-
jokon angni ka`tong dongsiksakbea!
Abi, chinga mai papko dakmanaha,
Gitelba chingko keleng mikronchisa
niengaha!

Toromi
Me`chik

Rani, na`a saksa daito gnanggipa
Nokmani jikgipa ong`a! Na`a indake
gisik-ka`tong be`grue mesokode
maidake choligen. Rokomari a`sel-
rangko chagrongna nanganian ia
songsarni niam ong`a. Basakoba suk,
basakoba duk, basakoba kusini,
basakoba sintiani, iarangan gelna

galna man`gijagipa songsarni ripeng
ong`a. Raja-Rani ong`ahaode,
uamang jringjrotna sukkosan
man`aigen indake ong`ja. Nibo, je
manderang sagal gita songreenga,
uamangba pangnade tom`tome
re`angna man`ja! Badita stil, badita
balraka, badita mikka, balminduri
uamangni songreaniko champenga,
uarangni maming hisap dongja.

Me`gam
Nongal

(Rang`spee) Abi, ua mikka balwako
jean nikaha, uasan ma`sina man`gen
ua badita kengnini ong`bea. Na`a
chingni namgija obostarangni gimin
knaode, indide -----

Toromi
Me`chik

Rani, angade jringjrotna an`tangko
Gitelna on`kanggipa me`chiksa
ong`a. Ia songsar sagalni bilakbegipa
chipakkore aro dukni balminduriba
angko maming dakeba moatna
man`ja. Indiba -----

Me`gam
Nongal

(Bilongen rinokbea ku`rangchi)
Maiko agangen abi, Nokmani mik-
kang bimangko nikjokon a`gilsako
tange dongna sikjaha. Uni nitobea
bimang, chananga mikkang, roko-
mari obostarangko chagrongna
nangani gimin bilongen ong`sibeeng-
aha! Ian Isolni donsogimin sal
somoichimma?

Toromi

Me`chik : Rani, nitogipa bimang wa`alni ding`ako man`ode bate rong-chingbate nika. Asol sonako wa`alchi so`esa ma`sina man`a. Na`simangni da`o duk chakna nanganirangba uandake mikkangchi na`simangni rasong mikkimko teng`suatgen mingsingatgen. Duk aro rokomari saknaarang baksa dakgrike janggi tangbagipa manderangan ia song-sarni asol ortoko ma`sigiparang ong`a aro uamangan kakketgipa mande ong`na ama.

Me`gam

Nongal . Abi, indake Nokma ong`e songsaro janggi tangana bate buring samringo rorame, nokantio gilame cha`an, janggi tangaan jringjrotna kusini ong`batgen ine chanchiman`a. A`songni Nokma ba Raja ong`aniba sao sarapsa ong`a abi.

Toromi

Me`chik : Oe – ong`ade ong`an. Atcha, Rani, nang`o mingsa katta sing`gen ine gisiko chanchie dongengachim; uara, demechik Dimbrini giminara na`simang mamingkoba chanchi-kujaengama? Uniba chu`onga gitan bilsa ong`aha.

Me`gam

Nongal : Maiko chanchigen? Nokmaniara iarangni bidingo chanchiani somoi

jako dongama? (Rang`spee) Abi, nang`na maiko agangen, anga an`tangba iarangni bidingo Nokma baksa golpona-aganna somoian man`srangjaenga.

Toromi

Me`chik : Iara mai katta? Indaka kamo gisik nanggija dakaniara kraani ong`eng-ama? Haiwa Nokmaara iachipaknan re`baenga.

Me`gam

Nongal : Abi, changsamang Nokmani mikkang bimangko niate niboching! O Isol: Ia A`chik jatko Nawangni minokeng-aoniko basako na`a naljokatgnok? Badita chasong indake duk chake dongna nanggnok? (Grapa)

Toromi

Me`chik : Rani, tom`tombo. Nang`ni ia somoio indake dongsiksake mesokani kraani ong`jaenga. Nang`ni indaka obostako Nokma nikeode baditan duk ong`gen, uarangni giminba chanchie nibo.

Me`gam

Nongal : Abi, Nokmani indaka obostaranko nikjokode anga a`gilsako janggi tange dongnan sikjaha. O Isol: Anga badia chasongo mai papko dakmanachim, na`a angko indita sasti on`engara? (Grapa)

Toromi

Me`chik : (An`tangna agana) Is! Setangni dukko nike setangna ka`sachongmotgipa

me`chikara tom`tom dongna
 man`genma? (Parake) Rani, na`a da`o
 on`tisa jite chadengbo, on`tisa
 tom`tomani ja`man Nokma baksa
 agangrikna man`gen. (Ranini jakko
 rim`e) Hai, an`ching sakgnian on`tisa
 dang`dange chadenge dongna.
 (Mittinao chadenge donga)

(Nokkol baksa Nokma Dejangpa
 napbaa)

Nokma : Rangat! –

Nokkol : Maina Nokma!

Nokma : Ia chittirangko Dingganni jako on`ebo
 aro aganbo, ia pilak chittirangni
 aganchakaniko da`alan tarie watatna
 nanggen. Ta`rake re`anggalgalbo.

Nokkol : Nang`ni ge`eta gitan ong`china,
 Nokma.

Nokma : Ia chittirangna maidake aganchakna
 nanggen ua pilakkon anga chittini
 janggilo kan`dik kan`dik seataha.

Nokkol : Nang`ni ge`eta gitan ong`china,
 Nokma.

(Ong`katanga)

Nokma : (An`tangna agana) O Gitel Isol, anga
 Nokma ong`eba bilongen duk ong`esa
 jatangko nirokna aro janggi tangna
 nangao ga`akengaha. Angni jatko
 anga maidake basako tom`tome
 dongdil-cha`dilna man`gnok Gitel,
 angna nama ramako mesokangpabo.

Toromi

Me`chik : (Mittino dongaoni ong`katbae aro Nokmani mikkangona re`ange) Nokma tangbangchina.

Nokma : (Salam ka`e) Abi, ruuta salni ja`man nang`ko grongna man`e anga bilongen kusi ong`a, indiba raniara bachi, uko iano maina nikjaenga; ua nang`ming re`bapajama?

Toromi

Me`chik : Oe, ua ianon dongachim, haida ua da`oan re`bataigen.

Nokma : Abi, na`ara indita sal bano dongachim? Bachi re`angachim?

Toromi

Me`chik : O - anga? Anga Balpakram, Chitmang aro Kamagiriona re`angachim. Nokma, nang`ni pilak mande-rangan namtokengakonba?

Nokma : Ia da`o nikenga gitan. Gitel Tatara Rabugani pattiachi, Susimeni ka`saningachi da`ona kingking namen dongkuenga. Indiba iani ja`man mai ong`gen ukosa aganna man`ja.

Toromi

Me`chik : Nokma, indake aganmalama? Chiring Chibimara basakoba a`bri-a`ronggako gelna aro galna man`ama? A`bri - a`rongga donga dipet chiring-chibimaba donggen. Jabitchimni ja`man jagital, jagitalni

ja`man jarambong; indaken pang-
nanade jabitchim ba jarambong
ong`aride dongkamaija. Mandeni
jaggi tanganioba indaken ong`a.
Na`a mamingnaba jajrengnabe.
Nang`ni jat bilongen ka`donggipa jat
ong`a. Indiba ua ka`donganiko
budichisa jakkalna nanga. Na`a
jajrengani gisikko ka`tongona
ra`banabe.

(Me`gam Nongal napbataia)

Re`ba, rani, re`babo.

Me`gam

Nongal : (Nokmani jakko rim`e) Gitel, indita
salni ja`man changsa nokningchi
re`e neng`takode bilongen kusi
ong`begenchim.

Nokma : Rani, anga nang`ni mikkango
bilongen oniako dakmana gita
daknikman`enga; gisik ra`jokode
bilongen kratcha`mana. Indiba maiko
dakgen ? Anga maming saloba
skatang dos ka`a dongja. Hai re`babo
rani, asongbo. (Toromi Me`chikchiko
niate) Abi, na`aba ka`sapae asongbo.
(Pilakan asonga)

(Nokkol napbataia)

Nokkol : Toromigipa Nokina, montri ia chittiko
nang`ona watattaiaha.

Nokma : Bao? Nina. (Chittiko poraie) Ah!
Indita salni ja`man haida an`ching
da`ode tom`tome dongna man`gnok.

(Nokkol ong`katanga)

Me`gam

Nongal : Raja, iara maidake ong`gnok?

Nokma : Bijnini skotong baksa songgi-grikaniko dakna am`engaha. Ua ia chittio indake ku`rachakaha je, una lak chibongamang dangga on`atode ua maming dakgija re`angpilaigen. Rani, inda' a songbadko man`e angni ka`tongo kusi aro duk ong`beaha. Bilakgipa mikka balwa gita dakgipa bobil ia a`songoni re`angaha, ia bilongen kusini a`sel ong`oba, indiba jeko on`atani ja`man ua re`angaha, uko gisik ra`jokode a`gilsako dikdiksaba janggi tange dongna sikjaha. (Rang`spee) Maiko agangen, anga mingsinggipa matgrikni ma`kringo atchigipa ong`oba, saksa denggu mikbokrakgipana kene una dangga on`esa janggi tangna nangengaha. Che! Iana bate angna maia kratcha`beani ong`na man`a?

Toromi

Me`chik : Nokma, pilakkon na`a ma`sia. Paisani pil`sa pil`gni ba mikkang janggil donga gitan, mandeni janggi tang-anio suk-duk, sal ding`a salakkima, iarang pilakan donga. Iarangan Gitelni donsogimin a`gilsakni mandeni janggina rasong kopalni kal`ani ong`a.

Nokma : Oe, ong`ade ong`an; iarangko darangba gelna man`ja.

Me`gam

Nongal : Bijni rajani sipai dal`gipa dangga man`e an`tang sipairangko rime songtangchi re`angpilaha – iara Tatara Rabugani skanichian ong`a.

Nokma : (Ka`dingsmite) Rani, na`ara chanchiama, ua denggu re`bataijawaha ine? Menggoara changsa dutni similako man`jokode, ua biapko indinari ramram watangaigenma? Dangga paisa nangjokode ua da`oba re`bataiaigen, iako jajrenggijan agansona man`aigen. Mikkangchide haida maimaikon bi`a sawa ma`sia. Chu`onga gita sipai, gure, mongma aro ostrorang dongode bil susaesa nisrangna skengjokchim anga, indiba bilgri ong`ani giminsa sko choknoke chakchikna nangao ga`akengjok.

Toromi

Me`chik : Nokma, na`a iarangni bidingo bang`e chanchina aro jajrengna nangja; kosako donggipa Gitelan mikkang ki`sang pilakkon u`isogipa ong`a, uan nang`ko mikkangchi dakchakanggen.

Me`gam

Nongal : Nokma, nangija sal somoi batanga gita ong`aha. Da`ode an`chingni demechik Dimbrini giminba on`tisa chanchina nangao ga`akengaha. Unaba jora-ripeng sandie on`ani somoi ong`engaha.

Nokma : Iani gimin indita adik sikdik dakna nangja.

Me`gam

Nongal : Iara mai katta, Nokma? Demechik dal aha, uko indinari rakkie donna man`aigenma? (Mittinoni doka-dam`a gam`a, adita chel`kalaoni)

Nokma : Ah? Bah! Bilongen knatoa. Indake doka-dam`anirangko sawa dakenga?

Me`gam

Nongal : (Niate) Ua niatbo, demechik Dimbri uni ripengrang baksa pul bariororamenga.

Toromi

Me`chik : Ah, raja, niatboching, mite me`chik uni ripengrangko rime roramenga gita nikatpilenga.

Me`gam

Nongal : Nokma, nang`ni ia silbegipa mongnalko saoba drae ra`e katangako na`a namnikgenma?

Nokma : Ua maidake ong`gen, Rani?

Me`gam

Nongal : Nokma, Delhini raja ong`jaoba gipin a`songni rajarang ia silbea mongnalni gimin ma`sina man`ode uamang wataigenma?

Nokma : Aiao! Maidakgipa knatobea ku`rang!

Mittinoni : Git

Knatobea ku`rang uni
Ka`tong ka`srokani

Re`baenggipa salrang
Ong`ata chanchiani.

1. Ka`tong da`al dongdikata
Mainaba gisiko
Man ja dongdipatna da`al
Ka`tong su`dikako.
2. Gitel na`a bilakatbo
Sngni bilgriako
Mesokangbo angna
Janggini ramako.
3. Nikna man`ja dikdiksaba
Janggini bimangko
Dongjaha kakket bichalan
Ia a`gilsako.

Toromi

Me chik : Aiao mairongpile knatobea! Nokma,
chinga buiring jatchio basakoba
basakoba indaka knatobea gitrangko
salgisako knana man`ronga! Indaka
knatogipa ku`rang mite me`chiknisa
ong`na kraa.

Nokma : Oe, ong`bebean! Knatobebean! Jeba
ong`bo rani, atcha an`chingni
demechik Dimbrini bilsa da`o badita
ong`aha?

Me`gam

Nongal : Ah! Na`a gualahama Nokma? Dimbri
da`ode chicheto ga`dapeaha.

Toromi

Me`chik : Nokma, da ode sal somoirang
bilongen dingtangbeaha, skangni

chasong gita ong`jajok. Dimbrina mande am`na inode jatangni gisepon matgrikrango am`na nanga.

Nokma : (Ruutkale rang`spee) Abi, maiko agangen! Chengo ambi-atthurangni songdonga`chabaani kattarangko gisik ra`jokode bilongen gisiko suk ong`ja; an`chingan bilak-wa`sagipa ka`donggipa jatchim, uko da`o bebera`nan neng`angpilengaha! Dakgipa, Rugipa, Pattigipa aro Ra`rongipa an`chingni kosako maini gimin indita ka`sanninggija ong`aha, agannan man`ja. Badita chasong ong`engaha, an`ching jatni rasong kopalni salgisako chatbea gadila simdapengaha. Nibo, indaken Dho-bani raja an`chingko Dhubrio bang`a bilsi songdonga`chana on`jani giminan, an`ching da`o Manas rikamo songdonga`chaengachim; ianoba ua uni dal`batgipa sipaiko watatronga an`chingko dikdar ka`na. Abi, an`chingara indaka apotoni maming saloba naljokna aro jakgitel ong`na man`jawajokma?

Me`gam

Nongal : O rasong kopal! Ua sonan chasong bachi gimaangjok? Sawa minokjok? Gimaanggimin chasongko man`pilna man`genma?

Toromi

Me`chik : Man`pilna man`janaba donga. Indiba

iarang pilakan Dakgipa Ra`rongipani
skaosa pangchaka. Maming obostaan
pangnana apsan ong'e dongkamaija.
Je Gitel an`ching jatko A`song
Tibotgirioni a`bi mandu a`chang
diltuko dobate da`o dongenggipa
biapona dilbaaha re`dilbaaha, uara
an`chingko watgalahama, gual-
ahama? Da`ona king king Sal-jajong-
askirangde salaramchipaknian
nakuenga, da`oba chengo gitan
balwa balkuenga, torom dongkuenga.

Nokma : Maiko dakgen, rasong kopalo je sea
donga uan ong'aigen. Jeba ong`bo
rani, na`a Dimbriko changsa ianona
okamatbo. A`songni rokomari kam-
rango napsrime dongna nangani
gimin, ruuta sal ong`engaha,
demechiktangko name sambao nin
nina man`piljaengaha.

Me`gam

Nongal : De, indide anga rime ra`ekuna.

Toromi

Me`chik : Rani, na`a maina re`anggen? Anga
re`anggen.

Me`gam

Nongal : (Chadenge) Maina? Maina na`a
re`anggen?

Nokma

: (Chel`kalachiko niata gita dake)
Darangba rimna re`angna nangjawa.
Uakai Dimbri an`tangan iachipaknan
re`baengaha.

Toromi

Me`chik : Ah! Nokma? Na`a bilongen rasong gnanggipa. Rani, nang`koba anga bilongen mittelna ska, maina na`a ia silbea ka`saninggipa ma`ani ka`tongni gamjinna kragipa demechikko man`aha. Chanchiman`a, na`a Rokkime chong`motkon demechik dake man`aha. Badiaba chasongo haida na`simang nama kamko ka`ani giminsa indaka boksisko man`aha.

Me`gam

Nongal : (Asonge mikchi jingjang jingjang dake) Abi, na`a angni demechikna pattibo jedakode ua mikkangchi name janggi tangangna man`gen. Uni sila bimang, cholon bewal aro uni budi changa sapako nike angni gisiko rokomari chanchianirang nakatbaronga. Mikkangchi ia bi`sani kopal rasongo mai sea donga uko aganna man`ja.

(Dimbri napbaa)

Re`ba, ama rani re`ba. Ama, na`a ia abi Mrikko gisik ra`kuengama ra`jaha. Bia saksa toromo janggi tanggipa me`chik ong`a aro bian nang`ni chonmitingode nang`ko ba`rikachim nirokachim.

Dimbri : Badita bilsa ong`aha nikkijaan, uni gimin ma`siatnan man`jaengachim. (Salam ka`e) Ma`jong, na`a angko

kema ka`bo nang`ko ma`siatjani
gimin.

Toromi

Me`chik : Na`a mai dosko dakaha, nang`ko anga
kema ka`na nanga! (Dimbrini kopalo
ka`sae ku`dime) Nang`ko jringjrotna
mingsingangchina. (Ranichipakko
niate) Rani, angni Balpakramchi
re`angmiting somoiode ia bi`sara, ia
mongnalara bilsa gnisan ong`enga-
chimmo?

Nokma : Asongbo, ama rani asongbo. Na`a ua
bario maiko dakengachim, Ama rani?

Dimbri : (Sambao asonge) Anga pulrangna chi
ruengachim baba aro skigipani gital
git skiatgipako ranta ka`engachim.
Baba, na`a ruuta salrangnan angni
barionade re`baan dongkujaenga.
Hai da`oan re`bo baba ! Bario badita
silsila pulrang balchome balgaoe
dongenga; na`a uarangko nikjokode
bilongen kusi ong`begen.

Me`gam

Nongal : Iara mai pul, ama?

Dimbri : Iara golap bibal ong`a; angni ua
barionikon anga nang`na ra`baaha.
(Ma`gipani jako on`a)

Nokma : Chengode ia pul ia A`songo dongja-
chim. A`gisio chagipa pulsa ong`a ia
pulrangde. Ukosa ia a`songonaba
badiaba rajarang ra`baaha. (Chel`ao
dakgrikani adil sika gita knana
man`a)

Pilakan

Apsan : (Kena gita aiao inmane) Iara mai?

Nokma : Ranggat!

Mittinoni : Nokma?

(Nokkol napbataia)

Nokma : Niboching, indake sawa maina adil sikenga?

Nokkol : Nang`ni ge`eta gitan ong`china!

(Ong`katanga)

Nokma : Iara da`oba mai a`sel sokbanaken-gaha! Dhubrini Dhobani rajara songgigrikaniko pe`e dakgriknasa jotton ka`engama? (Chadenge) Ah: ia a`songo dakgrikna dinggrikna inarangko knaani nachilo ranta ong`pilaha. Anga knana man`a, badiaba sagalode pangnan chipak-kore satkame dongaiana; ia a`songoba indaken ong`na am`engahama! O Gitel! ---

(Nokkol napbataia)

Mai songbad, Ranggat?

Nokkol : Nokma pilakan nama, maming jajrengani dongja. Dhubrini Dhobani raja mainiba gimin uni songbad ra`ruragipako ianona watataha, ua da`o cholgugao nang`na sengenga.

Nokma : Bebema? Aiao, rang`sitna man`aha indide! Angade chanchiahachim da`obatai maiba a`sel namgija sokbaahama inesa. (Toromi me`chik-

chipak niate) Abi, angko re`angna on`bo, na`simang baksa dikdiksa asongnaba somoi man`jaha. (Ranichipak niate) Rani, da`oba angade soba nokdringona re`angna nangtaiengaha.

Me`gam

Nongal : (Ruutkale rang`spea gnang) Man gnanggipa raja, anga ma`sia, angni kopal rasongo nang baksa asonge dikdiksa suk ong`e dongpana sea dongja.

Nokma : Rani, iani gimin na`a duk man`nabe! A`songni manderang je mandeko Nokma songa, ning`tue chanchie niode, ua Nokma retrangni nokkol gitasa ong`a! A`songni retrangna nama-namja, suk-duk pilakkon nirokna nanga; uni gimin Nokmade dikdiksa neng`take dongani ong`ja.

(Nokkol baksa ong`katanga)

Me`gam

Nongal : Abi, hai an`chingba re`aignok. (Dimbrichipak niate) Hai, ama - an`ching nang`ni pul barichi changsa wene re`bana.

Dimbri : Re`bebegenma ama? Hai indide. Indiba nibo, ama, da`al babade angni bariko changsaba niangjaha.

(Pilakan ong`katanga)

MESOKANI II

**Manas Chibimani Rikam, rama
(Me`asani bimango dakjee Nandina
napbaa)**

Nandina : (An`tangna agana) Ha....! Ha....!
Ha....! Nang`ni bimingara mai?
Angni biming Nandiram. Ha....!
Ha....! Ha....! -Ihing , ihing ; Indake
ka`dingode cholijawa. (An`tango nie)
Bilongen namaha, nitoaha, jeba
ong`bo! Sawa angko Taposini
ripenggipa ine ma`sina man`gen?
Ha....! Ha....! Ha....! Che! -
Ka`dingjawaha ineba an`tangan
ka`dingman`aia. Dhaniram bilongen
chalakkigipa mande ong`a; uan
angko u`ina man`jahani gimin
mamingna kenani dongjaha. Taposi-
ni gisiko skaniara Dimbri baksa
rajani maming saloba nangrimani
ong`jachina; unon Dhaniram
kratcha`aniko man`gen. Nina, maiko
dakna man`a. Anga ianona jeko
miksonge re`baa, ua chu`sokama

chu`sokjama. Una agreba Dimbrini bimingo tol'e Dumuryani rajanaba chitti seataha. Dumuryani raja chittiko man`arian Dimbrina pagla ong`aigen. Dhobani raja baksa Dumuryani raja Dimbrina dakgrikchina. Nina, da`ode sani kopal rasongo maia mancha dongsoenga. Haiwa Dhaniram montri baksa iachipaknan re`baenga. Anga montrina Taposini gimin jegita aganaha, ua haida chingni rajani kosako bilongen ka`onangenggen. Nina, uamang mai mai kattarangni gimin agangrika. (Dongnue donga)

(Jachingpa aro Dhaniram napbaa)

Dhaniram : Montri sahep, chadambemitingni somoio be`en chiktet cha`tet dakmitingo mande maiko dakja? Uandake chingni rajaba basakoba basakoba bikpil kamrangkosa dakronga; iarang maming aiao inmanani katta ong`ja. Rajani bilsiba bang`kuja. Na`an chanchie nibo, rajarangni nokdringo ong`ronggijarangan badita ong`enga.

Jachingpa : Oe, ong`ade ong`aan! Indiba anga knaman`enga, Dhobani raja Taposi minggipa saksa me`chik baksa ---

Dhaniram : Oe, oe, maiko agangen sahep? Bija me`piliprangara pul balsaosan dongna ba unikosan bitchi opna nanga ine maming niam dongja. Bija

me`pilip je pulonaba re`angna
man`aia.

Jachingpa : Indiba sahep, anga knaman`a, ia
Taposi minggipa ramramgipa pul
ong`ja.

Dhaniram : (An`tangna agana) Ia katta tol`ade
ong`ja. Angaba iani giminan
jajrengenga. (Parake) Ong`aan,
nang`na ia kattako sawa aganaha
sahep? Ua saksa ramramgipa
me`chiksan ong`a, da`al donga, knal
dongja.

Jachingpa : Sahep, Nokman` demechik Dimbri,
ma`kringoni gisepo Dejangpani
janggi silchi gitachacha ong`a. Uni
gimin, iarangko knajokode maming
saloba cholon grigipa raja ba mande
baksa demechiktangko bia ka`na
on`jawakon.

Dhaniram : Indakede ong`ja sahep, ia katta-
rangkode Nokmana knaatna nangja.

Jachingpa : Knaatgen indake ong`ja, indiba
manderangni ku`ritingchi balpakang-
gipa kattarangko sawa champengna
man`gen? Ia kattarangko darangba
donnuna man`jawa, wa`algita
chadoaigen, an`tangtangan nakatang-
aigen, pilak retrangan ma`sitokaigen;
uko darangba champengna man`-
jawa.

Dhaniram : Sahep, jajongo simteka donga ine
saoba uko chonnika dongjokma?

Jachingpa : Indake ong`ja. Indiba ia jajongni simteka gita ong`ja; iade jajongko chu`gimik Nawang minoka gita ong`aha. Indakachi na`songni rajani mikkangchi bilongen namgijani aro bodnam ong`ani, rasong mikkim gimaani ong`gen.

Dhaniram : (An`tangna agana) Iade bilongen gondogol ong`ani kattasa ong`enga. Gondogolara mai? Angna namgnisa ong`aigen. Raja ia saru bimako gringoniko watatode bilongen nambegenchim. Angade una ja`ga sae donenga.

Jachingpa : Sahep, maina katta agangija jripjrip dongenga?

Dhaniram : Ong`ja ---mane --- anga indake chanchiman`enga je, ia chona kattaan nang`ni ka`tongo mitchiani-ko ong`atode, indide anga iani bidingo rajana chitti seatgen, raja ua denggu me`chikko bachiba gipin a`songona watatchinagita. Indake dakode haida maming apotia dongjawaha.

Jachingpa : Chong`mot, indake dakana agre mai chol dongkua? Raja Dhobani jodisa indaken daka, indide maming jajaani dongjawaha.

Dhaniram : Beben, maina dakjawa? Pitolni bodol sawa sonako ra`jawa?

Jachingpa : Indide anga da`o re`nakaha. Na`aba re`ange neng`take dongebo. Nokma

baksa knal pringo grongna man`gen.

(Ong`katanga)

Dhaniram : (An`tangna agana) Chingni rajani kamrang pilakchian gipangaha! Nama, indiba indinari janganggipa ku`ritingrangko jripatna maming chol dongjama? Maidake donggen? Iani re`ani`de chibimani jokonanga gitan apsan. A`bachengode, a`brioni chiring gita dake ong`katbae chibol aro wari ong`chenga; unoni jo`olange ka`sinsin ta`rakbaroroa; ja`man ta`rake jokonange dal`gipa chibima pil`a. Mandeni ku`riting knaritingani bidingba indaken ong`a. (Nandinako chel`ao nikate) Ahaha! Ia nitogipa panteara sawasai; uko u`isiksik dakmanenga. Iakoara banoba nikahachimma? (Parake) Oi, angjong na`a iachipak re`baboching.

Nandina : (Mikkangchipakna re`ange) Na`a maikoba aganengachimma?

Dhaniram : Nang`ni bimingko mai minga, jong?

Nandina : Angni biming! Angni biming Nanjang.

Dhaniram : Bah : Knatoa biming. Nang`ma nang`pa indake knatoa bimingko nang`na donaha. Indiba na`a iano maiko dakenga?

Nandina : Anga iano donge poraienga skie ra`enga.

Dhaniram : Eh! Muktarangko am`ean manderang
tu`begipa sagalrango ripenga. Rajani
nokdringba sagal gitan ong`a. Na`a
iano donge posan-poraiengama ma
maikoba dakenga? Na`songni a`songo
poraianina maming chol dongjama?
Atcha, ua kattarangko galbo, indiba
angna mingsa kattako aganboching:
Na`a Nokman` demechik Dimbriko
nikmajokma?

Nandina : Oe, maina nikjawa? Jemang jajong
baksa songdongenga uamang
askirangko nikjawama?

Dhaniram : Indide bilongen nama! Atcha jong,
na`songni Nokman` demechikara
nina mai rokom?

Nandina : Uni sila-nitoaniko anga kattachi
parakna amjawa. Indiba ua Taposi
mangmang gita ong`ja.

Dhaniram : Ha ----- sagita mangmangde ong`ja?

Nandina : Na`ara nachil knajaengama, bengama?
- Taposi! Taposi! Knajokma?

Dhaniram : Ah ---Taposiara sawa?

Nandina : Ha....! Ha....! Taposi sawa, uko na`a
u`ija mo? Ha....! Ha....! Ha....!

Dhaniram : (An`tangna agana) Aiao iade! Uni
bimingko ia bi`saara maidake
bachiko knajok? (Parake) Anga
ukoara mai dake u`ina man`gen?

Nandina : Ah: Angna maina kakketko
donnuenga? Na`a montrina je

kattarangko aganachim, ua pilak
kattarangko anga knaaha.

Dhaniram : (An`tangna agana) Ia kattarangni
gimin mamingko agantaijaon
nambatgen. (Parake) Oe angjong,
anga nang`ko mol`molenga, na`a je
kattarangko knaaha, knaaha, indiba
ia kattarangni bidingo gipinrang
baksa maming saloba agangriknabe.

Nandina : Maina? Aganode mai ong`gen?

Dhaniram : Mamingde ong`ja, nang`na anga
nang`ni skagita mittai cha`na dangga
on`gen, na`a indaka rajani nokdangni
kamrangni gimin gisik nangna
nangja; iarang nang`na maming
namgni ong`jawa.

Nandina : (Ka`onanga gnang) Na`a paglama!
Na`a angko bi`sa nabalok ine
chanchiengama, nang`ni mittaini
paisana anga mikbokaigenma?

Dhaniram : Indide aganbo, na`a maiko man`ode
kusi ong`gen?

Nandina : Atcha, nang`ni jaksio ua jakstem
donga, uko angna on`bo; unode anga
darangnaba mamingkoba aganjawa.

Dhaniram : Che jong, na`a angko pagla inachim;
na`aba da`obatai paglaan ong`enga-
ma? Iako ra`e na`a maiko dakgen?
Iara saobana on`anima?

Nandina : Atcha, indide anga da`o Nokman`-
demechikchi re`angkuna. (Re`angna
am`a)

Dhaniram : Ei jong, chadengboching, ka`onange re`angna am`engjokma? Mingsa kattako knaangbo. (An`tangna agana) Ia kattako u`itokode namjawaha. Da`o anga maiko dakgnok? Indiba ia gamchatgipa jakstemko maidake una on`gen? – Maiko dakgen da`o? Ia jakstemko anga budi dakesa rajani jakoniko man`achim -- chanchie da`o maiko man`kugen? On`nan nangaig-nok.

Nandina : Oi sahep, na`ara grapengama? Ha....! Ha....! Ha....!

Dhaniram : (An`tangna agana) Aiao inmana! Ia chona bi`saan angko togiengaha? Che! Da`o maiko dakgnok? On`ataignok! Miksonge re`bagipa kam chu`sokode rajachiko da`oba maiba maiba boksisko man`angkugen. (Parake) Ia ra`bo, ha. Indiba, jong, ia kattarangni gimin darangba u`ijachina.

Nandina : (Jakstemko ra`chake) Ong`aigen -- indide anga re`naha. (Mittino dongnue donga)

Dhaniram : (An`tangna agana) Re`ang sala bi`sa! Da`al angna sal bilongen namjaha. Ah! Je ong`na nanga ong`angjok. Anga da`o maiko dakgen.

(Ong`katanga)

Nandina : (Dongnue dongaoni ong`katbae an`tangna agana) Ha....! Ha....!

Dhaniramni duk ong`ako nike
ka`dingnasa skaia! Ha....! Ha ..!
Bilongen denggu, uni kri biteba
man`aha! – Da`o mai ong`aha? Iako
kraa gitan sasti on`na nanggen,
ong`jaode anga tom`tom dengna
man`jawa. Da`ode angaba re`aignok.
Da`o anga me`chikni bimangc
re`ange Nokman' demechik Dimbriko
grongekuna. Indiba anga una
an`tangko maidake parakgen?
(Dikdiksa chanchia gita dake)
Ong`aigen, indaken namgen! Anga
an`tangko Dumurya a`songni rajan`
demechikni ripeng ine tol`e aganna
nanggen. Ian nambatgen. Ha ..
Ha....! Ha....!

(Ong`katanga)

MESOKANI III

**Manas Chibimani Rikam, Nokmani bari
(Me`gam Nongal aro Toromi Me`chik
napbaa)**

Toromi
Me`chik

Rani, ia bilongen kusini katta chong`mot. Dhubrini raja Saljagring ma`chongni bilakgipa matgrik ong`a. Raja Dhobani Dimbrini gimin mande watate uni Dimbrina ka`saengako parakaha. Dimbri baksa raja Dhobani krabebegen, ma`gapgen.

Me`gam
Nongal

: Oe, krana ma`gapnaba donga, ia kattako jechakjaenga.

Toromi
Me`chik

: Anga knana man`a, ia rajani gamjin bilongen bang`bea; ua bilongen toromi aro saksa skia-pora man`gipa mande ong`a.

Me`gam
Nongal

: Nang`ni pattianichi da`ona kingking

pilakan name dongengpitti. Mikka balwa rakbajokode mongnalko bikpil bawil bil'si bil'dak ong'ata; indiba balkasin balbajokode uni silani bilongen nitobaroroa! Gun grigipa seko man'ode silbegipa me'chikni nitoaniba an'tangtang dimelangaia. Gun grigipa me'asani jako nam-begipa me'chikba silna man'ja. (Chanchia gita dake) Anga ia demechik Dimbrini giminan chanchie gisiko bilongen duk man'a, gisik dongsiksakbea, ka'tong dongtoja. (Grapa)

Toromi

Me'chik : Ma'ani ka'tongsajokona, dukde ong'engan, gisik dongsiksakgenan.

Me gam

Nongal : Abi, angni ia ka'tong chibolni mongnalko sana pakwatgen? Sawa uko ra'anggan? Anga ia bi'sako chononian su'bu ki'i gale ging gale aldu-mittangbaaha; dal'atbaaha, uko anga maidake gipinni jako pakwatgen? Ia bi'sani kopal rasongo maiko see donsoa donga? (Grapa)

Toromi

Me'chik : Rani, ia pilakan ong'telaigipani niam ong'a. Bi'sa-de-sa dongode uamangna chanchien ma'a-paasa bilongen sko saani ong'a. Hai, re'bo, indaka kattarangko chanchie dongode cholijawa, da'o nokningchi re'naha.

Haida, Nokmaba da`omangde kam
matchotenggnok.

Me`gam

Nongal : Hai, re`bo indide.

(Sakgnian ong`katanga)

(Dimbri aro Nandina naphae)

Dimbri : Aganbo ripeng. Nang`ni kattarangko
knaede anga bilongen gisiko
kenmana. Na`a indita duk man e
ianona re`baaha. Nang`na duk
ong`chaka.

Nandina : Nokman`demechik, jilgipa moina
gringoni jokahaode, unı ki`sang
ki`sang buringni do`orang ja`rikpaa;
angni obostaba indaken ong`aha-
chim. Indiba nang`ni jajong mik-
kangko nike anga ua pilak duk-
rangko da`o gualaha.

Dimbri : Nama ripeng. Nang`ni raja angni
pagipaona mande watatgija nang`ko-
sa angona maina watatjok?

Nandina : Chong`mot. Nokman`demechik, na`a
bilongen budi gnanggipa ong`a. Na`a
pilakkon ma`sia. Chong`motde, raja
nang`ko sriksrik nibachinasa angko
nang`ona watataha.

Dimbri : (Ka`onanga gnang) Maina? Maina
angko sriksrik nichina nang`ni raja
nang`ko watata? Mai dorkarna?

Nandina : Maina ukode angaba aganna
man`jawa.

Dimbri : Aiao inmana! Anga knana man`a, ia nang`ni rajaana, angni jatko changsao, Dhubrio songdonga`chamitingo chonnike-mikchepe rikgalatachim, uno dongnan on`jachim. Ua raja baksa angni aro angni jatni maming rangnikani dongna nangja. Aganboching, nang`ni rajani miksongara mai chong`mot? Angaba Dhubrion atchibaana. Angni atchiani salgipinon angni jat gimikko Dhubrioniko rikgalatahana. Dhubrio atchiani giminsa angni bimingko Dimbri mingana. Anga ua rajana da`oba mitchikuenga.

Nandina : Nokman`demechik, kema ka`bo, angni maming namgija miksongani dongja nang`ni kosako. Uni miko chiko cha`e-ringe janggi tangpaengani giminsan anga uni katta gita uni ge`etako manina nangao ga`akenga. Ua angko nang`ko nina watataha; na`a mai rokom, uarangko niangchina ma`siangchinasa nang`ona watataha.

Dimbri : Indide, na`a angko nikahakonba, da`ode re`ange aganebo, matgrikni demechik matgrik chong`motan ong`a ine.

Nandina : Nokman`demechik, anga nang`na tol`e aganjaenga. Nang`ko nikna skang anga nang`ni gimin gisiko jeko chanchiachim, angni chanchiana

bate na`a bilongen dingtang. Na`a matgrikni demechik ong`na krachong`mota, bimangni silachiba nang`ko a`gilsakni maming baksa tosusana man`jawa; ka`sroka ku`rang, rinoka mikron niani angko aiao inmanata.

Dimbri : Kakketko aganboching, na`songni rajara maidagipa mande mancha. Ua retrangna ka`sanningipama aro uni ka`saa namnika pilaknan apsanma?

Nandina : Nokman` demechik, uni kattako maiko agangen. Bimangchide ua bilongen chananga, sila aro ka`saniga uni mikron. Ugita sila bimangko anga da`onaba darangko nikkuaenga. Uni sila aro chanangako gisik ra`jokon gisik an`tesreng aro bimang an`jrim dakbaaia. Indiba uni cholon bewal bilongen bikpil. Uni ka`tong bilongen ka`sanningijagipa ong`a. A`songni retrangko bilongen sinjetbea aro a`songni nomilrangko bilongen kal`akbea. Retrang kenesa chakchike dongaiengjok.

Dimbri : (An`tangna agana) Ia me`chikni agangipa kattarang kakketan ong`naba donga. Kakket ong`a ong`ja maming dorkar dongja. Angni jatko namnikgijagipa rajako maming saloba anga olakkina man`jawa. (Parake) Atcha - da`ode anga

re`nakaha, angni ripengrang haiwa
chibol rikamo angko senge
dongsoengaha. Na`a da`oba basakoba
re`bae angko grongbo.

Nandina : De ong`aigen.

Dimbri : (On`tisa mikkangchi re`ange) Nibo,
na`a gualnabe, na`a da`obatai
re`babo; nang`o kattarangko sing`na
nangani bang`bea.

(Ong`katanga)

Nandina : (An`tangna agana) Manderang
Taposikosa silbea ine aganronga.
Indiba raja ia silbegipa me`chikko
nikahaode uko nina siktaigenma?
Aiao inmanpile sila, indake silako
anga da`ona kingking nikkujaenga.
Indake sila me`chik a`gilsako
dongbebeama ine chanchiman`a.
(Chanchia gita dake) Dhobani rajani
watatgipa sipai dal`gipa haida
da`omangde sokbaenggnok. Haiwa
nikatengaha Nokma Dejangpa
iachipaknan re`baengaha. Anga ia
bol pangni mittino on`tisa chadenge
nikuna. (Mittino chadenge dongnue
donga)

(Nokma baksa Me`gam Nongal aro
Toromi Me`chik napbaa)

Toromi

Me`chik : Nokma, Dhobani rajani watatgipa
mandeni bimingko mai minga
inachim?

Nokma : Oh, uni biming? Uni bimingko Dhaniram minga. Ia mande bilongen gun gnanggipa aro mikkangchikoba nikprotna man`soaigipa ong`a. Aro raja Dhobani an`tangba seng`gipa mande ong`a, ua namani aro namgijaniba raja ong`a.

Toromi

Me`chik : Nokma, na`simangni kosako Rokkime aro Tatara Rabugani pattiani pangnan ong`china. Nibo, mairongpile aiao inmanani katta! Je rajaan changsao Garoranko uni a`dokoniko rikgalatachim, ua apsan rajaan da`o uni mandeko watate mai budiko dakna mangsongenga? Ia pilak kattarang bilongen chanchina nangani katta ong`enga.

Nokma : Chong`mot, ia pilak ong`anirang bilongen chanchina nangani ong`enga.

Toromi

Me`chik : Anga na`simangna ku`pattienga, na`simang pangna mikgaoe simake dongbo. Badia somoio mai a`selrang sokbaa uko warachakna pangnan simsake dongbo. Anga da`oba rongtalgipa biaprangchi re`angna nangkuenga. Na`simang pangnan simsake mikrake dongbo.

Me`gam

Nongal : Nokma, angade an`chingni demechik Dimbrinasa simbraenga. Ua da`ode

nomil sokaha. Una mikboke saobarang bobil dingjokode an`chingni demechikni obosta mai ong`gen. (Grapa)

Nokma : (Jikgipani jakko rim`e) Rani, mamingnaba jajrengnabe; je Gitel an`chingko Tibetoni 'A`song Pattari Chiga Suunchi'-ona, unoni, 'A`song Saora Chiga Timbora'-ona, uni ja`man 'A`song Neng`gitu Chiga Neng`chibing'-ona aro unoni Manas chibimani rikamo donggipa Donkuta Grimkol, chong`motan da`o an`chingni dongenggipa biapona dilbaaha nirokbaaha, ua Gitelan da`oba an`chingko rama mesokangaigen. Uni gimin mamingnaba jajrengna nangja. An`chingko dilenggipa Mitdeo pangnan pangchakbo aro bi`bo, Uan jokatgen. Na`a grapnabea.

Me`gam

Nongal : Demechikni mikkangko nie gisik dongtoja, bobilni jako ga`akangnasa anga kenbea. (Grapa)

Nokma : (Ruutkale rang`spee) Rani, pattigipa Ra`rongipa sani kopal rasongo maiko see donsoa uko sawa ma`sia aro uko sawa geln amsen? Chanchie nibo, na`a - anga da`o bano dongenga aro iana skang bano dongachim? Dakgipa Pattigipani niam indaken a`gilsako cholibaengaha. Badita a`bri, sagal, chibol, chiring, chibima,

buring, samring, bol, wa`a, jo`ong, guk, mande aro matburingrang a`gilsako atchiaha siang-bon`angaha. Indake chengo chengonian jring-jrotoni jringjrotona bikpil bawil ia a`gilsako ong`baengaha, ong`aha aro ong`angkugen. Iarangni bidingo chanchie kene an`chingni maming lap dongja. Ong`gnigipa jegitaba ong`aigen.

(Knatobee mittinoni git ring`a)

Nokma : Aiao bilongen knatobea git!

Me`gam

Nongal : Nokma knabo, badita ka`srokbee git ring`enga. Ia bi`sani kopal rasongo maian sea donga chanchie anga gisiko suk ong`breja. (Grapa)

Toromi

Me`chik : Rani, na`a indake duk ong`e mesoknabe. Nibo, nang`ni duk ong`ako nike Nokmaba duk man`paengaha.

(Dimbri napbataia)

Nokma : Re`ba, ama Rani, Re`ba. (Skoo ku`dime)

Dimbri : Baba, amaara maina indake dakenga? Ama, na`a maina grapenga?

Me`gam

Nongal : (Dimbriko ka`bakona salbae jak-samgnichi gipake) Ama rani, indita

salni ja`mansa na`a ia rasong grigipa
nang`mako gisik ra`ama? Angni sawa
donga, ama , nang`na agre angko ama
ine okamnagipa? (Grapa)

Dimbri : Maina ama? Nang`ko wate anga bachi
re`anggen ama? (Grapa)

Nokma : Peleki gnanggipa songsaro ka`saa-
ka`pakani bu`su badita saknaani
ong`a, uko chakchikna nanggipasan
u`iaia, mo abi?

Toromi

Me`chik : Ong`chongmot; uni giminan
chengode Muni Risirang songsar-
toromko wate, buringrangosa
re`ange dongrongachim.

(Nokkol napbaa)

Nokma : Mai songbad, Rangat? Na`a mai
koborko ra`baa?

Nokkol : Nokma! Dhubrini raja da`o saksa
mandeko watataha, ua nokmikkango
chadenge dongenga .

Nokma : (An`tangna agana) Raja Dhobani
da`oba angona mande maina
watataha? (Parake) Atcha, Jaching-
pako agansobo ua mandeko name
dake rimchaksochina. Anga da`oan
re`baenga.

Nokkol : Nang`ni ge`eta gitan ong`china, Nokma.

(Ong`katanga)

Nokma : Rani, hai an`ching nokningchi

re`naha. Angade da`oba soba
kutturiona re`angna nangengaha.

Dimbri : (An`tangna agana) Dhobani rajani
mandeara maina re`baaha? Ma
da`oba A`chikrangko sinjetna maiba
budi dakengama?

Megam

Nongal : Hai re`bo. (Toromi me`chikchipak nie)
Abi, hai na`aba re`bo.

(Pilakan ong`katanga)

Nandina : (Mittino dongaoni ong`katbae) Aha!
Ranini duk ong`ako nikjokode
an`tangba duk ong`manaia. Saksa
kam`kam demechikna ma`gipa
pagipa ka`sajaode sana ka`sagen?
Da`o a`gittal mande re`baa ingipara
badia a`songni ukosa ma`sina
man`kujaenga. Re`angpae nikuna ia
a`gittal mandeara banoni maina
mancha re`baa. Anga chanchia ia
a`gittal mandeko Raja Dhobanian
watatna nanga. Dhaniramko watate-
ba da`oba dingtang mandeko
watattaianiara mai orto? Anga da`o
me`asani bimango dakjena nanggen.
Dhobani rajanian mande ong`ode,
anga Dhaniramni gimin pilak
kattakon agansrangaigen. Iamangan
me`chik jatkode mamingna cholija
aro bilgri ine chanchigiparang ong`a.
Indiba iamang me`chikni budiko
ma`sikuja. Nina man`aigen,

Dhaniramni badita budi aro angni badita. Nokman`demechik iachipaknan re`baenga! Ong`aha aro --- mikkangko niede maibana ka`orange dongenga gita daknikman`enga.


(Dimbri napbataia)

Dimbri : Ei Nandina, na`a angkon sandien-gachimma? Na`songni raja da`oba mande saksa watattaiaha, anga uko grongnan re`bapilaha. Sakgni sakgittam indake mande watatani miksonganiara maimancha ukosa anga u`ina skenga. Chengo gita dake angni paako ma`ko chonnikna kal`akna man`jawa. Anga da`ode dal`aha, anga chakchikjawa.

Nandina : Chong`mot. Nokman`demechik, pangnade chonnikako chakchikna nangja. Chonnika man`gipa jatonian "JOKATGIPA" atchina nanga. Nang`ni katta aro ka`dongana anga bilongen kusi ong`bea. Chong`mot, na`an haida jatko warachakani danil aro Jokatani Silcha ong`a.

Dimbri : Jeba ong`bo ripeng, anga nang`ni dakchakaniko nangenga. Na`a ka`sapae dakchakangbo. Hai da`o re`naha.

(Sakgnian ong`katanga)



DAKMESOKA

MESOKANII

**Manas Chibimani Rikam, Nokmani
Nokmikkang**

**[Dhobani rajani mande watatgipa aro
(me`asani bimango) Nandina napbaa]**

Dhobanini

Watatgipa : Aiao inmana! Raja da`oba Garorang-
ko sinjetna maiba budi dakenga,
indakesa angko ianona watattaia.

Nandina : Chong`motma? Uara maidakgipa
sinjetaniko on`na chanchienga
da`obatai? Ia sontolgipa Garorangko
maina changni chang indake
sinjetaniko on`na chanchienga uara?

Dhobanini

Watatgipa : Maiko agangen, ia raja indake
mikbokrakgipa mikburakgipa,
darangni namakon ua nina man`ja.
Namnikjaoba janggina kenesa
namnika gita dake mesokna
nangengjok. Indiba ia raja saksa
rasong gnanggipa ong`a. Saobarang

muni-muktako tu`bea sagalo ripesa
am`na nanga; mitamde rama-
ranganikon man`aia. Iarang rasong
kopalo pangchakesa ong`chongmota.

Nandina : Nibo, na`ade Dhobani rajani watatani
giminsa ia Nokmaona re`bara, rajani
on`atgipa koborko on`a; na`a rajani
gimin namgija kattako agannabe,
simsake dongbo.

Dhobanini

Watatgipa : Oe, kattade ong`aan, indiba angara
tol`ede aganjaengaba.

Nandina : Ua Dhubri a`songni mande
Dhaniram, uni giminde na`a name
tale ma`sijakon.

Dhobanini

Watatgipa : Ong`ade ong`aan, indiba uming
angni maming agangrikna nangani
dongja.

Nandina : Ua na`songni rajako badita mitake
aganenga, uko knajokode na`aba
haida ka`onangmanaigen.

Dhobanini

Watatgipa : Chong`motma?

Nandina : Ua maina miksonge ianona re`baa aro
raja Dhobani uko mai kamna
watatachim, uarangko mamingko
ka`gija an`tangni man`gninasan
rikaigipa ong`enga.

Dhobanini

Watatgipa : Maina? Ua mamingkon ka`jaengama?

Nandina : Ua je kattarangko agana, uarangko angade ku`siktangchi parakna kratcha`e nika. Ua manderangna indake agane roenga, je raja Dhobani saksa cholon gri me`chikni depatchi bi`sasa ong`achimna aro Dhubrini raja ong`na krajachimna.

Dhobanini

Watatgipa : Ah –maiko ina? Ua indake innaba pa`ama? Indiba anga da`o maiko dakgen, angaba kraa gitan budepa ong`aha, ong`jaode anga uni skoko sottongsranggenchim uko sasti on`genchim.

Nandina : Ia katta mangmangna ka`onangode cholijawa. Indiba kattachian indaka namgija mandeko saja on`na man`ode nambata, dingtang dake sinjetade namani ong`jawa.

Dhobani

Watatgipa : Atcha, anga da`ode montriko grongekuna. Uni ja`man ku`monge jeko dakna nanga dakna man`gen. Peruni ku`sikchi singhoko mitakani! Iara chakchike jrip dongaianima?

(Ong`katanga)

Nandina : (An`tangna agana) Bah! Namaha, uamang sakgni jegrikgnok da`ode. Indiba Garorangni maming namgijani ong`jachina. Nokman`demechikba tom`tomean dongchina. Bilongen aiao inmana! Angaba saksa

cholon grigipa me`chikko oktangna
 nirokgipasan ong`a, buringni do`o
 gita skatang bile roenga; maming
 saloba songsarni gringo chipchanga
 man`kuja. Indiba ia silbegipa
 Nokman` demechikko nike angni
 gisik an`tangtang maina nom`bok-
 angaia? Chong`mot! Kratcha`ani aro
 sontolanian me`chik jatni mong-
 songgipa ganding chinding ong`a. Ia
 mongnal balgniko ia warioniko
 mainan aktetbamanachim, da`osa
 uko ma`sina man`enga. Uara,
 Dhaniram iachipaknan re`baenga.

(Dhaniram napbaa)

(Parake) Are, na`asa, namengakonba?

Dhaniram : Namengaba! Atcha angjong, na`a
 jakstemko bano donaha?

Nandina : Oe, nang`na aganna anga
 kratcha`engaha! Anga chanchia, na`a
 knajokode ka`osa nangaigen!

Dhaniram : Uara maidake? Maina? Maina
 ka`onanggen?

Nandina : De, indide knabo. Ia songjinmao
 Nandina minggipa saksa silbea
 me`chik donga; anga una bilongen
 ka`saa. Ua me`chiken jakstemko
 angni jakoniko ra`aha. Jakstem
 da`ode uni jakosajok.

Dhaniram : Che! Indaka gamchatbegipa bostuko
 cholon gri me`chikna on`malamare?
 Nang`ni taning bi`sani taning gitasan

ong`a. Che! Che! Una agreba na`ara indita bilsu chu`sokkujaonian indaka namgija me`chikrangminga roenga-ma?

Nandina : Nibo, na`a ka`onangjawa ine agana-chim, indide da`o maina ka`onang-enga?

Dhaniram : (An`tangna agana) Chong`mot; angara hangjang maina ka`onange mesokman`enga? (Parake) Oe, oe, oh anga bal`sa bal`ekengaba. Jeba ong`bo, na`a saksa bilongen taning gnanggipa bi`sa ong`a. Nama, nang`ni ia Nandinara bano dongenga, jong.

Nandina : Uni dongenggipa biapara, ia dewalini nalsao.

Dhaniram : (An`tangna agana) Me`chikni nokko sandie nikahaode una on`tisa tangka on`dapemangba jakstemko man`na jotton ka`na nanggen. Indakeba man`na amjaode dingtang budi dakna nanggen. (Parake) Ha....! Bano dongenga ine aganachim?

Nandina : Ia dewalini nalsao.

Dhaniram : Atcha, ua me`chikara nina nitoama?

Nandina : Oe, namsranggijade ong`ja. Mama-song, iachipak niatbo, raja Dhobanini watattaigipa mande baksa montri iachipaknan re`baenga.

Dhaniram : Nama kattakon gisik ra`ataha na a. Nang`na je kattarangko aganchina

gita anga aganachim uarangko
aganahakonba?

Nandina : Chong`mot, nang`ni kattarangko
anga maming saloba olgroke ra`na
man`ja.

Dhaniram : Nang`ni nama gunrang bang`bea,
uko anga ku`sikchi bon`e parakna
man`jawa, -- aganboda, nang`ni
ka`sagipa Nandina bano mancha
dongenga?

Nandina : Uni gimin na`a maina indita
dongsiksakenga? Salsade salsa
uming gronggrikatna man`gen,
gronggrikjokode ong`aigenkonba?
Anga da`o re`nakaha. (An`tangna
agana) Nina ia dalalni rasong kopalo
maiko see donsoenga.

(Ong`katanga)

Dhaniram : (An`tangna agana) Jakstemko
man`tajana kingking anga maming
gitan tom`tomna man`jawaha. Ua
jakstemni dam hajal chikking ong`a.
Uko indinari ramram watgalna
man`aigenma? Rajako badita gisikchi
nom`bokatesa iako man`achim, uko
gisik ra`jokode grapnasa skaia.
Angaba a`selo ga`akesa ua jakstemko
jakwatna nangao ga`akaha. Nina, ia
Nandinani dongenggipa nokko
sandie nikjokon pilakkon ma`sina
man`aigen. Dhaniramni jotton
ka`aniara indinari ong`aigenma?

(Jachingpa baksa Dhobani rajani
watattaigipa mande napbaa)

Jachingpa : lara, Dhaniramba ianon dongkuenga.
Hai tom`ram nokdringonan changsa
re`ange nistrangnaha.

Dhaniram : Montri, ian raja Dhobanini watattai-
gipa mandema?

Jachingpa : Oe, ong`a.

Dhobanini

Watatgipa : (Dhaniramchipak mikkange)
Mamasong, an`ching sakgnini
miksongaan apsan ong`a, indiba
an`ching sakgnini gisepo maming
saloba mikbugrikani aro jegrikani
ong`na nangja.

Dhaniram : Chong`mot, ong`na nangja.

Dhobanini

Watatgipa : Indiba mingsa katta nang`o sing`na
skengachim; ua kattara, na`a maina
rajako mitakbeenga; uara nang`ni
nama kam ong`engama?

Dhaniram : Indaka kattarangko nang`na sawa
aganjok?

Dhobanini

Watatgipa : Mamasong, balwa gride bolbijak
maming saloba moja.

Dhaniram : Indide na`ara angming jegriknasa
botengama?

Dhobanini

Watatgipa : Nang baksa jegrike angni mai lap?
Indiba na`a je kamna re`baa uako
ka`gija an`tangni rajakosa ong`ai

ong`jae bodnam ka`e dongenga; iara
nang`ni nama kam ong`engama?

Dhaniram : (Jachingpachipak) Montri, knajok?
Maiko agangen, na`a budepa
ong`aha, ong`jaode anga nang`ko
indinari watjawachim.

Dhobanini

Watatgipa : Maina? Mai dakgenchim na`a angko?
Bang`e seng`a dake mesoknabe.
Nang`na kenenga ine chanchinabe.

Jachingpa : Na`simang tom`tombo. Ong`ai ong`jai
indinari jegrikani maming dorkar
dongja. Na`simang sakgnian chingni
chatchisa ong`a - chingni chatchi
ong`e na`simang chingni noko
jegrike mesokani maming kraani
ong`jaenga.

Dhaniram : Ong`bebea chong`mot. Indiba
chanchie nibo, iano angni mai dos?
Biasa jegrikna botenga. Bini angko
maibarangko inode angaba jripjrip
knatime dongaina man`ja. Bini
kattani kride aganchakna nangao
ga`akaia. Bia angko domkina nangja.
Bini domkiana bame on`aina man`ja.

(Rikampa napbaa)

Rikampa : Iara mai ong`enga, mamasong?
Na`simangni gisepo indita maini
gimin jegrikenga? Na`simangara
miksonga chu`sokgijaan dakgriknasa
am`tokengjokma?

Dhobanini

Watatgipa : Ong`ja, indake ong`ja. Maina

dakgrikgen? Ua bang`a kattarangko ma`sija, uni giminsa una on`tisa ku`pattiengachim.

Rikampa : Mai ku`pattianiko on`aha, aganbo-ching? Na`a chanchiengama ua uni miksonganiko wate songtangchi re`angaichina ine ? Ha....! Ha....! Ha....!

Dhaniram : Ha....! Ha....! Ha....! Chong`mot, kattade indaken ong`enga.

Dhobanini

watatgipa : Oe, chong`mot! Angni chanchiaode indaken ong`na nanga. Mamasong, mandeni kratcha`a rasong sia bilongen chua gadangni ong`a. Indaka chonnika mikchepaniko champengna darangba ja`man-chakna nanga.

Rikampa : Ha....! Ha....! Ha....! Mamasong, na`a saksa bilongen seng`gipa mande ong`a! Na`a u`iachi Tatara Rabuga chong`mot. Atcha, knaman`enga, na`simangni a`songode bi`sa ba`gijagipa me`chikrang bang`bea ine. Indakode maidake songsar choliengjok?

Dhobanini

Watatgipa : Mande ra`na kragipa, banji me`chikko ra`e nokdang dakgipaba a`gilsako donga.

Rikampa : Ha....! Ha....! Nama, nama. (Dhaniramchiko niate) Oi mamasong, na`simangni a`songni gimin agan-boda knana!

Dhaniram : Chong`mot, chingni a`songni gimin aganani ango maming bil dongja. Bida budi donggipa mandeba a`songni gamjinrangko chane agane bon`atna man`jawa. Ua a`songo pringni ripamchian salgisakni askirang gita silbea; mikka gadila ning`o jegita stilrang bang`bea, uandake rajani rongdikrango hira muktararasa gapa. Una agreba, chingni rajade salgisakni jajong chong`motsa ong`a.

Dhobanini

Watatgipa : Oe, jajong gitan simteka dag gnanggipa marang donga.

Rikampa : Ha....! Ha....! Ha....!Na`ara maiko aganenga, mamasong?

Dhaniram : Chong`mot. Uni kattani bikpile anga maiko agangen? Do`po maming saloba salni teng`ako chakna man`ja. Maiba dake okkriani gimin walo ong`katoba ua maming saloba jajongchipakko nia dongja, teng`gipa bostuan uni mikronnade bisi gita ong`a.

Rikampa : Ha....! Ha....! Ha....! (Dhobanini watatgipachipak niate) Mai rokom mamasong da`ode? (Mittino doka dam`ani knatoriri gam`a) Iara mai da`obatai?

Jachingpa : Nokma, meeting ka`na re`baenga. Hai, an`ching da`o re`naha.

(Nitingipa napbaa)

Nitimgipa : (Jak chopjole) Bilakgipa, Kuntaghatoni mande saksa maiba songbadko ra`e re`baaha. Uni bimingko Jagbandhu minga. Na`a maiko ge`etna am`enga, ka`sapae ge`etbo.

Jachingpa : Mande? Kuntaghatoni? Atcha, indide uko soba nokdringona rimbabo; anga re`nakaha. Hai indide an`ching pilakan soba nokdringona changsa re`srangna.

(Pilakan ong`katanga)

(Nandina napbataia)

Nandina : (An`tangna agana) Da`ode angni miksonga chu`sokaha; ia songjinmao anga da`ode ruute donga kraani ong`jawaha. Uamang da`ode Nokman` demechikni gimin jegrikgnok dakgrikgnok. Ianoni anga re`angna nanggnok. Re`angnan nanggen oe, indiba Nokman` demechikna anga ka`sachakatmana. Indita sila aro sontola nomil banoba dongama? Anga buringo wa`al so`e donangengaha. Uamang ia wa`alchi kamchina – indiba Gitel, Nokman` demechikko name tom`tome rakkibo, ian angni nang`o bi`ani. Da`ode anga re`nakaha. Dhaniramna skangan Dumuryaona sokna nanggen.

(Ong`Katanga)

MESOKANI II

**Manas Chibimani Rikam, Nokmani bari
(Toromi Me`chik napbaa)**

Toromi
Me`chik

: (An`tangna agana) Aiao inmana! Anga
Balpakramo dongmitingo changsao
Mahadevni Mandiro tusina nanga-
chim; unon anga Dimbrini gimin
namgija jumangko nikachim. Ua
jumang gitan Dimbrini kosako
ong`na am`engahama? O Gitel, ia
pilakan nang`ni skao pangchaka.
Dimbrini rasong kopalo mai
dongsoenga, Gitel na`an ma`sia.
Dimbri jegita bimangchi sila,
uandake ka`tongchi bilongen
rinokgipa ong`a aro ka`donggipa gita
uni gisik mangraka. Ua ramram
mamingna kengijagipa nomil.
Nokmani demechik ong`nan
krachong`mota. Anga da`o raniko
am`angkuna.

(Ong`katanga)
(Dimbri napbaa)

Dimbri : (An`tangna agana) Nandinara bachi re`angjok? Ma do`o pil`e bile katjokma? Anga uko am`na iachi uachi mande wataha. Aiao inmana! Uara peleki changama? Angade mamingkon ma`sina man`jaengaha. O gisik! Maina indita dong-siksakenga? Walni jumangara basakoba mikhittalo chu`sokgenma? Ia me`chikara angko togiangahama? Togiangaha ine maidake agangen? (Chanchia gita dake) Angni ka`tongni kattarangko Nandinana aganara kraani ong`ahama? Gisikni kattarangko donnue donaba namade ong`ja. Jo`ongrang jegita balchombamiting pulko chikprue a`palona ong`katbaa, gisikba indaken ong`a. Haiwara ma`jong, ang`ma`gipa baksa iachipaknan re`baengaha katta agangrike. Haida uamang angni giminan agangrikbaenga. Angni kopal rasongo Gitel maikon see donsoenga, ukosa mamingkon aganna man`ja. Amamangni ianona sokbana skang anga ianoni re`angan nambatgenkon. Anga da`o git ring`gipa nokdringona re`angkuna.

(Ong`katanga)

(Me`gam Nongal baksa Toromi Me`chik napbaa)

Me`gam

Nongal : Maiko agana, abi? Na`a ia kattako Dimbrini ku`sikonikon knaama?

Toromi

Me`chik : Oe, chong`mot. Ua an`tangan agana.

Me`gam

Nongal : Aiao inmana!

Toromi

Me`chik : Rani, kratcha`an nomilni ka`tong nokdringo ganding chinding ong`a. Saobani ka`tongni kattako bikotani-ara altua kam ong`ja. Anga budi dakesa uni kattarangko bikotna man`aha, uko nang`na maiko agangen?

M`egam

Nongal : Uni giminsa ia bi`sani mikkang bimangko maibana chanchibee donga gita pangnan nikenga. Ua maikon gisiko chanchie dongsimenga mamingkon ma`sina man`jaenga.

Toromi

Me`chik : Rani, ia pilak kosakni skasa ong`a. Ua salmikkang pulko nikakonba; ia pul balgaoode salchipak mikkangesa balronga, indiba maina indake ong`a, uko darangba aganna man`ja.

Me`gam

Nongal : Salgra Saljongni teng`suana ua pul salnian nokkol ong`aha.

Toromi

Me`chik : Rani, gisikni mikronchi mande maiko nikna man`ja? (An`skita gita dake) Aiao mairongpile dingchike similbaenga, rani, niboching, ia

similbegipa dingchikpile balwa baksa balbaenga. Ia similani badia puloni re`baenga, uko an`ching nikna man`ja. Indiba an`ching gisiko chanchichipe ra`na man`a je, ia pul haida bilongen silgipa pul ong`na nanga. Ua similanian jripjrip an`chingna uko atchiatgipa pulni gimin parakenga. Rani, rasongni pulniba, ma`sibo, indaka niaman ong`a.

Me`gam

Nongal : Chong`mot, kakket ong`naba donga.

(Mittinoni doka dam`a)

Toromi

Me`chik : Nibo rani, Nokman` demechik gisiko maiko chanchia, uko ua da`oan parakaigen.

(Mittinoni knatobea gitko ring`a)

Toromi

Me`chik : Bah! Karirangni raja Balrorokari sokbajokode do`kuako saoba jrip dongatna man`genma? Ua an`tangni ka`tongni kusiko sal wal mikoachi buringrango parakna jotton ka`a. Janggin` Balrorokari sokjokode mande jatni ka`tongoba uagitan jripjrip dongaina man`ja.

M`egam

Nongal : Ua jeba ong`china. Abi, nang`ni kattako knae angni ka`tong bilongen kusichi paksataha; uko anga kattachi

parakna man`jawa. Indiba anga an`tangko bilongen rasong grigipa ine chanchiman`enga. Chanchi-achim saksa kamkam demechikna nama chawariko man`e on`na man`gen; indiba da`o nikengaha, ua pilakan indinarisa ong`aignok. (Grapa)

Toromi

Me`chik : Maina, Rani? Maina ong`gramaigen?

Me`gam

Nongal : Abi, na`a maiko chanchienga, Nokmara demechiktangko ua Dhobani rajana on`genma? Ua rajade A`chikrangko rikgalgipa, A`chikrang-ni bobilsa ong`a.

Toromi

Me`chik : Ong`ana mai ong`jok! Chio ripchenggipaan Sagalni nambatgipa muktako man`na amaiama? Indaka katta ong`na amja, rani? Demechik na`simangni, na`simang sana on`na ska, umingan bia ka`e on`na man`a; iani bidingo maming mikkang ja`manni katta ong`na nangja.

Me`gam

Nongal : (Rang`spee) Abi, chingara skatang dakna man`aiama. - Bah! Abi, iachipakko niatboching. (Mikkang-chipak ja`ku de`ange) Re`ba, ama rani, re`ba ----

(Dimbri napbataia)

Na`a da`al maina duk ong`enga gita
dongenga?

Dimbri : Bao! Maina duk ong`gen?

Me`gam

Nongal : lara mai! Na`a maina grapenga, rani?
(Dimbri Mamingko agangija ma`gipa-
ni gitoko gipake grapa)

Me`gam

Nongal : Che! Ama, che! Maina? Nang`na
maiko nanga, na`a indake duk
ong`enga?

Toromi

Me`chik : (An`tangna agana) Janggin`
Balrorokari ka`tongo sokjokode
indaken ong`ronga. Gisiko mik-
songani chu`sokjana kingking
maming saloba gisik-ka`tong
tom`tomja.

Me`gam

Nongal : Che! Che! Maina indake grapa, ama?
Na`a Nokman`demechik ong`a, na`a
indake gisik be`grue mesokna
nangja.

Dimbri : Ama, anga mai dosko dakmanjok,
na`simang angko na`simangoniko
chel`atna jotton ka`engara? (Grapa)

Me`gam

Nongal : Maiko ina? Nang`ko chel`atna jotton
ka`enga? Na`a mikkangchi nokdang
ba`ku dakjawama? Na`a pangnade
ma`ming-paaming dongkamna

man`jawa. Changsade dingtang
ong`na nangtelaigen.

Toromi

Me`chik : Indake ong`ja Dimbri, do`o
bi`sarangara pangnajolna bitiptango
dongaiama? Mandeba indaken
dal`ahaode ma`ani-paani noko
ka`saako wate dingtang nokdang
ba`ku dak`ngna nangao ga`aka.

Dimbri : Ma`jong, anga nang`na angni
ka`tongni kakket kattako aganenga,
anga segipakon ra`jawa. Angni
mikkango angni A`chik jatna dal`bea
kamko ka`ani daito donga. Jatko
jakgitel ong`atna jotton ka`na
nanggen. Anga jatna an`chi on`gen.

Toromi

Me`chik : Rani, Nokma iachipaknan re`baenga
aro un baksa saoba saobarang
re`bapaenga. Na`song ma`ningsa ia
biaponi jitangchengbo. Nokma
na`songko ia biapo nikeode namnik-
janaba donga.

Me`gam

Nongal : Ama, hai an`ching da`o re`naha
indide.

(Me`gam Nongal aro Dimbri
ong`katanga)

Toromi

Me`chik : (An`tangna agana) Anga chan-
chiachim, tusia-bamsia gri, cha`a-
ringa gri, gisik on`kange toposa

ka`ani - iarang songsarna ka`paka-
 niko jakgitel on ani ong`a ine. Indiba
 bao? Anga nokdang ba`ku dakgipa,
 songsarna ka`pakaoni chel`e
 dongeba, anga an`tangko jakgitel
 ine chanchinan man`jaenga. Uamang
 ma`ningsani kattarangko chanchie
 an`tangsa duk man`chaka. Indiba
 Dimbriara segipakon ra`jawa ine
 maina aganaha? O Gitel, ia mande
 jatni ka tongo na a je skani bitchilko
 ge`songaha, uko pike galani mandeni
 jako bil dongama? Skani bitchirang
 be`enni ja dilrango gipani gimin
 mande tom tom dongaina man`ja.

(Nokma Dejangpa napbaa)

Nokma : Abi, raniara ianon dongachimbamo?

Toromi

Me`chik : Oe, ua ianon dongachim; aganode ua
 da`oan re baaigen.

Nokma : Rani baksa angni dingtangmancha
 katta agangrikani donga. (Iachi
 uachi re`jingjange) Haida na`a
 knaenggnok, Dumuryani rajaba
 Dimbriko bia ka`genna ine mande
 watataha.

Toromi

Me`chik : Oe, knaade knaaha.

Nokma : (Rang`spee) Abi, ia pilak angni rasong
 kopalni gimin ong`engaha.

Toromi

Me`chik : Iana maina jajrengna nanga, Nokma?
 Indakede pilakchin ong`enga.

Nokma : Abi, na`ade bimchipe toposa ka`gipa ong`a; uni gimin ia a`songni manderangni cholon bewalrangko bang`akon ma`sijawa. Ia biani gimin badita gondogol ong`gen, uko agane bon`atna man`jawa.

(Me`gam Nongal napbataia)

Rani, nang`ni demechik Dimbrini bia namean matchotanggen ine angade ka`dongnan man`jaenga.

Me`gam

Nongal : Maiko agangen, Nokma. Mingsa kattani giminde anga nang`na aganna somoian man`jaenga.

Nokma : Uara mai katta? Aganboching rani?

Me`gam

Nongal : Katta nambeade ong`ja Nokma, indiba nang`na agannan nanggen.

Nokma : (Jagoka gita) Mai mancha ong`chongmota aganboching? Maia indita nangija ong`na man`a.

Me`gam

Nongal : Dimbride segipakon ra`jawana. Uni jatna kam ka`na nangani bang`beana. Segipa ra`ode jatna kam ka`na man`jawana, man`dikgenna. Angade ia bi`sani kattarangkode mamingkon ma`sina man`jaengaha.

Toromi

Me`chik : Oe, Nokma, ia bi`sa angni mikkangon segipa ra`jawa, jatna kam ka`na nanggen inesa rake aganaia.

Nokma : Bebema? Indide da`o mai dakgnok? Jeba ong`bo, Dimbriko name skibo, aganbo. Maming kattani gamchat-aniko ning`tue ra`gija segipa ra`jawa inario cholijawa. (Dongsiksaka gita ina) Oh Gitel, ia anga maiko knaaha?

Me`gam

Nongal : (Nokmani jakko rim`e) Nokma, na`a indita dongsiksaknabe. Gitel Tataara Rabugao pangchakbo, ua pilakkon naljokatgen. Uan pilakkon tom`tomatgen.

Nokma : Rani, na`a chanchie nibo. Dimbrini gimin Dhobani raja aro Kuntaghatni rajaba mande watataha. Uamangni giseponiko saksakoba kusi ong`atna man`jaode uamang indinari watai-jawa. Rani, nang`ni demechik Dimbriara paako kratcha`atgenma? Oh Gitel, anga mai papko dakmanjok, na`a angko janggiltikengara. Angni ka`sabegipa demechikba angko duk on`engaha. Angna da`o mai ong`gen? Angni ka`sabegipaonian angna mangkimaani sokbagen, iako anga jumangomangba chanchisona amja.

(Me`gam Nongal jripjrip grapa)

Toromi

Me`chik : Rani, na`a maiko dakenga? Maina grapenga?

Me`gam

Nongal : Abi, angni kopal rasongrang angko gualchipaha. A`gilsako duk chakna-san anga atchiaha. (Grapa)

Toromi

Me`chik : An`tangko nom`boke mesoknabe.
Gisikko rakatbo. Nokma ge`etode,
chinga da`o nokningchi re`naha.

Me`gam

Nongal : Nokma, angni Dimbrini iano mai dos,
aganboching? Uade da`oba nama
namja mamingkon ma`sikujaenga.
Nokma, uko manengnabe, anga
ma`gipa ong`e uko manengako
chakchikna man`jawa - mainaan ia
bi`sa anggita dake rasong grigipa
ma`gipani oko atchijok! (Grapa)

Nokma

: (Jakko rim`e) Rani, anga maikoba
inmannaba donga, angko kema
ka`bo. Anga maidakgipa mande
ong`pila! Anggita dake rasong grigipa
me`asa haida darangba dongja. Indita
ringtobegipa chukoba anga bisi
gitasa daknikman`aiaha. Hai rani,
da`o an`ching nokdringchi re`naha.
Mama Saljongba saliram salgiona
re`chakatangengaha. (Rang`spee) Oh
Saljong Salgra! Nang`na agre
a`gilsako mamingan tangja, indiba
nang`koba gadila pindape dimelatna
man`aiama? Na`aba iani gimin duk
ong`enga, mo?

(Pilakan ong`katanga)

(Dimbri napbataia)

Dimbri

: (Iachi uachi re`jingjange agana)
Skangni somoi aro da`oni somoi
bilongen dingtangaha! Salantian

janggi tangani salrang bilongen
rakbarikrikengaha! Che, anga
da`oba maina ianona indinari
re`bamanjok ? Anga mamingkon
namnikna man`jaengaha! (Rang`-
spee) Anga angni jatna ka`saa. Indiba
angni jat bilongen ong`sie brange
janggi tangbagiparang ong`a.
Tibetoni Bhutanona, Bhutanoni
Nepal, Sikkim aro bon`kamao West
Bengalni Maldaona sokbae iano
Matgrik Sangkaldip A`chik jatko
man`e cha`dilaha, rasong mikkim
gnangataha. Indiba ja`mano ua
Hindu toromko ra`e Hindu ong`aha.
Aryanrangni toromko ra`e Hindu
ong`ani ja`manan, je A`chikrang
Aryanrangni toromko ra`e Hindu
toromko ra`na jechakaha indiba ambi
atchuni manibagipa toromkon
maniangna krengangaha, raja
Sangkaldip uamangko bilongen
sinjetna aro saknaatna a`bacheng-
aha. Bang`batan raja Sangkaldipna
kene Aryan toromko ra`e Hindu
pil`angaha. Hindu toromko ra`na
jechakgipa A`chikrangko nokkol itna
ong`jaoba a`songoniko rikgalna
jotton ka`aha. Indiba chakchike
dongnuean janggi tangengachim.
Raja Sangkaldipni A`chik jatni
kosako sinjeta bilongbaroroaha.
Hindu ong`ani ja`man an`tangba
A`chik ku`siktangkon aganjaha aro

jean A`chik ku`sikko aganangkua ukon sasti on`aha, pattoko chipataiaha. Indake Hindu toromko ra`chakna jechakgipa A`chikrangko aro jattangni ku`sikko aganenggipa A`chikrangko rokomari dake sinjetmitingon Afghanistanoni Afrasaiaf minggipa saksa matgrik re`bae Sangkaldipni rikgipa Gaur A`songko bobil dingeeha. A`bachengode raja Sangkaldipan amachim. Indiba baditaba changrang dakgrikani ja`man Afrasaiafan amchotaha. Raja Sangkaldip Tirhut a`briona katange dongnue dongeachim. Afrasaiaf aro uni chansokgija sipairang uko Tirhutona rikange so`ote galaha. A`chikrang jattangni raja ong`oba jatangkon ong`ai ong`jai dake sinjetbeani gimin Sangkaldipna ia chango chakjaha. Ua A`chikskachiko maming dakchakaniko man`jaha. Indakesa Afrasaiaf uko altu-altu amaiaha. Unonin Gaur A`songni A`chikrang bilding bildang jebasi jejachi katna a`bachengaiaha. Gaur A`songoni katbae A`chikrang Koch Biharo dongeeha. Ia biapkon A`chik pagitchamrang "A`song Pattari Chiga Suunchi" ine mingbaaha. Uni ja`manba A`chikrang rokomari champengarangko man`oba re`aniko dontongjaha. Indake uamang "A`song Saora Chiga Timbora"-ona katbaaha.

Ia biapan Rongpur ong`a. Unoniba
 "A`song rake kenana, Chiga ringna
 pa`jana" ua a`songko wate katbataia-
 ha. Unoniba uamang "A`song
 Neng`gitu Chiga Neng`chibing"-ona
 katbaaha. Ia biapan Dhubri ong`a.
 Ia Dhubrio songdong a`chamitingon
 anga atchia ine agana. Dhubrio
 atchiani giminan angni bimingko
 Dhumbri ba Dimbri mingana.
 Dhubrio bang`a bilsirang dongna
 on`jani gimin da`o dongenggipa
 Manas Rikamona re`bae dongeaha.
 Da`o anga dal`aha. Uni gimin anga
 angni jatna kam ka`na nanggen.
 Angni jatko jokatna nanggen.

(Toromi Me`chik napbaa)

Toromi

Me`chik : Dimbri na`a iano saksan maiko
 dakenga? Nang`ko nang`ma da`sio-
 nin sandiengachim. Hai, re`bo hai!

Dimbri : Ma`jong, anga da`ode dal`aha
 bilsokaha. Anga chanchina changa-
 ha. Anga da`o ma`ni kuri ka`bako
 dongani somoi ong`jaha. Angni jatna
 miksongani bilongen bang`bea. Na`a
 angna ka`donganiko on`bo. Angna
 pattibo jedakode anga angni A`chik
 jatna dakchakangna man`gen.

Toromi

Me`chik : Na`a maiko inenga, Dimbri? Jatna
 chanchigiparang matgrik aro
 seng`gipa rakgiparang donga. Na`a

uamangko ga`bengbate jatna maiko
chanchigen?

Dimbri : (Toromi Me`chikchipak niate)
Ma`jong, na`a da`oba ianona banoni
re`bataijok?

Toromi
Me`chik : Maina! Re`bana nangjachimma?

Dimbri : (Iachi uachiko niwingwange)
Mairongpila! Ma`jong, anga mingsa
aiao inmangipa jumangko nika-
chim, uko knajokode na`a aiao
inmangen.

Toromi
Me`chik : Maia jumang, aganboching?

Dimbri : Badiaba mandir nokdringo mongnal
bibal balsani kosako anga asonge
dongmanenga. Indake asonge
dongmitingon saksa silbea me`chik
jako mongnal bibalko ra`e angni
mikkango chadengaha aro ua
chadengarian – “O angde, na`a angko
salam ka`bo, anga nang`ni ma`gipa
gitan ong`a” ine inaha.

Toromi
Me`chik : Uni ja`man?

Dimbri : Anga uko salam ka`aha. Uni ja`man
ua indake inaha -“Nibo, angde, je
nomil ia jelbegipa jatna an`tang
janggiko on`kanga, uni biming
maming saloba gimajawa. Uko
chasong chasongna ia jatni

manderang ma`ringanggen, gisik ra`anggen. Angaba ia jatonin ong`a. Angni bimingko Giting minga. Na`a jatangni namgnina an`tangko on`kangode, nang`ni biming ia jatoni maming saloba gimajawa, chasong chasongnan nangni bimingko mingsing-minggamanggen. Na`a jatangna janggi on`kangnan atchiaha. Ian nama somoi, ka`angbo”.

Toromi

Me`chik : Uni ja`man? Uni ja`man maiko inaha?

Dimbri : Uh! Ma`jong, na`a angko rim`bo. Angni be`en gimik an`tangtang an`jrimengaha.

Toromi

Me`chik : (Dimbriko rim`e) Hai, an`ching ianoni nokdringchi re`naha. Iano donge maming lap dongja. Nibo, angde, angna je kattarangko na`a aganaha, ua kattarangko na`a maming saloba darangnaba agannabe.

(Salgisako ka`sroka doka dam`ani)

Dimbri : Ah! Badita knatoa, ua knabo, ma`jong!

Toromi

Me`chik : Bao! Angade mamingko knaan knajaenga.

Dimbri : Bebema, ma`jong? Knajaengama, badita knatobea ku`rang. Gisik ka`tong ka`suang dakpila.

Toromi

Me`chik : Hai, angde, iano donge an`chingni
maming lap ong`jaengaha. Na`a
ianoni ta`rake re`na jotton ka`bo. Sal
somoï namja.

(Sakgnian ong`katanga)

MESOKANI III

**Manas Chibimani rikam, A`chik Song
[Rikampa aro baditaba sak
nirokgiparang napbaa]**

Rikampa : Rakman! ----

Skanggipa

Nirokgipa : (Jak chopjole) Maina, matgrik,
ge`etbo.

Rikampa : Nibo, na`simang pilakan bilongen
simsake dongbo. Da`al darangkoba ia
songo napna on`nabe.

Skanggipa

Nirokgipa : Nang`ni ge`eta gitan ong`china.
Nang`ni ge`etana agre, sawa
ka`donggen ia songo napna.

Rikampa : Aro nibo, Dhobani rajani mande
watatgiparangni jamdapo maiba dake
maiba gondogolrangko knana
man`ode bikan angna kobor on`bo.

Skanggipa

Nirokgipa : Nang`ni ge`eta gitan ong`china.

Rikampa : (Iachi uachi nie an`tangna agana) Ia Dhubrioni re`bagipa peruara bilongen chalakkigipa ong`a. Indita mikbokrakgipa, gipinna namgijako chanchiaigipa dakait saoba dongama? Indiba Bijnini manderang baksa bakbakan nangrimani, meliani a`selko anga mamingkon ma`sina man`jaha. (Chanchia gita dake) Uamangni nangrim-meliani maiba ning`tua a`sel dongchongmotna nanga. Ong`jaode indake bik dake uamangni nangrimani maming ja`pangkon angade nikjaenga.

(Ong`katanga)

(Mittinoni dakgrikani doka dam`a)

Gnigipa

Nirokgipa : Namengama, Rakman ---

Skanggipa

Nirokgipa : Mai, mai ong`a?

Gnigipa

Nirokgipa : Nang`o anga mingsa kattako sing`na skenga; nang`kode knaman`enga na`a pangnan an`chingni matgrik Rikampa baksasa dongpaengana; Nokmani songsarni gimin na`a jegita aganna changgen, ma`sia, indake darangba ma`sijawa.

Skanggipa

Nirokgipa : Oe, on`ti on`tide u`iaan. Indide maiko sing`na am`enga, aganboching knana.

Gnigipa

Nirokgipa : Nibo, angade knaachim, Nokma baksa Dhobani raja songgigrikaha ine, indiba uamang jamdap taripile maina dongenga; iani ja`pang chong`motara mai?

Skanggipa

Nirokgipe : Iani gimin na`a mamingkoba knakujaengama?

Gnigipa

Nirokgipa : Ihing, knakuja!

Gittamgipa

Nirokgipa : Bao? Chingade iani gimin mamingkon knakujaenga.

Skanggipa

Nirokgipa : Dhubrini raja Dhobani aro Kuntaghatni raja, sakgnian an`chingni Nokman` demechikko bia ka`nasa mande watatanaba.

Gittamgipa

Nirokgipa : Oe, ukode ma`sia. Indiba Dhobani raja maina iano jak on`pana nanga?

Skanggipa

Nirokgipa : Indiba an`chingni Nokman` demechik Dimbride segipakon ra`jawa ine ku`mikchetahana. Uni A`chik jatna kam ka`na nanggni bang`bea inesa inaiana. Ian Nokma baksa bobil ong`ani a`sel ong`engaha.

Gnigipa

Nirokgipa : Angade mingsa kattani gimin

mamingkon ma`sina man`jaenga,
Dhobani rajaara uni watatgipa mande
baksa maina indita sipairangko
watatpana nangjok?

Skanggipa

Nirokgipa : Ha....! Ha....! Na`a iani ortoko ma`sina
man`jaenga? Ugita dake kangal
gilamgipa raja darangba dongja. Uade
maiba go`logol ong`akon am`enga.
Indake gondogol ong`ao pa`sikean
an`tangni miksongako chu`sokatna
dongtime donggipa ong`enga. Ua uni
gilamgipa jolonggako gapatnasa chol
am`enga.

Gnigipa

Nirokgipa : Ong`ade ong`aan. Indiba an`chingni
Nokmaara maiko dakna mang-
songenga?

Skanggipa

Nirokgipa : Maiko mangsonggen? Demetukan
segipakon ra`jawa inaiode maiko
dakgen. Nokma mamingko daknaan
bilongen kangdikbeengaha.

Gittamgipa

Nirokgipa : Indake ong`ode, Dhobani rajara
jripjrip dongaigen ine chan-
chiengama ?

Skanggipa

Nirokgipa Agannade man`ja. Knaenga, rajade
indita dakgrikna gisik nanggipade
ong`ja. Indiba indita kratcha`aniko
chakchikna man`gen ua?

Gittamgipa

Nirokgipa : Niatbo, iachipak saobarang sakgni re`baenga.

Skanggipa : Pilakan simsaksobo, montri gita daknikman`enga.

(Jachingpa aro Dhaniram napbaa)

Jachingpa : Rakman ---

Skanggipa

Nirokgipa : (Jak chopjole) Ge`etbo, matgrik.

Jachingpa : Pilakan namtokengakonba?

Skanggipa

Nirokgipa : Oe, namtokenga.

Jachingpa : Atcha. (Dhaniramchipak) Mamasong, on`tisa iachipak re`baboching.

Dhaniram : Montri, ia kamara namahama?

Jachingpa : Oe, uko agannabea. Nokma badita gisiko duk man`aha uko na`an chanchie nibo. Indiba uaba maiko dakgen? Maming cholan dongja.

Dhaniram : Oe, ia katta chong`mot ong`aan. Indiba angnasa namjajok! Anga mainan na`simangni a`songona re`bamanjok, anga an`tangan ma`sina man`ja.

Jachingpa : Maina, mai ong`aha?

Dhaniram : Mai ong`aha da`obatai? Nibo, angni je dongachim, ua pilakkon ua dakaitrang ra`sektokaha. Una agreba Kuntaghat rajani mandechi bilongen chonnikako man`aha – uko na`aba ma`sia, una agreba –

Jachingpa : Mamasong, je ong`na nanga, ua ong`angaha. Ua ong`anggimin kattarangko gisikona ra`banabea. Da`o ka`sapae ia jakstemko ra`chakpabo. Nokma iako nang`na on`china on`ataha.

Dhaniram : Mittela, rajako bilongen mittela. (Jakstemko ra`chaka)

Jachingpa : Mamasong, na`a saksa bilongen chalakkigipa mande ong`a. Uni gimin nang`na bang`a kattarangko aganna nangja. Na`a na`simangni rajako iani bidingo tom`tomchina ku`pattipabo. Ia kattarangna ka`tongo saknaa man`e somoi re`atani ong`ja. (Chanchia gita dake) Nibo, na`a ia kamko ka`na man`ode, unode Nokma nang`na chu`onga gitan kusi ong`ataniko dakgen.

Dhaniram : Chong`mot. Anga jotton ka`aniko dontongjawa. Uaba kosakom skasa ong`a.

Jachingpa : Anga angni manderangna kobor on`ataha. Nang`ni ramao maming champengani ong`jawa.

Dhaniram : Indide anga da`o re`naha.

Jachingpa : De indide, re`angbo.

(Ong`katanga)

Dhaniram : (An`tangna agana) Nina, jakstem mai rokom mancha? (Nie) Bah! Ia bilongen gamchatbegipa muni ong`a. Iani dam haida laknaba batgen!

Ha....! Ha....! Ha....! Dhaniramni rasong kopal! A`mangko dangtapoba sona pil`aia. Ha....! Ha....! Ha....! Je mandena Isol budi on`a, una ua pilakkon on`a. (Chanchia gita dake) Je kamna miksonge angko watatachim, ua chu`sokjani gimin raja kusi ong`jaode, ong`jachina; nangode, uni a`songko wate gipin biapchi re`ange songdongegen. Una agre mai! Anga da`ode gamjinna kangal ong`jaha. Ha....! Ha....! Budi dongani giminan Dhaniram da`o saksa man`e cha`gipa ong`aha! Indiba, ia mingsa champenganiko anga niksoenga, Taposina ka`dong-aniko watsrangna nanggen. Je matchokko am`e indita sal burin burin roramaha, uko da`o man`man-ani ja`man maidake wate donanggen. (Chanchia gita dake) Maina? Wate maina re`angjawa, angara gipin me`chikko man`na amjawama? Badita manderang silsila nomil-rangko an`tangna malataha, angara saksa nomilni ka`tongkoba cha`una man`jawama? Me`chikrangni bil-grianira -- saobarang nang`kode silbee nitobee nika injokode, ua me`chikni gisik nom`jolangaijok. Ha....! Ha....! Ha....! Nina, maiko dakna man`a.

(Ong`katanga)

Skanggipa

Nirokgipa : (Mikkangchipak re`bae) Oe, na`simang saoba ia mandeko u`iama?

Gnigipa

Nirokgipa : Maina u`ijawa? Ua Dhobani rajani watatgipa mande ong`a. Walsa ua angko indita kosto on`achim, uko anga nang`na maiko agangen!

Gittamgipa

Nirokgipa : Uara maidake?

Gnigipa

Nirokgipa : Anga boksiska mikboke Nandina minggipa me`chikko am`na un baksa salsao ong`katangachim. Walgimik uming re`pae neng`beaha, indiba maming kam ong`jaha. Pringo nokchi re`angna am`osa ua angna gong`bonga danggako on`e "iachi na`a mittai cha`bo" inaha. Ua gong`bonga danggako anga ra`nan sijjachim. Ha....! Ha....! Ha....!

Skanggipa

Nirokgipa : Ha....! Ha....! Kamni kri bite! (Salgichipak nigitdoe) Uh: wal seng`aha, pring ong`aha.

(Mittinoni Knatoriri git)

Gittamgipa

Nirokgipa : Ua knajok? Hai, an`ching da`o re`naha.

(Mittinoni dakgrikani doka dam`a)

Skanggipa

Nirokgipa : Hai - hai - . Ua niatbo. Da`obatai badiaba dolsa re`baengaha.

(Pilakan ong`Katanga)

DAKMESOKA IV

MESOKANI I

**Bijnini Raja Bijit Narayanni nokdring,
(Koch Biharni mande re`baa)**

Bijit

Narayan : Montri, Koch Bihar rajani watatgipa
mandeko nokdringona rimbabo.
Uming bang`a kattarangni gimin
ku`mongna nangani donga.

Balendra

Narayan : Nang`ni ge`eta gitan ong`china.
Indide anga uko rime ra`aikuna.

(Ong`atanga)

Bijit

Narayan : (An`tangna agana) Ia Manas rikamo
re`bae dongenggipa Garorangan
mikkangchi angna bilongen kengnini
ong`enga. Iamangko ia biaponiko
rikgalna nanggen. Budidake mangba
rikgalna man`na nanggen. Ia jatrang
bilongen ka`donggipa matgrikrang
ong`a. Da`oan uamang bilgrikuenga.
Ja`mande iamangko rikgalna

man`java. Uni gimin –

(Balendra aro Koch Bihar rajani
watatgipa mande napbaa)

Balendra : Raja, ian Raghu Dev, Koch Bihar
rajani watatgipa mande.

Raghu Dev: Salam raja, anga angni rajani paloba
nang`na uni Salamko on`enga
ka`sapae ra`chakpabo.

Bijit

Narayan : Mai songbad? Mai songbadko Koch
Biharoniko ra`baaha? Aganbo.

Raghu Dev: Raja, chingni raja nang`ming besa
kana skengana. Una agreba ua je
kamnaba nang`ming songgigrikna
aro ku`monggrikna inesa angko
watataha. Mongsongbate, gipin
a`songni bobilrang baksa dakgrikna
nangoba apsan nangrime warachak-
na inesa ku`mongna angko watataha.

Balendra : Raja, a`gilsako janggi tangnade
maming saloba saksande tangna
amja; mande mandeska baksa
nangrime, raja rajaska baksa
ku`monge cholijaode, besa kajaode
da`ororode a`gilsako indin cholina
man`ja. Uni gimin, Koch Bihar rajani
skagitan nangrime ku`monge, saksa
sakgipinna dakchakgrikna song-
gigrikan nambatgen.

Raghu Dev: (Koch Bihar rajani on`atgipa chittiko
on`e) Raja, iakai chingni rajani

nang`na on`atgipa chitti.

Bijit

Narayan : (Chittiko ra`chake aro poraie)
Chong`mot, Koch Bihar rajani
nokdang baksa Bijni rajani
nokdangni manderang baksa chengo
chengonian melia nangrima dong-
chongmota. Uni gimin, iarangni
bidingo ning`tue chanchigrimna
nanggen.

Raghu De : Chong`mot raja, chingni raja nang`ni
dakchakaniko nangnikenga. Uni
gimin, ta`raken nang`ni ku`wataniko
nangenga.

Balendra : Raja, iani bidingo mamingko
chanchie dongani somoi dongjaha.
Nama kamnade maming saloba
somoiko bakroc ra`a kraani ong`ja.
An`chingni mikkango chanchina
nangani kattarang bang`bea. Ua
niatbo, Manas rikamo re`bae
songdongenggipa Garorangko.
Salsalna bate bate uamang
bilakbarorobaengaha. Badiaba salode
uamang an`chingnan bilpakhang-
jokode an`chingkon bobil dingaigen.
Inaminga ia jatrangde bilongen
ka`donggipa, kengijagipa aro
bangijagiparangsa ong`a.

Bijit

Narayan : Chong`mot, montri, na`a angni gisiko
chanchie dongenggipa kattarangkon
aganaha. Angaba ia Garorangnan

kenchakenga. Maina, iamangni re`a doarang bilongen kengnini ong`enga. Da`o uamang bang`e ga`chatna man`kujamitingon iamangko Manas rikamoniko rikgalna man`na nang-gen. Uamang Gaur A`songonisa iano re`bae dongenga.

Raghu Dev: Raja, nangode iani bidingo chingaba nang`ko dakchakna man`gen. Tangka paisachi ong`ja maina mandechimangba dakchakatna man`aigen.

Bijit

Narayan : Indiba ia Garorangko indinari ramram dake chanchie ra`aio choli-jawa. Iamang Gaur ma`chongni bilak wa`sagipa jatrang ong`a. Da`oba uamangni ma`kringrang Gaur A`songo dongkuenga. Da`oba Gaur A`songni raja jatangna chakainaba donga. Gaur A`song bilongen mingsinggipa aro bilakgipa A`song ong`achim.

Raghu Dev: Raja, Manas chirikamo dongenggipa ia Garorang Gaur A`songonian katbagipa ong`oba, Gaur A`songni raja baksa nangrimna man`jaesa uamang katbaaha.

Balendra : Raja, knaa gitade, Gaur A`songni rajade Hindu toromko ra`aha aro iamangara Rajani ra`gipa toromko ra`na jechakani giminsa iamangkode Gauroniko rikgalataha. Indakesa

iamangde brange katbrange ia
biapona re`bae dongenga. Gaur
A`songoni katbae Koch Biharo, Koch
Biharoni Rangamationa, Ranga-
mationi Dhubriona aro Dhubrini raja
Dhobaniba iamangko bang`a bilsi
Dhubrio songdonga`chana on`jaha.
Uni giminsa iamang da`o Manas
rikamo re`bae songdongenga. Angni
chanchia gitade, Gaurni rajade ia
Garorangna chakjawaha.

Bijit

Narayan : Na`a Garorangni gimin kakketkon
aganengama, montri? Indiba mik-
kang ki`sang chanchie, kobor ra`e
nichengbo. Kan`churiko am`e chipu
baksa chagronga gita ong`jachina.
Uamangna chakgipa ka`sachakgipa
badiaba rajarang dongama dongja
uarangko kobor ra`chengbo.

Raghu Dev: Angni ma`sia gitade, Gaur A`songni
rajade iamangna maming saloba
dakchakjawa. Maina, skang bilakgipa
raja Sangkaldipkode Mussalman
raja, Afrasaiaf Tirhutona rikange
so`ote galaha. Uni ja`man raja
ong`giparangde indita bilakjaha
mingsingjaha. Uni gimin, ua
rajanade maming kenani dongja.
Indiba Dumurya, Kuntaghat aro
Dhobani rajamang Garorangna
chakode uasa kenani ong`gen.

Bijit

Narayan : Chong`mot! Indide iarangni gimin

sriksrik kobor ra`chengna nanggen.
Montri, da`oan iarangni bidingo
kobor ra`na gita sriksrik mande
watatbo. Pilak kattarangni gimin
talchengani ja`mansa ia kamko ka`na
nanggen.

Balendra : Nang`ni ge`eta gitan ong`china.
Indide raja anga da`o re`naha.

(Ong`atanga)

Bijit

Narayan : (Raghu Devko miksonge) Na`simang-
ni raja bilongen namgipa ong`a.
Chong`motde, Koch Biharni rajani
ma`kring baksa chingni ambi
atchurangba apsananchim. Chinga
apsan ambi-atchuni deritchu-
su`ritchurang ong`a. Jeba ong`bo,
na`a re`baahani gimin namen
namaha aro bilongen kusi ong`a. Hai
an`ching da`o Nokdringona re`naha.

Raghu Dev: Hai indide.

(Sakgnian ong`katanga)

MESOKANI II

Dhubri, Rajani Nok (Raja Dhobani aro uni Montri)

Raja : Aganboching Montri? Ia songbadko nang`na sawa on`angaha?

Montri : Raja, Dhaniram haida knal ong`jaoba sotnio, pringon sokbagen. Uni ku`siko na`a iarangni gimin knajokode bebera`na man`aigen.

Raja : Mai apot. Angara nang`ni kattako bebera`jaengama? Anga indakesan sing`engachim, ia kattarangko nang`na sawa aganangaha, na`a sachiko knarikaha.

Montri : Raja, angnian saksa nirikkigipa sipaini ku`sikoniko knana man`aha. Ua bilongen bebegipa aro bebera`na kragipa saksa kakketgipa sipai ong`a.

Raja : Atcha, indide Nokma Dejangpara

angko namrenge demechiktangko ua
Kuntaghatni rajanasa on`na
am`engahama? Angko indake
chonnikengama uara?

Montri : Oe, knana man`enga, Nokma
Dejangpa nang`ko bilongen nam-
nikbea aro mandera`a; indiba
maiba a`selni giminsa ua nang`na
demechiktangko ku`watna man`jaha-
na. Raja, anga skangan ia pilak
kattarangni gimin nang`na agana-
chim; indiba angni rasong kopalan
namja, angni kattarangko kna-
chakgija na`a Dhaniramni
ku`pattiakosan knachakaiaha.

Raja : Ah! Ua batanggimin kattarangni
bidingo sintie mai lap?

Montri : Oe, maming lapde dongja. Indiba
chanchie nibo, Dhaniraman ia pilak
a`selrangni ja`ting ong`a! Ua
an`tangni gisiko miksonganiko
chu`sokatna a`songni rasong
mikkimkoba palna man`aigen.

Raja : Maidake? Maidake? Uara mai oniako
dakaha!

Montri : Oe, raja, anga nang`na maiko
agangen? Dhaniramni cholon
bewalni giminde na`a bang`akon
ma`sija.

Raja : Maina? Mai ong`a, aganboching.

Montri : Oe, raja, ia pilak kattarangko nang`ni

mikkango aganna kraani ong`nik-
jaenga. Indiba ---

Raja : Maina? Dhaniramni iano mai onia
ong`a?

Montri : Raja, Nokmani demechikni bimangni
noksako nang`na ua maina re`bae
mesokachim, uni miksonganiko na`a
da`oba on`tisaba ma`sikujaengama?

Raja : Bao, ma`sija! Maini gimin, aganbo-
ching knana?

Montri : Nokman` demechik Dimbrina
chawari nianio maiba dake gondogol
ong`ate an`tangni miksonganiko
chu`sokatanian uni mangsongani-
chim; ian uni taridragipa a`sel ong`a.
Iana agre mai dingtang a`sel ong`na
man`a? Raja, ugita dake an`tangna-
san chanchiaigipa mande saoba
a`gilsako gnigipa dongama?

Raja : Ong`ankon? Uni giminan ua iani
bidingo bilongen gisik nangbee
mesokachim. Anga uno ma`sina
man`jachim. Atcha, ua re`bapilku-
china. Da`o iani bidingo maidako
namgen, aganboching!

Montri : Oe, angni chanchia gitade iani
bidingo mamingko chanchiangjaon
nambatgen.

Raja : (Ka`onanga gnang) Maiko agana,
Montri? Nang`ni sko tik ong`eng-
akonba, paglade ong`kujaengakon-
ba? Indake chonnikaniko saoba
banoba chakchikna man`genma?

- Maina, angniara gamjin dongjama?
- Sipai kotokrang dongjama? Aganbo dongjama?

Montri : Chong`mot, Susime aro Rokkimeni pattiako man`gipa nokdango maina dila?

Raja : Indide angko maina iani bidingo chanchiangjaon nambatgen ine aganenga? Rasong mikkimna bate gamjin, ma janggi gamchatbata? Che! Na`a indaka kattarangko ku`sikona ra`banabeaha! Nibo, pilak sipai kotokni dal`gipana na`a da`oan chitti watatbo; uamang chittiko man`a bakan sipairang baksa ianona sokbatokchina. Aro nibo -

Montri : Ge`etbo raja -

Raja : Na`a minisalo sani gimin angna aganengachim, anga uko gualaha. Da`obatai aganboching angna.

Mantri : Oe, ua Nokma Dejangpani depante ong`a. Indiba saoba saobarang ua uni chong`motgipa depante ong`ja ine agana.

Raja : Jeba ong`bo, toromni gita apsan ong`gipa ong`ode uko kema ka`na man`gen; ong`jaode man`jawa.

Montri : Raja, da`oni chasong gitalode toromni gita saoba kakket bichalko man`na amama? Bilakbatgipaan chegipa aro kakketgipa ong`aia.

Raja : Nibo, montri, na`a ta`rake re`ange

chitti seatgalgalbo. Nokma Dejangpa
indake angko chonnikna nangama?
Nina ua maidake Manas rikamo
songdonga.

Montri : Raja –

Raja : (Chakate) Katta agane somoi nosto
ka`nabehe. Re`angbo –

Montri : Raja, anga da`ode budepa ong`aha.
Iano dongean anga mandeba
ong`aha. Nang`ni pagipade angko –

Raja : Ah! Mai ong`gija nanggija katta-
rangko aganbaenga; montri, angara
nang`ko ma`sijama? Na`a an`tangni
gimin maiko aganbaenga?

Montri : Indake ong`ja, raja; indiba angni
ku`pattiachi an`chi-pari naaniko gitik
gitak jako ra`a kraani ong`jawa.

Raja : Montri, mandeni janggi jringjrotna
tangbanggipa ong`ja, indiba namgija
biming chasong chasongonan
donganggan. Anga jodisa angko
chonnikarangko chakchikean dong-
aia, indide a`gilsakni manderang
angko ka`pong kenkrok ine chasong
chasongnan inanggan, bodnam
ka`anggan. Uni gimin, gamjin
bon`china, janggiba sichina, uaba
namkugen; indiba mikkangchi
darangba angko bobilna kengipa
rajasa ine inangjachina. Che! Che!
Angni indake bodnam ong`ana bate
siaan nambatsranggen. Da`o na`a
re`angbo.

Montri : (Rang`spee) Nang`ni ge`eta gitan
ong`china! (An`tangna agana) Rasong
kopalo sea dongsogipako saoba
bikpilatna man`ama? Che! Ia pilak
ong`arangni ja`tingan ua denggugipa
Dhaniraman ong`a!

(Ong`katanga)

Raja : (An`tangna agana) Ian da`oba ge`sa
Mahabharatao dakgrika gitan
dakgrikani ong`nasiengaha. Indita sal
tom`tomean dongengachim; da`o
on`tisa kam ka`e neng`skime nina.
Mil`amko jakkalgija donaiaba
ka`pongrangni kamsa ong`a aro
mil`amko maramsa cha`aigen.
(Chanchia gita dake) Jeba ong`bo,
Dhaniramko ia changode sasti
on`nan nanggen. Anga badita
namgija kragija kamrangko ka`aha,
pilakkon ia denggu Dhaniramni
budichian ka`na nangaha. Indake
namgijako ka`arangni bidingo uan
angni skigipa ong`aha. Ia dengguni
indaka budi, nina, ia chango mai
ong`a?

(Ong`katanga)

MESOKANI III

Dhubri, Taposini dongram nok (Taposi aro Nandina napbaa)

Taposi : Bah! Nang`ni budi bilongen srambea.
Jeba ong`bo, na`a maming a`selko
chagronggijaan re`bapilna man`ahani
gimin namen namaha.

Nandina : (Ka`dinge) Anga nang`na tol`jaenga.
Anga Manas rikamona re`ange mai
maiko dakbaaha, uarangko gisik
ra`jokode ka`dingnasa skaia. Ha....!
Ha....! Ha....!

Taposi : Bebeanma? Aiao inmanpila!
Dhaniramara nang`ko on`tisaba
u`ina man`jama?

Nandina : Ma`sina man`ode ua angna ia
jakstemko on`genchimma?

Taposi : Nama. Atcha na`a gipinrangna
an`tangko maidake parakjok?

Nandina : Maina? Dhubrini mandena an`tang-

ko Kuntaghatni ine aro Manas rikamni mandena Dumuryani mande ineara. Aro je biapo mande u`ia donga ine nika, ua biapchi anga re`angan re`angsrangjachim.

Taposi : Bah! Nang`ni budiko mittelgija dongna man`jaha, ripeng. Atcha, aganboch`ig, Nokman` demechik Dimbriara silchongmotbebeama?

Nandina : Chong`mot, silchongmotbebea. Uni silaniko sing`nabea. Anga chan-chiman`a, ugita dake sila me`chik haida a`gilsako dongama dongjama. (Rang`spea gnang agana)

Taposi : Mai ong`jok? Maina duk ong`a gita dake dongenga? Uara indakpile nang`ni gisikko salopahama?

Nandina : Nang`na maiko agangen, ripeng? Nokman` demechik Dimbrini kattako gisik ra`jokon, gisik ka`suang dakatman`aia. Uni mikkangko saoba changsa nikahaode; maming saloba uko gualna man`jawa.

Taposi : Maiko agana? Uara inditan silbebeama? Aiao inmana! Hai an`ching iano dikdiksa asongna. Indiba na`a Nokman` demechikni gimin angna name tale aganboching, knana.

- Nandina : Maina? Uni gimin knae nang`ni mai lap ong`gen?
- Taposi : Lap ong`ja. Indiba nang`ni ku`siko uni gimin knae anga uko Manas rikamona re`ange changsa niena skengaha.
- Nandina : Maiko agangen, ripeng. Nokman demechik Dimbriko jean nikkuja, ua uni silaniko maming saloba bebera`na man`jawa. Uni silaniko nikipasan aganna man`gen, a`gilsa-ko indake silako Isol tariama? Ua kattarang jeba ong`china, atcha aganboching, rajara badita sal ong`engaha nang`ona re`bagija.
- Taposi : (Rang`spea gnang) Ua kattarangko maiko sing`enga; da`asal salgittam ong`engaha uni re`bagija.
- Nandina : Bebe? Indide ua Dhaniramni re`bapilaonian nang`ona re`baku-jaenga, mo? Haida Dhaniramchiko knae bilongen ka`onangenggnok. Anga uko indake skibaaha, ua`haida chasongoba da`ode saobani dalali ka`jawaha. Ha....! Ha....! Ha....!
- Taposi : Ha....! Ha....! Ha....! Anga chanchija ua ka`tongoni bodolgen ine.
- Nandina : Nibo, ripeng, raja haida da`alde nang`ona re`bagen, re`banaba donga.
- Taposi : Beben, ua niatbo, raja iachipaknan re`babebeenga.

Nandina : Chong`mot, raja re`babebeengaha.
Name mande ra`sobo. Anga da`o
re`nakaha. Indita salni ja`man da`alsa
Dhaniramni skoo te`brong gitakgnok.

(Ong`katanga)

(Raja Dhobani napbaa)

Raja : (An`tangna agana) Da`asal salgittam
ong`aha ia biapona re`bagija.
Re`bagenba maidake? Anga rang`sit-
nan somoi man`gija gita ong`engaha.
Ia salgittamni gisepo hajal sotsku
sipairang dingtang dingtang
biaprangoni re`bae tom`dakeaha.
Da`oba re`bagipa re`bakuenga.
Dejangpa angko chonnika. Nina
da`o uko sawa dakchaka. Ian
dakgrikani bakra ong`gen. Indiba,
Taposiara bachi? (Parake) Saoba
knajokma, Balrorokari sokbajoko
do`rongni mikogija jrip dongaiako?
(Sandia gita dake) Iara ka`sara, na`a
indita duk ong`bea gita maina jrip
mittip asonge dongenga? Salgni
salgittam re`bajanan na`a angko
ka`onangbeengama? (Uni sambao
asonge) Nibo, ka`sara, na`a chan-
chinabe anga sikmanchaesa
nang`ona re`bajachim ine. Aiao
inmana! Angming katta agangrikode
nang`ni maiba namgijani ong`gen-
ma? Maiba kattarangko aganbo. Jrip
mittip dongaiode maidake choligen?
Na`a angming kattaan aganna

sikjaengode anga re`angpilaignok.
Kam bang`beoba nang`ko gisik ra`esa
anga nang`ona re`baachim, indiba
na`a jripjrip dongaiode anga maiko
dakgen; anga ianoni re`angan
nambata.

Taposi : Re`angboda, sawa nang`ko cham-
pengenga?

Raja : Mai ong`jok? Anga mai dosko dakjok,
na`a da`al angni kosako ka`sanningija
dake katta aganengara.

Taposi : Maiko ina, raja? Na`ara raja, pilakan
nang`ni skagitan asonga-chadenga
dakaigen. Angara saksa -

Raja : Anga ma`sina man`engaha, na`a
angni kosako bilongen ka`onan-
gengaha. Che! Iara mai? Na`a da`oba
maina jrip dongenga? Je mande
nang`na chanchigija dongna
man`jaenga, uni kosako indita
ka`onangara kraani ong`ama?
(Mittinoni doka dam`a) Bah: indita
knatobea doka dam`aniko knaeba
nang`ni ka`tongni ka`onangani
gimangaengama?

Mittinoni Git

Gisikchi u`ina jotton ka`bo
Uni ka`chabokako rinokachi namatbo;
Ka`saachi dangtapbo.

Jean nang`na indita ka`paka
Una cha`chipila ka`tongko paraka

Una ka`saode, uko namnikode
Ka`saachi pindapbo. Gisikchi.....

Ka`tongo donga ka`saa ka`paka
Indiba ka`tongo gapa ka`chaboka
Ka`chabokaan silata, uko nitoata
Ka`sae malmokbo. Gisikchi ...

Raja : Ha....! Ha....! Ha....! Chong`mot! Nibo,
nang`ni ripengrangan angko name
ku`pattiengaha. Re`babo, anga
nang`ni ja`akon rim`e kema bi`gnok.
Na`a angni pilak dosrangko kema
ka`bo. (Taposini ja`ako rim`na daka)

Taposi : (Ta`rake) Maiko dakenga, raja?
Che! Che! Anga nang`ko bal`sa
bal`ekengachimba, na`a me`chikni
ka`tongni obostako ma`sina man`ama
man`ja inesa.

Raja : Bal`eka! Bal`ekaibo, indiba na`an
angni saenggipa ka`tongni namgipa
sam ong`a (Taposiko jaksamgnichi
gipaka). Na`a dongjaode angni
ka`tongni saa namjawachim. Na`an
angni sikdikdikgipa janggini do`kua,
ka`tongni sul aro similgipa bibal
ong`a.

Taposi : An`ching jringjirotna indaken dongna
man`ode, anga nang`ni jakpengo
tusie sina skenga.

(Nandina napbaa)

Raja : Are ripeng! Re`ba, indiba ripeng,
nang`ko nike angade gisiko kenanisa
ong`engaha.

- Nandina : Maina? Maidake kenani ong`enga, raja? Na`a maia kattakon aganenga?
- Raja : Na`a ripeng, ka`tongko ding`atgipa, gisiko wa`al chadoatgipa. Na`a jechipak sprongata, uachipakan pilakkon man`prongangaia, darangan maming gita jokna man`ja. Dontonggija skani singga sike dongkamaia ka`tongo, ka`sagrikani balmindurina bc`en bimang mobaaia. Indakmitingon mandeni maming budian kam ka`ja.
- Nandina : Iani gimin na`ara maina indita chanchina nanga, raja? Ka`saani chri bra nang`ko nangeode uko namatna gita nang sambaon dongenga (Taposichipakko niate). Indaka saaniko namatgipa nang` sambaon dongengon na`a maina jajrenga, maina kena?
- Raja : Ha....! Ha....! Mittelbea nang`ko indake nama kattako aganani gimin. Na`a saksa bilongen gisiko matsramgipa ong`a, ripeng. Nang`ni kattarangna anga bilongen kusi ong`bea. Ia boksisko ra`chakpabo (Sonani necklaceko on`a).
- Nandina : (Salam ka`e) Anga rajani saksa chonbegipa nokkolsan ong`a.
- Raja : Asongbo (Nandina asonga). Nibo, ripeng, na`a Dhaniramni bidingo je kattarangko aganachim, uarang pilakan kakket chong`motbebema?

Nandina : Raja, na`a angni kattako bebera`na man`jaengode angni ripengo sing`bo.

Raja : Dhaniram saksa bilongen denggu chalakkigipa aro an`tangnasan chanchiaigipa ong`a, uko anga da`o namedakean ma`sina man`aha; indiba ua indake ka`donggen ine anga da`oba bebera`na man`ku-jaenga.

Nandina : Raja, mikrontangchi nikode aro nachiltangchi knaode bebera`gen-konba?

Raja : Oe, ra`gen, mikrontangchi nika aro nachiltangchi knaana bate mai sakki dal`bata?

Nandina : Indide da`o anga re`naha.

(Ong`katanga)

Taposi : Ka`sara raja, denggugipa Dhaniraman ia pilak ong`enggipa a`selni ja`ting ong`a.

Raja : Jeba ong`bo, Dhaniramni denggu budirangko chanchiate anga bilongen ka`tongo dongsiksak-beengaha. Uko anga mai dako namgen chanchien man`jaengaha.

(Nandina napbataia)

Nandina : Raja, na`a ta`rake iachipak dongnue dongsoode nambatgen. Dhaniram iachipaknan re`baenga. (Taposichipak niate) Ripeng, da`ode rajana kakket sakkiko mesokatbo. (Rajako)

Indide raja, hai re`bo!

Raja : Na`a jechi re`na agangen, uachin re`anggen. Maming kenani dongja. (Sakgnian mittino dongnua)

Taposi : (An`tangna agana) Dhaniramo bilongen chalacki donga, indiba Nandina da`al je ja`gako saaha, uanoni ia peru maming dakeba jokjawaha.

(Dhaniram napbaa)

Re`ba, re`ba Dhaniram, asongbo. Na`a namengakonba?

Dhaniram : (Asonge) Mai nama, mai namja? Namgenba maidake, aganbo? Manas rikamoni re`bachengaonian raja angko changsaba okamkujaenga. Manderangni ku`sikoniko mai mai kattarangko knana man`enga, maiko agangen. Indiba na`asan angko gisik ra`aha, uni gimin anga nang`ko bilongen mittela.

Taposi : Salgisakara pangnajolna aram pindape dongkamaia?

Dhaniram : Chong`mot, dongja. Indiba na`a angni ia aram pindape dongenggipa salgisakni jajong jarambong ong`ode, indide sawa angko maiming tosusana man`gen?

Nandina : (M a n d e r a n g c h i p a k) R a j a , knaengakonba?

Raja : (Manderangchipak) Jrip --

Dhaniram : (An`tangna agana) Nandina, ong`jaoba chang ritchasamang Taposi angna ka`saenga ine aganachim. Aro uni angming katta aganani bewalrangko nikode indaken chanchiman`aia. (Parake) Na`a maina jripjrip dongenga, maina katta aganjaenga. Anga nang`na badita ka`saa uko na`a ma`sijama?

Taposi : (Mitchia gnang) Angara maidake ma`signok? Nang`ni ka`tong ning`o anga nape nigenma?

Dhaniram : Na`a iakoba ma`sijama, mongnal a`dubekoni chaoba ua pangnan kosakchipaknasa nigitdoe dongaia, uni miksonga a`dubek ong`ja. Uni bitchi badita nama, badita ringtoa, uko bija me`piliprangsang aganna man`gen. Nang`ni ka`tong badita ka`sina rinoka, uko raja ma`sigenma? Ha....! Ha....! Ha....!

Raja : (Manderangchiko niate) Knajok? Knajok uni gaora dake agangipa kattarangko? Indake chanchiman`a, da`oan iani skoko sottonge galsranggen. (Mil`amko jako ra`e engdinga)

Nandina : (Manderangchipak niate) Raja? Na`ara maiko dakna am`enga? (Rajani jakko rim`a)

Dhaniram : Nibo, Taposi –

Taposi : Aganbo, maiko aganna am`enga.

Dhaniram : Anga nang`ni ramramgipa nokkolsan ong`a, aro anga rajani kamrangko ka`e on`ti min`ti je gamrangko chimongaha, ua pilakan nang`nian ong`a. (An`tangna agana) Indiba ia me`chiko jegita muni mukta bang`a, una maiko nanga? Uko ia a`song-oniko bachiba rime katangna man`jokon angni gisiko miksongani chu`sokaignok, angna mamingko nangjawajok. (Parake) Are, na`ara maina katta agangija jripjrip dongenga?

Taposi : Angara maiko agangen nang`na?

Dhaniram : Nibo, knalde raja, Manas rikamona sipairangko rime re`angna aganenga. Mil`am sepiko jakkalanio ua jegitaba changgipa sappipa ong`china, uko darangan u`ia! Indiba dakgrikani bakrako nike sibokjaon ong`a. Ha....! Ha....! Ha....! Uko anga namedakean ma`sia, ugita dake kenkrok aro ka`pong raja banoba gnigipa dongama?

Raja : (Mittinoni ka`onange) Mai! Sala angkosa ua chonnike roengaha (Mil`am jako ra`e chaangna am`a).

Nandina : (Rajani jakko rim`e) Maiko dakna am`enga, raja? On`tisa chakchik-kubo, aro mai maiko aganangkua knaboching.

Dhaniram : Angade kenchakengaha, ia dakgrik-anio ua sigen, ong`jaoba mikkango

dim`ak nongesa songona pil`bana
nanggen -

Raja : (Manderangchipak niate) Nama,
nina, sani mikkango dim`ak nong`na
nanga; mittelna changgijagipa!
Achak!

Dhaniram : Indide, na`a namnikode gong`ode,
anga pilakko tarinaha. Hai, an`ching
knal ia a`songoni gipinchi re`naha.
Ua mamingna choligija ka`pong
me`asa baksa donge nang`ni maming
lap ong`jawa. An`chengara chi
banako chel`chakna basakoba
amama?

Raja : (Dongnue dongaoni ong`katbae
bilongen ka`onanga gnang
Dhaniramni gitoko rim`gekgekea) Ei'
denggu burbok, sala nokkolni
depatchi bi`sa! Ian nang`ni asolgipa
bimangma! Na`a je rangtalo mi
cha`enga, ua rangtalkon a`kol
punaba on`tisaba jajajama? Dak-
chakgipani gitokkon rasotna aro
cha`sotna nang`ni ka`tongo on`tisaba
jajaani ong`jama?

Dhaniram : (Kena gnang an`tangna agana) Aiao
maiko inmanjok! Iade ianon ong`gen,
anga jumangomangba chanchi-
jachim. Da`o mai ong`gen? Bachi
re`gnok? Ia changode pilakan
bon`aha, mamingan dongjaha. Ia dari
noti me`chikan angko cha`sotaha,
ja`guataha.

- Raja : Da`o maina aganchakjaenga, maina jrip dongenga? Na`a maidakgipa gisikni mande, uko anga indita salni ja`mansa ma`sina man`aha. Nang`ni ka`na amgija kam a`gilsakon dongja. Ia a`sak salgisakba nang`gita dakgipa mandeni namgija kamko chakchikna man`jawaha (mil`amchi den`na enga).
- Taposi : (Rajani jakko ka`sae rim`e) Raja, maiko dakna am`enga? Uko kema ka`bo. Ia ramramgipa nokkolni an`chichi nang`ni mil`am marangsan nangaigen. Singho maming saloba peruko bobil dingja. Uni gimin raja, uni janggiko ka`sapae so`otnabe.
- Raja : O ka`sara, nang`ni kattako anga galna man`ja. Uko anga so`otjawaha (Mil`amko dona). Indiba iani mikkangko niktaijana gita anga bondobost ka`na nanggen. Iako anga niktaina siksrangjaha. – Nitimgipa! –
- Mittinoni : Raja –
(Nitimgipa napbaa)
- Raja : Nibo, bakbak ia dengguiko ianoniko sipai dal`gipaona rimangbo, aro aganbo uni skoni kniko rokkolonge, chun nonge, mikkango dim`ak nonge, a`songni simani nalsachi wate donechina. Uni je gamjinrang donga, uko a`songni kangalrangna sualatchina. U`ijok?

Nitingipa : Nang`ni ge`eta gitan ong`china.
(Dhaniramko miksonge) Hai re`bo -

Dhaniram : (Jak chopjole mikchi jingjang
jingjang dake) Raja -

Raja : Jrip, kratcha`gija. Anga nang`ni
maming kattako knana siksrangjaha.
Uko ta`rake rimangbo. Uni mik-
kangko nikjokon pap ong`a.

Nitingipa : Hai re`bo.

(Nitingipa Dhaniramko rime
ong`katanga)

Nandina : (Mikkangchipakna re`ange) Ah!
Janggide jokaha uan una namaha.
Da`osa ua chanchignok, sintignok,
maiko dakmanjok. Walgimik cha`ue
cha`e seng`nachipaksa meseni ja`gao
bajia gita ong`aha. Ha....! Ha....!
Ha....!

Taposi : Ia pilakan nang`ni budichisa ong`na
amaha. Jeba ong`bo, raja uni jang-
gikode so`otjaha aro uni mikronko
mikgaoata gita ong`aha.

Raja : Ia dengguan angko namgija kamko
ka`narang budi on`rongachim;
uarangko gisik ra`jokode da`o
kratcha`mana. Indiba maiko dakgen,
nang`ni mol`molani giminan uko
anga on`tisa sasti on`e watatna
nangaiaha. Hai da`o an`chingba
re`naha, knalde dakgrikani bakraona
sokangna nanggen.

(Pilakan ong`katanga)

DAKMESOKA V

MESOKANI I

Manas rikam, Nokmani Nok
(Nokma Dejangpa aro montri napbaa)

- Nokma : Pilakan bon`nakaha. Iani ja`man mai
ong`gen mamingkon ma`sina man`ja.
- Montri : Oe, raja Dhobani mil`amko dangtape
ku`mikchetahana aro A`chikrangko
rikgalna ong`jaoba Manas rikam,
A`chikrangni dongenggipa biapko
kningate mangkimaatgenna. Ong`ja-
ode Dimbriko rime ra`angdragenna.
Kuntaghatni rajaba indaken ku`mik-
chetahana.
- Nokma : (Ka`onanga aro duk ong`a gnang)
Bebema? Ia chasong gitalo indakakon
matgrik inc mingama? (An`tang
kopalko jakchi doktaktake) Maiko
agangen, bilgri ong`jokode darangan
uko kal`ake rona, dokna satna
am`aijok. Angni obosta indake
ong`jaode, uamang indake angni

mikkango gaora dake mesokna pa`genchimma? Nibo, da`o ango maming gamjinba dongjaha, bang-bangsa, sipairangba matgrikrangba dongjaha; anga da`o bobilrangni mikkango indin chadenge dongana agre angni maming cholan dongjaha. Angko kningatna aro mangkimaatna am`gipara ig altuen man`aigen. larang maming aiao inmanani kattarang ong`srangjaha. O, Gitel! Indaka chonnikaniko aro kratcha`aniko badita salna chakchikna nangkugen? Somoï nawang A`chikrangko badita chasongna indake minoke dongkugen?

Montri : Nokma, na`a indake jajrengani kattarangko aganode –

Nokma : (Ka`onanga gnang) Indide aganbo, Jachingpa? Indaka kattarangko knae saoba tom`tom dongna man`aigenma? Dhobani rajaara sawa, ua maina angko ra`bienga? Indiba Dumuryani rajaara maina jripjrip dongenga? Ian bilongen aiao inmanani ong`a (Iachi uachi re`jingjanga).

Montri : (An`tangna agana) Che! Da`o iara ka`onangani somoïma? An`chingni da`o je obosta, ia somoïo bobilrangko chonnike roani somoï ong`ja. O Gitel, ia me`chik bi`sa Dimbrini gimin indake gondogolrang ong`bagen,

anga jumangomangba chanchisoan dongjachim. Ia nabaenggipa gondogol ong`gnigiparangko maidake chel`-chaksona man`gen, uarangkosha chanchina nanga.

- Nokma : (Asonge) Jachingpa, iano asongbo.
- Montri : Nang`ni ge`eta gitan ong`china. (Asonga)
- Nokma : Da`o mai dako namgen, aganbo-ching? Angade ia a`sel sokgnini bidingo maming nalsa nalbat-kon chanchiatna man`jaengaha. (Rang`spea gnang) Montri, ia biapona re`bachengaoni anga badita a`sel-rangko chagrongengaha, uko na`an ma`sia. Indiba, da`al angni mai dosni gimin, Gitel angni kosako rokomari sinjetaniko on`enga, aganboching! Angni stikenggipa kotipoba wa`alra-rasa ong`aha! O Gitel, pilakan angko gualtokjokma! Ia angni demechik Dimbri angni an`chi ong`e maina angni noko atchiaha? O Gitel!
- Montri : Nokma, nang`ni ambi atchumang maidake rasong mikkim gnange janggi tangbaachim, uarangko na`a gualsrangahama?
- Nokma : Jachingpa, na`a ua giticham katta-rangko da`o maina angko gisik ra`atenga. Teng`aoni andalaona re`bajokode, ua andalakon andalbata gita daknikman`a; ua giticham

chasongni kattarangko gisik
ra`jokode tange dongnan sikja.

Montri : Nokma -

Nokma : Chong`mot, ia matgrik ma`kringo
anggita rasong gri saksa mainan
atchijok? Sikarina kene peru a`kolo
nape katronga; indiba singhonide
indaka apsa`n niam ong`ja.

(Rikampa napbaa)

Re`ba jong, asongbo. Na`a ia pilak
kattarangko knaahakonba?

Rikampa : (Asonge) Oe, ia pilakkon montrichiko
knana man`aha. Angaba adita sak
manderangko nirikkie songbad ra`na
watatachim; uamangni gisepo
sakgittamde re`baaha. Dhobani raja
baditaba hajal sipairangko rime
an`chingko bobil dingna re`chakat-
baengahana.

Nokma : Uara maidake? Uade darangming
ripeng dakjawa inesa aganachim.

Rikampa : Agannaba donga, indiba uamang
darangkoba bebero`na man`ja.
Uamang dikdiksano an`tang chan-
chiarangko bodolaigiparang ong`a.

Nokma : Sakgipinko bebe ra`gijanian ua-
mangni jatni dingtangmancha gun
ong`a.

Montri : Chong`mot, ia kattarangko jegalna
man`ja, sakkirang bang`bea.

- Nokma : Bijni rajani kobor mai, aganboching knana? Uamang mai budiko dakna am`baenga?
- Rikampa : Bijni raja Koch Biharona mande watataha. Koch Bihar raja baksa nangrimesa dakgrikna tariengaha. Uamango bilakgipa matgrikrang bang`bea.
- Montri : Aiao! Ia dakgrikani a`bachengjokode maian ong`gen, banonian matgrikrang nabaaigen, uni maming hisap dongja. Mikka balwa a`bachengahaode sagalni chipakkore maming saloba tom`tom dongja.
- Nokma : Dongade dongjaan. Indide da`o maidako namgen? Na`an aganboching, jong Rikampa?
- Rikampa : Oe, maiko agangen? Nokmana ong`jaoba a`songni namgnina janggi on`na nangoba anga maming saloba an`piljawa. Indiba niksoenga gitade, ia a`seloni ramram naljokna man`ani maming ka`donganiko man`jaenga. Jeba ong`bo, angni be`en baksa janggi dongenga dipet angni ka`gnioni anga maming saloba janggiltikjawa. Da`o miterango -
- Nokma : Angjong, da`o ua chasong dongkuengama, je chasongo miterangba mandeni dukna duk ong`paachim. Namgija chasongni wal`kuna pilak namanirang gimangaha. Indiba

da`oba chengo gitan Sal Jajong
nakuenga, uaba Isolni Dakgimin
Niamko bikpilatna man`jani giminsa.

Rikampa : Na`a ge`etode, indide, changsa jotton
ka`e nisranggen. Gitel an`chingni
rasong kopalo maiko see donsoa
mancha.

Nokma : (Rang`spea gnang) Maiko nina
nanga? Chanchie nibo, saoba jodisa
'Gitel angni rasong kopalo maiko
semanchaa nina' -ine chubea
a`brioni bilonbaode, ong`jaoba, dare
dare dake kamenggipa wal`sareo
napeode, indide Gitel uni kopal
rasongo maiko see donsoachim, uko
ta`raken ma`sina man`aigen.

Rikampa : Chong`mot, ta`raken sakkide
man`aigen. Indiba -

Montri : (Rikampachipak mesoke) Na`a
changsa ia chittiko poraie niboching
(Chittiko on`a).

Nokma : Iara maini chitti, montri?

Montri : Nokma, ia chittiko anga mejal walosa
man`aha. Indiba ia chittiko sawa
basakon donangaha, maikon seaha,
uko mamingko ma`sina man`jaha,

Rikampa : Bon`aha, bon`aha! Indaka kattarang-
ko ku`siko ra`bamalama?

Nokma : Mai ong`a angjong, maimanchako
sea, poraiboching, knana? Sambao
re`bae poraiboching.

- Rikampa : Chong`mot, ia kattako anga ku`sikchi mingna man`jawa, skode na`a an`tang poraie nina man`a. Ia kattako nang`na knaatna anga ka`dong-jaenga (Nokmana chittiko on`a).
- Montri : Chong`motde ia bilonggipa katta ong`aan, indiba -
- Rikampa : Ia chittiko gamchate ra`na nangsrangja; an`chingko jajreng-atnasa bobilrang haida budi dakenga.
- Montri : Angaba indaken chanchienga, Nokma, ia chitti an`chingna namako chanchigipa mandeni chitti ong`na krachong`motja.
- Nokma : (Dikdiksa jripjrip donge rang`spea gnang) Montri -
- Montri : Nokma!
- Nokma : Ia chittiko nang`na sawamancha seataha ma`siama?
- Montri : Nokma, anga mamingko aganna man`jawa, ia chittiko angni do`gachol mikkangonikosa man`aha.
- Nokma : (Rang`spea gnang) Jong, da`o an`chingna mai ong`gnok?
- Rikampa : Ia chittiko angna on`bo, anga ia chittiko chitpriprae galsranggen. Maming chanchigijaan aganna man`gen, ia bobilni segipa chitti ong`chongmota. An`chingko kenatna,

jajrengatna segipa chittisan ong`a.

Nokma : Jachingpa, na`an aganbo, mai dako namgen?

Montri : Nokma, a`sel sokbabebeode janggi galpileba krenge nina; warachakna nanggen, an`chi on`na nanggen.

Nokma : Jachingpa, nang`ni agana kakket ong`ade ong`a. Indiba an`chingni an`chi on`a ja`man, an`chingni manderangni obosta mai ong`gen, uni gimin chanchie nijokma?

Montri : Ong`ade ong`a, Nokma. An`chingni ja`man ong`gnigipa kattarangko chanchie bilongen jajrengman`a; pilakan bon`gnisa ong`aigen.

Nokma : Jachingpa, chong`mot, ua kattarangko chanchijokode gisiko an`jri-mani sokbaaia, pilakchikon andalesa nikataia. Oh Gitel, chingna maiko donsoenga!

Montri : Nokma, janggi on`nade a`song gimikon pante-me`trarangba donga; chengo chengonian uamang jatni aro a`songni namgnina janggi on`baengaha. Indiba indinari wa`al dare dare ching`gipao jo`ongrang gita indinari maina bilnape siaigen?

Nokma : Jeba ong`bo, montri, an`tang sieba jatangko jokatna maiba chol dongode uakon dakna nanggen. Indiba bobilrangni hajal hajal

sipairang baksa jakrara maidake
chagronggen. Maina, an`chingni jako
da`o mamingan dongja. Uni gimin
mai obosta ong`baa uarangko
nicheng nikchengesa jekoba dakna
ja`ku de`na nanggen.

(Nokkol napbaa)

- Nokkol : Montri, montri, bobilrang an`ching
songjinmako changduulengaha.
Bakbak Nokmako ianoniko rimangbo.
- Montri : (Rikampako miksonge) Matgrik,
obosta namrikrikbajaengaha. Hai
an`ching ianoniko Nokmako gipinchi
rimangnaha.
- Nokma : Bachi? Maina gipinchi? Anga angni
jatna an`chi on`chenggen, angni
ja`man na`simangjeba dakbo. Angko
watbo, anga bobil saksakoba napna
on`jawa.
- Rikampa : Nokma, chinga dongengon, nang`ni
jonggipa anga dongengkuon na`a
maina skang sigen? Sina nang-
genma, dakgrikna nanggen, obostako
nichengesa jekoba dakgen. Uni
gimin na`a mamingna chanchina
nangja.
- Montri : Hai an`chingba maibakode daksona
nanggen. Kene, jajreng dongaiode
cholijawa. Sinan nangode maibako
budi dakesa sigen, indin ka`pong gita
gangpange on`aijawa. Be`enni
ja`dilrango da`oba A`chikni an`chi

jokkuenga. Sina kensrangja.

Nokma : Montri, nang`ni aro ang jonggipa, Rikampani ka`dongana anga bilongen kusi ong`chaka. Chong`mot, ia A`chik jato ka`dongani, kengijani, bamgijani gun donga; ia gunrang namgipa gun ong`a. Indiba ia ka`donganiko, kengija-bamgijaniko namedake jakkalna, nama kamo, kragipa somoio jakkalna ia jato budi chu`onga gita dongkujaenga. Iani giminan ia jat chengo chengonian brange, ong`sibee janggi tangna nangao ga`akenga. Jeba ong`bo, an`ching da`o ka`dongakosan andal min`dik jakkalaigija, bilongen chanchie-ma`rokesa budiko jakkalna nangen. Unosa an`chingni jat chasong chasongna janggi tangangen. Jeba ong`bo, hai an`chingba maiba budiko chanchie simsake dongsona. Gitel an`ching baksa dongpachina. Hai re`bo.

(Pilakan ong`katanga)

MESOKANI II

Bijni: Bijit Narayanni sipai aro Koch Bihar rajani sipairang tom`daka. A`chikrangko Manas rikamoniko rikgalna ku`monga.

(Raja Bijit Narayan aro Montri napbaa)

Raja : Montri, indake ruute dongaiode cholijawa. Da`oara mai bangki dongkuenga? Koch Biharni raja baksa an`chingni besa kaa jringirot tangkamchina. Ua an`chingko dakchakna chu`onga gitan sipai watataha.

Montri : Chong`mot raja, Koch Biharni raja indita ta`raken an`ching baksa besa kana ku`rachakaigen uko chanchie anga bilongen aiao inmana.

Raja : Namgipa raja baksa badia raja besa kana sikjawa aro jechakgen? Ha....! Ha....! Ha....!

Montri : Namgipa raja inema ma maiba miksonga dongani giminsama?

Raja : Je miksonganiba dongchina, an`chingniba dingtangmancha

miksongani donga. An`chingni miksonganiara Manas rikamo dongenggipa Garorangko budi dake rikgalani aro ia jolo an`tangko bilakbatgipa raja ong`e mesokani.

Montri : Raja, Kuntaghat aro Dumuryani rajarangna maming jajrengani dongjaoba Dhubrini raja Dho-baninade on`tisa chanchina nangen. Maina, unide mongma, gure, ut, chigita rogipa ringrang aro sipairang bang`bea.

Raja : Bang`china, uni mongma, gure aro sipairang bang`beana angko kenatengama? Na`a ka`pongma, ka`dongjaengama?

Montri : Ka`donggijade ong`ja, raja. Indiba jeko dakna skangba ki`sang mikkang pilakkon chanchichengna nanga.

Raja : Chong`mot, Montri, nang`ni chanchiako bilongen mittelbea. Garorang da`oan bilgri ong`kuenga, uamangni mongma, gure mamingan dongja, indiba ia jatrang bilongen ka`donggipa jat ong`a. Uamang Gaur a`songoni katbae da`oba tom`tomna man`kujaenga. Da`oan uamangko ianoniko jitatna man`na nangen, ong`jaode, ja`mano iamangan an`chingni dal`batgipa bobil ong`e chakatgen.

Montri : Raja, indide an`chingni skanggipa kamara ong`gen, Dhubrini raja

Dhobanini gimin ma`sina nangani.
An`chingni Garorangko rikgalna
dakengon ua Garorangna chak-
jachina dakchakjachina.

Raja : Montri, indide da`alan na`a Dhobani
rajaona mande watatna jotton ka`bo.
Uni miksonganikoba ma`sina nang-
chongmota. Angni chanchia gitade
ua an`chingmingan bakrimpaegen.

Montri : Raja, indide sako watato namgen,
uko na`an mingatbo aro un baksa
mai maiko on`atpagen ukoba
mingatbo.

Raja : Montri, na`a angni bebegipa aro
kakketgipa montri ong`a. Nang`o
anga bilongen bebera`a. Ia kamko
ango pakwatgija na`a nang`ni
namnika gita jekoba watataibo.
Indiba ia kam ta`raken ong`na
nanggen.

Montri : Nang`ni skagitan ong`china, raja.
Indide anga da`o re`naha, raja,
maina, mande sandian baksa maiko
on`atpana nanggen uko jogar ka`na
nanggen.

Raja : De, indide re`angbo.

Montri : Nang`ni ge`eta gitan ong`china.

(Ong`katanga)

Raja : (An`tangna agana) Ia Garorangan
angna mikkangchi dal`bea kengnini
ong`baenga. Iamang kengijagipa,
bamgijagipa jat ong`a. Toromni

gitaba iamangni maming torom
dongja inna man`gen, maina,
iamangni cha`gijagipa maming
matburingan dongja. Mandirchiba
re`ja, maming pujaba ka`ja. Bilongen
jakgitele janggi tangna sikhgipa jat
ong`a. Uamangni raja Sangkaldip
Gaur A`songo bilongen bilakhgipa aro
mingsinghigipa raja ong`achim.

(Rani napbaa)

Rani : Raja, na`a maiko indita chanchi-
beenga? Maini gimin Koch Biharni
sipairang an`ching a`songona re`bae
tom`dakenga? Maiba miksongani
dongama? Ma saobaming dakgrikna
miksongengama?

Raja : Dakgrikna miksonga gitan ong`enga.
Ua Manas rikamo re`bae dongenggipa
Mlechharangko rikgalna am`enga.
Uamang mikkangchi an`chingna
kengnini ong`enga.

Rani : Raja, uamang bilongen sontolbegipa
jat ong`a. Uamangko indinari maina
rikgalna am`enga? Uamang an`ching-
ko maming onia ka`a dongkuja.

Raja : Onia ka`a dongkuja, mikkangchi
ka`gen. Iamangko maming dakeba
bebera`na man`ja. Jemangni cha`a
ringa mamingan champengani
dongja, olakkiani, puja ka`ani
mamingan gri, iamangni kosako maio
ka`dongna man`gen?

Rani : Raja, angni mingsa mol`molani,
dakrika dinggrikako wate tom`tome
janggi tangna jotton ka`angbo.

Raja : Me`chikrang indaka kamrangni
bidingo jak on`pajaon nambata.

(Montri napbataia)

Re`ba, re`ba Montri. Mai kobor?
Dhobani rajaona mande watataha-
konba?

Montri : Watataha, raja.

Raja : Watatahaode namjok. Indiba Montri,
knalonian kamko a`bachengatbo.
An`chingni sipai kotok baksa Koch
Biharni sipai kotokrangko nang-
rimate, uamangni giseponiko
saksako sipai kotokni dal`batgipa
dake songatbo. Knalonian kamko
a`bachengatbo. Na`a jekoba dakatai-
bo. Chinga da`o re`naha. Rani, hai
an`ching da`o re`naha. Montri
tom`tom kam ka`angna on`bo.

(Raja aro Rani ong`katanga)

Montri : (An`tangna agana) Anga da`o sako
sipai kotokni dal`batgipa songgnok?
Jeba ong`bo, Koch Biharni sipai
kotokni dal`gipakon kotok ge`gnini
dal`batgipa songaignok. Unosa
uamang gisik nange, on`kange kam
ka`anggen. Da`oan anga uamangko
okamate daitoko pakwatatgnok.
Jaleswar – (Okamata)

(Jaleswar napbaa)

Jaleswar : Maina montri?

Montri : Bijnini sipai kotokni dal`gipa aro
Koch Biharni sipai kotokni dal`gipako
da`oan ianona re`bachina aganatbo.

Jaleswar : Nang`ni ge`eta gitan ong`china.

(Ong`katanga)

Montri : (An`tangna agana) Sipai kotokniko
dal`gipa songanio raja dongpaon
nambatgenchim. Maina, ia kam
rakbea ong`jaoba rajani jakchisa
krabatgen; anga rajanan sengsona
nanggen. Rajaan jaktangchi
seokangchina.

(Dolgni sipai kotokrangni dal`gipa-
rang napbaa)

Debarindra : Salam Montri?

Lakkindar : Salam Montri.

Montri : Oe, anga na`simangkon iano
sengsoengachim. An`ching je kamna
A`song ge`gnini sipai kotokrang
tom`dakaha, uani gimin na`simangna
kan`dike parakatchengna nam-
nikenga. Chong`motan, ua Manas
rikamo songdongenggipa Garorangko
ua biaponiko rikgalna miksonganian
A`song ge`gnini rajarangni ku`mong -
ani ong`a. Uni gimin na`simangchian
ia kam chu`sokna nanggen.

(Raja Bijit Narayan napbataia)

Raja, iamangan a`song ge`gnini

sipai kotokrangni dal`batgiparang
ong`a.

Debarindra: Salam raja.

Lakkindar : Salam raja.

Raja : Miksonganiko haida montri
na`simangna parakataha. Uni gimin
knalonian ia kamko a`bachengatbo.

Debarindra: Ia kamko angna on`aibo, raja. Anga
angni sipairangko rime knalan
a`bachengataigen.

Raja : Na`a maidake a`bachengatgen?

Debarindra: Anga Garorangko Manas chi-
bimaniko chi ko`na, auna miksuna
champengchenggen; uni ja`man,
nigen uamang maiko dakbaa.

Raja : Nambea budi. De, indide knalonian
a`bachengataibo. Uamangko rikgalna
man`ode bang`a boksisko man`gen.
Garorang bano bano Manas chibimao
chi ko`na, auna miksuna chigat taria
ua pilakko champengchengbo. Iako
na`an man`gen. Nang`ko anga
da`asalni dipet chigatrangko Nirok-
gipa ba Chigatrangni Nokgipa ba
“Nokma Chigatpa” ine biming
donengaha.

(Nokma Chigatpa bimingko pilakan
jak songe ra`chaktoka)

Nokma

Chigatpa : Ong`aigen raja, mamingna jajreng-
nabe. Jeko dakna nanga anga

dakangaigen.

Raja : Indide na`simang kamko a`bacheng-
ataibo. Montri, hai an`ching da`o
re`naha.

(Sakgnian ong`katanga)

Nokma

Chigatpa : Ada Lakkindar, na`a maming dakna
nangjawa. Nang`ni sipai kotokko ra`e
na`a angni okamatosan re`baaibo.
Kamko anga a`bachengataignok.
Nangode anga nang`ko okamataigen.

Lakkindar : De indide, anga pangnan angni sipai
kotokrangko simsake aro mikrake
dongchina ge`etgen. Na`a amchak-
jaenga ine nikode bakan kobor
on`ataibo, anga rang`san angni
matgrikrangko rime chaangaigen;
na`a mamingnaba jajrengna nangja.

Nokma

Chigatpa : Ong`aigen ada. Da`al walonian anga
Manas rikamona angni sipai kotokko
rime re`angaignok. Uno tambu tarie
donge, Garorang maidakna am`enga
uarangko on`tisa nichengna nang-
gen. Hai, an`ching da`o an`tang-
tangni sipai kotok baksa gronggrikna
aro uamang baksa iani bidingo
agangrikna ku`monggrikna.

Lakkindar : Hai indide.

(Sakgnian ong`katanga)

MESOKANI III

**Walni andalao Nokma Chigatpani sipairang
Manas rikamona re`ange tambu
salkringaha. Ua biap A`chikrangni tom`dake
donggipa biaponi bang`e chel`jachim.**

**(Nokma Chigatpa aro sipai kotokni dilgipa
Senapati napbaa)**

Nokma

Chigatpa : Senapati; knal pringonian Garo-
rangko Manas chibimaniko chi ko`na,
auna-miksuna aro na`tok-ang`ke
rim`naba on`nabe. Manijaode
rim`bo, dakgrikna botode so`otaibo.
Antisarang nigen uamang maiko
daka. Uni ja`man jeko dakna nanga
anga agangen.

Senapati : Ong`aigen matgrik. Anga saksakoba
chibimaona ong`katbana on`chong-
motjawa.

Nokma

Chigatpa : Sipairangko Manas chibima
rikamjoljol dongtimchina ge`etbo.

Simsake dongtimchina aganatbo.
Saoba ge`etaniko olgroke ra`ode,
u`ibo, ua janggi tange dongna
krajawa, uko Chitmangona watatai-
gen.

(Ong`katanga)

Senapati : (An`tangna agana) Maiko miksonge
chi mang`nangko ko`na, auna
miksuna on`jaenga, mamingkon
ma`sina man`ja. A`bri, chiring,
chibima, iarang pilakan ong`telai-
gipani ka`saachi a`gilsako janggi
tanggiparangna on`gimin bostusa
ong`a. Iakoara saoba champengna
man`genma? Champenganiara
kraani ong`engama? Janggi gnang-
giparang pilakan chibimani chiko
ringanio, jakkalanio jakgitel ong`a.
Indiba Garorangna ia chibimani
chiko jakkalna beng`enga. Angade
maiko dakgen? Angade oktangna
kam ka`gipasan ong`a. Angko jegita
dakna ge`eta uagitan dakna, manina
nangaigen. Ka`gni kamko ka`nan
nangaigen.

Sipai : Sahep, Garorangara tom`tomgipa aro
sontolgipa jat ong`a. Uamangni
kosako maina indaka dal`bea
sinjetaniko on`enga?

Senapati : Nang`ni iarangni gimin sing`ani
ong`ja. Nang`ni ka`gniko gualnabe.
Nang`ni ka`gniara mai, u`iama?

Sipai : U`ia sahep, angni gualaniko kema ka`bo. Angni daitoara ge`etaniko maniani ong`a.

Senapati : Indide na`a ge`etakosan manian-gaibo, mamingkoba sing`nabe. Chigat ge`prakon namedake dongtimchina pilak sipairangko aganbo. Manijaode janggi galna nanggen. Ian Nokma Chigatpani ge`etani ong`a.

Sipai : Nang`ni ge`eta gitan ong`china. Knal pringonisa bilongen simsake chigato dongtimna nanggnok. Da`ode walaha. Walode darangba chi ko`na, auna re`bajawa.

Senapati : Name simsake dongtimbo. Maiba ong`gija koborrangko man`soode, knaode sasti man`gen. Sasti uan gitok sottongani sasti. Nama kamna nama boksisi.

(Ong`katanga)

Sipai : (An`tangna agana) Da`ode walaha. Ianon tusiaignok. Knal pringo niaignok. (Dongtimenggipa chigaton tusia)

(Mittinoni ka`srokbee doka dam`ani gam`a)

(Pring: Sakgni A`chik Nomilrang gimbe kee napbaa)

Ginje : Ia Manas chibima bilongen namgipa chibima ong`a. Iani chi bilongen grika aro ringtoa, mo sari?

- Rinje : Oe mo? Ianon skatang au-miksue ronaba bilongen namgipa chigat ong`a. Hai sari auchengnamo?
- Sipai : (Tusiaoni simake, uamangni auako sriksrik nie dongchenge, auman`o gimbeo chi brae ra`angmitingo) Ei, na`simang sawarang? Maina ia chibimaoniko chi ko`angenga? Bakbak chiko da`oan pakgalbo.
- Ginje : Na`ara sawa? Chi ko`ana mai ong`a? Iara nang`ni chibimama?
- Rinje : Chinga atchichengaonian ianikon chi ko`enga, ianon au-miksuenga, ianonikon na`tok na`bat am`e cha`enga, janggi tangenga. Na`ara sawa, banoni re`bae chingni chi ko`ako champengenga, seng`a dakenga?
- Sipai : Anga Nokma Chigatpani sipai ong`a. Nokma Chigatpa na`simangko ianoniko chi ko`na, au-miksuna, na`tok-na`bat rim`na on`jaenga. Na`simang ia chibimaona re`banabe-ha. (Ginje aro Rinjeni gimbeni chiko pakdrae gala)
- Ginje : Hai sari, ia seng`a dakgipa rori bipako rim`srangna. (Ginje aro Rinje sarisa, ia rori bipa sipaiko rim`e kasrangna ine ganatangko rake kang`kareo kamitingon, ua sipai ua biaponi katanga)

(Sipai kate ong`katanga)

- Rinje : (Katanggipachipakko nirike, ka`on-ange) Sala rori bipa, katangaijok. Katgija seng`a dake dongkuode, rim`e jak-ja`ako kae chio galonesa donanggenchim, salako.
- Ginje : Ong`ja sari, indake ong`ja; rim`na mangmang man`ode, uni jak-ja`ako kae, brenggu-chi`brim bang`gipa biapona uko salange done, brenggu-chibrimrangko kal`ake, uni skoo chi rudape donanggenchim. Sala, ram`krengkreng rori bipa mangmang.
- Rinje : Sari, ia rori bipa an`chingni sambona re`bataiode; uko watchongmotjawa.
- Ginje : Re`bachinaboda, A`chik me`chikrang maidakgipa mancha; uko ma`siangchina. Sala achak.
- Rinje : Hai sari, chi ko`taie re`naha; mi bijak song`naba nanggensa.
- Ginje : Hai indide!
(Sakgnian chi ko`taie ong`katanga)
(Rinje aro Ginjeni re`anga ja`man ja`manan sipai napbataia)
- Sipai : (An`tangna agana) Aiao! Ia me`chikrangde bilongen ka`donggiparang ong`chongmota. Katjaode angko uamang da`al maian dakgenchim! Anga gipinchikosa knaachim, ia jatrang bilongen ka`donggipa, ka`grak, kengijagipa ine. Iamangni ka`dongako da`al anga mikron-

tangchi nikna man`aha. Me`chik-
 rangen indake ka`donggiparang
 ong`ode, me`asarang.....aiao!
 Chanchiatnan kenmana.....
 (Kosakchiko nigitdoe) O Gitel! Na`asa
 da`al ia ka`grak nomil sakgnini
 jakoniko angko jokataha; mikkangchi
 indaka a`sel baksa chagrongatjachina
 nang`o bi`a. Nang`ko hajal hajal
 salam, Gitel.

(Nokma Chigatpa aro Senapati
 napbaa)

Nokma

Chigatpa : Sako hajal hajal salam ka`enga,
 Romen?

Sipai : Salam, Matgrik. Ua mang
mane..... chipu manggni
 angni sambagita da`omangmang
 katangaha, Matgrik. Angko maming-
 ba dakangjani giminsa, anga Gitelko
 mittelengachim.

Senapati : Garorang chibimaona re`ba-dobaade
 dongjakonba.

Sipai : Sakgni nomilrang chi ko`na rebaa-
 chim, Matgrik; indiba uamang angko
 nikarian kene katangaiaha.

Nokma

Chigatpa : Name nitimbo. Darangkoba chio
 ong`kate auna-miksuna, na`tok-
 na`bat rim`na on`nabe. - Atcha, na`a
 da`o ianoni re`angbo.

Sipai : Nang`ni ge`eta gitan ong`china.

(Salam ka`e ong`katanga)

Nokma

Chigatpa : Senapati, da`al walon Garorangni dongenggipa biapko changduulbo aro uamangni Nokma Dejangpako man`ode angona rim`e ra`babo. lamang indinari ia biaponi katjawa. Indiba maming koti aro nosto ka`kunabe. Nokma Dejangpako mangmang rim`e ra`baaibo. Da`al walon.

Senapati : Nang`ni ge`eta gitan ong`china. Da`al walni gisepon Nokma Dejangpako rim`e ra`bagen. Da`oan anga sipairangko rime re`angaignok.

(Ong`katanga)

Nokma

Chigatpa : (An`tangna agana) Anga saksa ka`tong grigipa ka`sanningijagipa, an`chi ringravgipa skal ong`a. Mandeni gitokko sottongata ja`man ua mande maidake ga`dekdeke sia, uarangko nie rona bilongen namnikgipa aro suk ong`gipa mande ong`a anga. Koch Biharoni je rama gita Bijniona re`baachim, ua ramarangde gopram gitasa ong`pila-ha. Mai me`chik, mai bi`sa, mai buchuma-budepa pilakkon anga so`ote galbaaiaha, darangkoba watbajaha. Indita manderangko

so`otbae da`ode anga neng`aha.
 Dejangpa angni katta gitan maniai-
 ode, uko aro uni manderangko anga
 maming dakangjawa. Indiba manij-
 aode –Jeba ong`bo, da`ode walaha.
 Angaba on`tisa neng`takekuna. Nina
 uamang mai koborko ra`baa.

(Ong`katangna am`itingon, Senapati
 sipai saksako rime napbataia)

Senapati : Salam, matgrik.

Sipai : Salam, Gitel.

Nokma

Chigatpa : Mai ong`jok! Maina re`bapilaha,
 Senapati?

Senapati : Matgrik, mingsa kattako nang`o
 sing`angna gualachim; chong`motan,
 Dejangpako da`al walo changduulna
 re`angon, Garorang chel`chaksoode,
 dakgrikna chingsoode aro warachak-
 soode; chingara maiko daksakabo?

Nokma

Chigatpa : Mamingkoba dakna nangja; angna
 bakan kobor on`nataibo. Maiko
 dakna nanga, anga nang`na
 dintang ramako mesokataigen.
 Anga chanchia, uamang warachak-
 sojawa; maina, uamango ka`donggipa
 matgrikrang bang`oba, chu`onga gita
 chri-bra aro ostrorang dongja. Jeba
 ong`bo, na`simang ia kamko sim-
 sake dakangbo.

Senapati : Na`a mamingna jajrengnabe, Matgrik; anga da`oan sipairangko tarisona ge`etaignok.

Nokma

Chigatpa : De, indide. Na`simang kamtango kakket ong`e bimchipangbo. Anga da`o on`tisa neng`takekuna.

(Ong`katanga)

Senapati : Romen, hai an`chingba da`o pilak sipairangko tarisona gita didienaha, da`al waljatchini gisepon Dejangpako rim`bana man`na nanggen. Walon uamang iachi uachi dongnuna aro an`chingko warachaksona man`jawa. Uni gimin na`a da`oan, ia somoion, Manas chibimani chigatrangko nitimenggipani dilgiparangko angona re`bachina ta`rake aganebo. Walni kamko walon matchotna nanggen, ta`rakgalgalangbo.

Sipai : Nang`ni ge`eta gitan ong`china.

(Ong`katanga)

Senapati : (An`tangna agana, iachi uachi dongsiksaka gita re`jingjange) Maiko dakgen, angni kaman indakgipa. Dejangpako rim`e Nokma Chigatpaona rimbana man`jaskal angni daito matchotjawa. Dejangpana aro uni jatna ka`sachakmana. Maina, ia jatara bilongen ka`grak - indiba tom`tomako namnikgipa; ka`donggipa - indiba sontolgipa; kengijagipa -

indiba darangkoba ra`bigijagipa aro
 bilak-wa`sagipa - indiba chakchik-
 ragipa jat ong`a. Ka`sachakoba
 uamangko dakchakani anga maming
 bil dongja. Maina, angaba oktangna
 jawani ge`etako manie cholina
 nanggipasan ong`a. Indiba anga
 oniako namnikja, manderangko
 indinari sinjetarangko chakchikna
 man`ja.

(Manas chibimani Salaram, Saliram,
 Salgro aro Salgipeng jolo chigat-
 rangko nitimna dongipani dilgipa-
 rangko samba tambuoniko rime
 sipai napbataia)

Sipai : Iakai Matgrik, chigatrangko nitimgi-
 pani dilgiparang re`baaha.

Pilakan : Salam, Matgrik. (Apsan salam ka`a)

Senapati : Na`simang re`baaha, namen nama-
 ha. Indiba gisik ra`bo, da`al walni
 gisepon Dejangpako rim`bana man`a
 nanggen. Uni gimin, na`simang
 somoi nosto ka`gija, da`oan an`tang-
 tangni dolni sipairangko rime kamko
 a`bachengataibo. Da`o walba wal-
 tingaha. De, re`angtokbo.

Pilakan : Nang`ni ge`eta gitan ong`china.
 (Sipai aro nitimgipa sakbri
 ong`katanga)

Senapati : (An`tangna agana) Ia Manas
 chibimani okningo badita mande

jatni Ma`ambi dongnue dongenga,
sawa u`ia! Garorang Gaur a`songoni
ong`katbaani ja`manan, so`sojeng-
jeng dake janggi tangna nangenga-
ha danang! Mikkangchi uamangna
kopal rasongni salgisako maian
da`oba dongsoenga, aganna man`ja.

(Nokma Chigatpa rokomari katta-
rangni gimin chanchie, mikgil sikjae,
senapatiko sandie napbaa)

Nokma

Chikatpa : Maiko aganna man`ja, Senapati!

Senapati : An`tangni rasong kopalko, Matgrik.

Nokma

Chigatpa : Rasong kopal, rasong kopal; na`a
saksa a`songni senapati ong`e rasong
kopalosan pangchakaigipama?
Ka`donggijagipa, bilgri aro ka`pong-
rangsa rasong kopalo pangchaka.
Mandeni jakpong aro ka`dongaan uni
rasong kopal ong`a. Na`a mainaba
jajrengengama, kensoengama?

Senapati : Mamingna jajrengja, Matgrik.

Nokma

Chigatpa : Indide! Indide maina rasong kopalni
kattako aganenga? Sipaini ku`siko
indaka ka`donggijani kattarangko
bilongen knadika.

Senapati : Kema, Matgrik; anga gualaha.

Nokma

Chigatpa : Na`a jekoba gualbo, kema donga;

indiba daitotangko gualgipana; angko
kema dongja; ma`siahakonba?
Uni gimin daitotangko gualnabe,
ong`jaode

Senapati : Gualjawa, Matgrik; angko kema
ka`bo.

(Indake, Nokma Chigatpa baksa
Senapatini agangrike dongmitingon,
Nokma Dejangpako jenjulchi kae
Nokma Chigatpaona ra`baa, uno
Pring ong`ahachim)

(Chigatko nitimgipa sakbri, Dejang-
pako rime napbaa)

Nitimgipa

Sakbri : (Apsan ina) lakai matgrik, Nokma
Dejangpako rim`e ra`baaha.

Nokma

Chigatpa : (Asonge) Nang`ni bimingkon
Dejangpa mingama ? Na`an Manas
rikamo songdongenggipa Garorangni
Nokmama?

Dejangpa : Oe.

Nokma

Chigatpa : Anga ka`donga, na`a angni
ka`sanninggija kamrangni gimin haida
on`ti min`tide knaenggnok. Koch
Biharoni Bijniona sokbana anga
Dinhata, Boxir hat, Agamani,
Balajan, Rangamati aro Dhubri gita
re`bana nangaha. Ua biaprang da`o
mai rokom obosta ong`a, uni gimin
na`a haida knaenggnok?

Dejangpa : (Denggoke jripjrip chadenge donga)

Nokma

Chigatpa : (Ka`onangbee chrike) Mai na`ara ku`mama? Sing`aniko maina aganchakjaenga? Sreko rattonge galosa aganchakgenma, sala achak?

Dejangpa : (Bamgoke) Oe, knaaha matgrik. Ua songrang aro ramarang ge`prakan gopram gitasa ong`ahana.

Nokma

Chigatpa : Chong`mot, na`a kakketkon knaaha. Indiba maina, u`iama? Ua pilak songni aro songjinmani jara-burbok manderang iani kakketgipa kattako bebera`tokjachim, uara: "ka`pong-rang aruwea, ge`a-gama, gamjinrangko chimonga, indiba jemangan ka`donggipa, bilakgipa uamang uarangko ra`seke ra`a aro kusi ong`a." Ua songjinmani manderangna anga nama aro altugipa ku`pattianiko on`achim. Uamang angni ku`pattianiko ra`chakjachim. Uni giminsa uamangni gamjinrangko ra`seke, so`ote mikkangchi re`mikkangbana nangaha. Da`o nang`ni pal. Nang`ni mikkango do`ga ge`gni oa donga. Na`a namnikode gong`ode angni kattako manie chingko sokachakna nanggen. Maniode chinga nang`ni songjinmao napan napangjawa aro nang`ni retrangkoba chinga maming dakangjawa. Ianonin re`angpilaigen.

Ong`jaode knal pringon chinga nang`ni songjinmao napdragen. Nangni songjinmakoba gopram tariesa re`pilanggen. Da`ode aganbo, na`a maiko am`enga?

Dejangpa : (Gisiko chanchie) Ia ka`saninggi-jagipa ra`sekdragiparangko cham-pengna gita ango bil dongja. Uam-ang baksa chri bra, mongma, gure bang`bea. Iarang mamingan ango dongja. (Parake) Mai katta, matgrik? Maidake maichi chinga na`simangko sokachaksona man`gen?

Nokma

Chigatpa : Knabo indide, na`simangni jam noko badita gamjinrang chimonga donga, ua pilakkon angni sipairangna oe on`na nanggen. Chu`gimikkode chinga chile ra`angna man`jawa. Indiba sona, sonachi tarigipa gitoko, jako aro nachilo gananirang, hira, muni-muktarangkosan chinga ra`angaigen. Iarangko ra`angna gitaba na`simangan matchu ba matma gariko jogar ka`e on`na nanggen. Aganbo, ku`rachakengama ?

Dejangpa : Ku`rachakjaode na`a angni song-jinmako aro angni jatko mangki-maatgen gopram pil`atgen. Uni gimin anga ku`rachakenga, matgrik. Indiba mingsa kattani gimin anga nang`o mol`molna skengachim; ua kattaara, anga angni manderangko ia Manas

rikamoniko Songdu nalsachi
rimangna am`engaha. Songdu
chibimako batsotangna gita angna
maiba cholko dake on`ode anga
chasong gimik nang`ko mittel-
begenchim.

Nokma

Chigatpa : Indide knabo, gnigipa kattani gimin
nang`na on`tisa tale aganna
nanggen ine anga chanchienga.
Angni sipairang bang`batan chadam-
be aro panterang ong`a. Uamang
an`tangtangni nok-jamrangko aro
jikko-deko wate jasnimang angming
re`rikpae dakgrike ra`seke roenga.
Uamangni cha`a ringanirangko
angan on`enga. Indiba cha`a ringana
agreba mandeni dingtangmancha
be`enni okkriani donga. Ua
okkrianiko komse kom walsamang-
mangnade na`simangan okkaatna
namatna man`na nanggen. On`ti
min`ti angni kattani ortoko ma`sina
man`ama man`kuja?

Dejangpa : (Jripjrip bamgoke dongaia).

Nokma

Chigatpa : Knal salgimik angni sipairang
na`simangni jam nokoniko skatang
gamjinrangko chimonge matchu aro
matma garirango gatgen. Uni ja`man,
nang`ni songjinmaniko sak ritchagit-
tammang cholina gita dakgipa
me`chikrangko angni tambuona

watatna nanggen – bi`sa ba`gijagipa
 banji, randi aro segnang ong`oba
 ong`aigen. Indiba nibo, uamang
 silsilna nanggen aro buchuma ba
 bi`sa ong`na man`jawa. Bils
 chi`chetoni bils kolatchichet. Na`a
 angna silsila me`chik ritcha gittamko
 on`bo, nang`na anga Songduko
 batsotang a man`na gita te`rik pang
 ritthagittamko on`gen. Ma`siahakon-
 ba?

(Dejangpa jrip dongaia – ia changoba
 ua aganchakna man`ja).

Nokma

Chigatpa : Na`a jajrengnabe, uamangko chinga
 ching baksa rimangpa`jawa. Sakanti
 silsila me`chik walsana sakbri
 sakbonga sipairangko kusi ong`ate
 pringon noktangchi re`angpilna
 man`aigen. Walsamangmangnasan!
 Bas! (Jenjulko rim`e dongenggipa
 sipaiko miksonge) Sipai! Dejangpani
 jakni-ja`ani jenjulrangko okatbo
 engatbo. (Dejangpako kaarangko
 enga) Da`ode na`a jajrenggija
 nang`ni songjinmatangchi re`ange
 nang`ni manderang baksa grong-
 grikebo ku`mongebo. Re`angbo.
 (Dejangpa skoko denggoke re`angna
 ine ja`ku de`angon, do`gachol
 sambaona sokon, ki`sangchipakni) O,
 knaangboching. Mingsa kattako
 aganna gualengachim. Da`al walna

angni tambuona saksa sila
me`chikko watatbo. Waljatchio. Gisik
ra`bo, ua me`chik angko kusi
ong`atna man`jaode knal pringon
anga dingtang dabaniko dabiaigen.
Angming bang`e chalakki dake
mesoknabe. Knajokkonba?

(Dejangpa kratcha`a amchakjae
denggoke ong`katanga)

Nina, uamang angni kattako
maniaman manija, manijaode bnek-
pile tingangsranggen. Ha....! Ha....!
Ha....! Angan Manas aro Songdu
chibimani chigatrangko nirokgipa
"Nokma Chigatpa" ong`a. Angan
Nokma Chigatpa. Angni ku`watako
man`gijaarangba chi ko`na, auna-
miksuna, na`tok-na`batnaba chiona
ong`katna man`jawa. Ha....! Ha....!
Ha....! Nina, da`al walo uamang
maiko chanchibaa.

(Ong`katanga)

MESOKANI IV

**Manas chibimani rikam, A`chik song
(Dejangpa aro uni retrang uko ja`rike
napbaa)**

Dejangpa Rasong kopalni ka`saninggija
saknaaniko on`achi mande jensalo
onbatgipa kratcha`gnikoba ku`racha-
ke ra`chakna draatako man`a, unon
ua gringo chipchanga man`gipa
singho gita saknaako man`e
mamingko chanchina changgijagipa
gita ong`a.

Rikampa Jeba ong`na nangode ong`aigen, sina
nangode siaigen, indiba indake one
dabianiko, jatko chonnikaniko aro
kratcha`gni kamna ku`rachakbana
nangjachim. (Rikampani kattako
knaman`e retrang Dejangpako
ong`arek ong`jarek kattarangchi
saitoka)

Dejangpa Na`simang angko jegitaba inbo,
indiba angni kattako ka`sapae

knachengpabo. Anga ua somoio gisiko indake chanchie ra'achim, je Nokma Chigatpani dabanirang jegitaba ka'saninggijani aro kratcha'gnini ong'china -- ku'rachakjaode an'chingni songjinma gopram gita chacha ong'genchim. Nokantinikon ra'sekdragenchim. Sakanti me'chikan draako man'genchim aro me'asarangko so'ote galtokanggenchim. Na'simang chanchienga, anga indinari angni songjinmana aro angni jatna namgija kragijako ku'rachakbaaha. Chong'motan, anga gualaniko dakbanaba donga. Mande gualaniko dakronga. Angaba be'en an'chini mandesan ong'ani gimin gualako daknaba donga ba gualakon dakmanaha. Uni gimin anga da'o, na'simangni kusina Nokma ong'niko watengaha. Na'simang na'simang - ni namnikgipa matgrikko Nokma songna man'a. Nokma songaniko man'a ja'man ua Nokma gital, gital dake ua ka'saninggijagipa matburing baksa pilakni namnika gita songgigrikna man'a.

Darongpa : (Ka'onangprete) Indita ruutani ja'man, gital dake maiba chanchianiko jako ra'gitikade an'tangni jara-burbok ong'anikosa parakenga. Nokma Songanio maming saloba A'chik Jatni Itihaso walsani gisepo

songa dongkuja. Ia kamko na`an a`bachengahani gimin, na`an bon`atbo. Ia songjinmani ritcha-gittam silsila me`chikrangko na`an mesoke on`bo.

Dejangpa : Maina? A`chik jato jat chigni chanani donga. Na`simang angni kattako ra`chakode, indide an`tangtangni jatoniko me`chik sak 25 dake tik ka`babo – jemangan an`tangtangni me`chik ong`e dongani cholonko jatni namgnina on`kanggen.

Jachingpa : Na`a chingni Nokma, jatko dilgipa ong`a. Nang`ni kattako chinga manie ra`aha. Indiba jatprakan me`chik sak 25 prak dake knalsa am`e rimbagen – da`al walni gimin ua matburingni tambuona badia rasong gnannggipa me`chik re`anggen – uni gimin na`an aganchengbo.

Dimbri : (Tom`ram nokningoni do`gacholo neuate) Mande ra`na krabegipa Nokma, angko tik ka`e donaha. Na`simang mamingna jajrengnabe.

(Pilakni mikronan do`gachol sambao chadenge donggipa, Nokmani saksa kamkam bilsa chi`chetgipa demechik-chipakkosa aiao inmane niattoka, uanchim chasongni silbegipa bimangni Dimbri).

Dejangpa : Na`a basako re`baaha? Sawa? Sawa? Sawa ua an`tangko on`kangenggipa matgrik me`chikara?

Dimbri : Anga baba, anga Dimbri, nang demechik, anga angni A`chik Jatna an`tangko on`kangenga; maina, on`kangani nokonian ong`bachengna nanga. An`tang on`kangchengesa gipinna on`kangani gimin skibo.

(Pilakan aiao inmane ua silbegipa aro Jatna an`tangko on`kangenggipa Nokman` demechik, Dimbri matgrik-ko nitate donga)

Me`gam

Nongal : (Rang`san grape Dimbrini sambachi re`ange) Na`a maiko ku`watjok, Dimbri? Nang`ko anga indake nosto ong`na on`jawa. Na`a nang`ni ku`watako ra`pilbo; nang`ko anga watna man`jawa (Grapa).

Dimbri : Ama, na`a angni gimin mamingkoba chanchinabe. Nokma ong`ani gimin Jatna babani badita daito donga, uni demechikniba ugitan apsan. Baba jeko chu`sokatna man`jawa uko anga, uni demechikgipa, chu`sokat-gen. Darangba on`kanggipa dong-jaode dolsa jat jakgitel ong`na amja. Anga angni jatna ka`saa – uni gimin angni jatni namgnina anga an`tangkon on`kanggen. Angni ka`sabegipa A`chik Jat tangbangangchina! Angko darangba champengnabe.

Pilak : (Pilak retrangan jripjrip nawang chae Dimbrichiko nitate donga)

Nomil

Saksa : (Dimbrini an`tangko Jatna on`kanganina katchae inchroa, changgittam) Dimbri Matgrik Tangbangchina!

Jinma : Dimbri Matgrik Tangbangchina! (Changgittam)

Jachingpa : (Jinmako miksonge) An`ching da`o nikna man`aha, Nokman` demechik Dimbri, jatna ka`saae an`tangkon on`kangengaha. Uni jatni namgnina indake on`kangani gimin chasong chasongnan A`chik Jatni ma`ambio sonani oikorchi uni biming see dongangchina. Ua A`chik Jatni ka`tong salgini ching`batgipa aski ong`e chasong chasongna teng`e dongangchina. Dimbri Matgrik Tangbangchina.

Jinma : Dimbri Matgrik Tangbangchina!

Rikampa : Da`al walnade man`aha, indiba knalna sak ritchagittamkode da`si Nokmani agana gitan jat chi`gnioni jatprakan sak kolgrikbonga dake me`chikrangko tik ka`e ra`bapabo. Mitamrang da`alni gisepon, Nokma Chigatpani ku`wata gita te`rik pang ritchagittamko den`bae chap tarisona krimkro ong`bo.

(Mitamrang te`rik pang ritchagittamko den`na aro mitamrang me`chik ritcha gittamko sandina ong`kat-angtoka)

MESOKANIV

**Waltingaha: Nokma Chigatpani tambu
(Nokma Chigatpa napbae, palango tusie
donga)**

Nokma

Chigatpa : (Ka`onangbee) Tol`krok Dejangpa,
uni ku`watanggipa kattako ua
gualaha. Da`al angming turam
am`pakpana me`chik watatjaha. Uko
anga knalan –

Do`ga

Nitimgipa : (Nokma Chigatpani tambuni
do`gacholo neuate) Nokma, Manas
rikamoni sakgni re`baa; uamang
nang`ko grongna am`enga.

Nokma

Chigatpa : Indita waltingo? Ua sakgni mande-
rangko aganatbo, knal pringo grong-
china.

Do`ga

Nitimgipa : Me`asa ong`ja, Nokma. Me`chik
sakgnisa!

Nokma

Chigatpa : (Tusiaoni chakate palango asonge)
Sakgni me`chik? Maina? Ong`china.
Uamangko name check ka`ahakon-
ba? Maming ostrorangkoba ra`bit-
jakonba?

Do`ga

Nitimgipa : Ra`baa dongja, Nokma.

Nokma

Chigatpa : De indide. Uamangko tambu
ning`ona re`bachina agane na`a
re`angbo.

(Tambuni pordako oe sakgni
me`chikrang napbaa. Saksa
buchuma, sko pingrua; sakgipin
bimangko ba`rachi pingrua: Dimbri
aro Mrik)

Na`simang maiko am`engachim?

Mrik : Na`a nang`ko walo sanna gita saksa
watatchina aganatachim, uni gimin
re`baa. -

Nokma

Chigatpa : Sakgni maina?

Mrik : Nokma! Ian chingni Matgrik Nokma
Dejangpani jikgipa Me`gam Nongalni
oko atchigipa saksa kamkam
demechik Dimbri ong`a. Ua pangnan
nokningo dongaigipa ong`a. Saksan
maming saloba a`palchi ong`kat-
rongja. Anga uamangni nokdangni
nokkol me`chik ong`a. Uko anga
nang`ona rimbaaha.

Nokma

Chigatpa : De indide; mittelbea. Na`a re`ange bangki walko ua sambao donggipa tambuo tusie dongbo. Pringo re`bae ia me`chikko uni nokchi rimangbo. De re`angbo.

(Mrik sambao donggipa tambuona ong`katanga)

Dimbri : (Ba`ra pingruako kinggilake Nokma Chigatpani sambachi re`ange) Ge`etbo Nokma, anga nang`na maiko dakna nanga?

Nokma

Chigatpa : (Dimbrini silako nike aiao inmane an`tangna agana) Bah! Chong`mot jajongan da`al angni tambuona napbaaha. (Parake, Dimbrini be`en bimangko rim`roke) Anga nang`ni chadambe bimangni silako ringna sikbeengaha. Na`a indita silbegen ine anga jumangomangba chanchijachim, O! Angni jabitchim ka`tongni jarambong, na`a angni ka`tongko teng`suatbo.

Dimbri : Ong`aigen Nokma, anga nang`onan re`baaha, nang`nian ong`aha. Indiba Nokma, pilak kamko ka`na skangba Nokma Dejangpani manderang nang`ko mande ra`e ia chu bitchiko nang`na on`ataha. Hai an`ching ia chu bitchiko ringchengna. (Chu bitchiko Dimbri glasso rue an`tang ringe mesokchengaha; uni ja`man Nokma Chigatpanaba rue on`aha

aro uni sambao asongaha) Ha
Nokma, ringe nibo.

Nokma

Chigatpa : (Ra`chake ringe) Aiao! Bilongen
ringtoa, nama. Da`oba ruatbo.
(Dimbri wa`singni chuko da`oba
Chigatpani glasso ruata) Na`songni
chu bilongen nambea tobea. Indake
nama chuko anga chasongoba
ringmankuja.

Dimbri : Ama dipet ringbo, Nokma, nang`na
chu`ongna gitan ra`bara. Na`a
jajrenggija ringaibo.

Nokma

Chigatpa : (Pekengani ku`rangchi) Na`a angna
jaktangchi kanatbo, ka`sara.

Dimbri : (Dimbri Nokma Chigatpana chu
kanata) Ha, Nokma, indide anga
nang`na kanatna.

Nokma

Chigatpa : Glasso chu, sambao silbea me`chik
aro saoba sambao knatoriri git
ring`ode, ia a`gilsako me`asa saksana
Maiko nanga? Ha....! Ha....! Ha....!
Maiko nanga, ka`sara aganboching?
(Dimbriko gipakna jotton ka`a, indiba
Dimbri sambao ni jite kata).

Dimbri : (Dimbri ma`sina man`engaha, Nokma
Chigatpa bilongen pekaha; ua sronge
chadengnan man`jaenga) Nokma, hai
na`a tusiboha –

(Nokma Chigatpako palangona
rimanga)

Nokma

Chigatpa : Bao chu? Chu bon`jokma?

Dimbri : Dongkuenga, Nokma. (Chu rue on`a aro bik dake sambao dongenggipa Mrikko rime katea aro sakgni ku`monge Nokma Chigatpako uni tonualko saloke uni gitokko den`sota aro chrike inchroe) Amjok! Nokma Chigatpako amjok! Nokma Chigatpako amjok! Amjok

(Nokma Chigatpani skoko jakasichi ra`e, jakrachi tonualko songdoe, Dimbri chibima rikamo te`rik pangko chap kagipaona inchrojoljole katangengachim. Indiba bobilrangni chri bra watgipa Dimbriko nangeaha aro uanon ua, gitilgope ga`ake aro gojrone A`chik Jatna ma`ringe siangaha. Indiba Mrikde sriksrik te`rik chap kagipaona sokangaha. Unon A`chik matgrikrang mil`am seppi ra`bildange Nokma Chigatpani sipairangko chadrapaha, den`aha. Nokma Chigatpako den`aha ine ma`sina man`e, uni sipairang kene kattokaiaha aro mitamrangde A`chik matgrikrangni jako siaha. Uni ja`man, wal seng`na skangan A`chikrang te`rikko chap kagipao gakattoke Tsongdu Chibimani ka`tongo balboangaha, uni pil`sao tom`tomani biapko am`ange.)

AGANCHOTANI

:

Ian baditaba chasong skangni katta ong`a. Do`orang, matburingrang uno mandeni ku`sikchi katta agangrikjachim, maina, ia chanchichipe golpo banaie aganaigipa katta ong`ja. Dimbri aro Nokma Chigatpa, ia A`chik Jatni ma`ambi aganritingbaanio mingsa “historical” katta chong`mot ong`a – saksara A`chik Me`chik aro sakgipinara Rori Me`asa ong`a. A`chikrangni ka`tongo uamangni kattarang mohor su`a gita dake da`oba dongenga. Sal, jaa aro bilsiko parake uamangko mesokna man`jaoba, uamang dongchongmotachim ine jajagijaan aganna man`gen. Chinani “Great Wall” -ko haida ua somoio a`bachengan dongkuja, indiba A`chik Jat ua somoion North-East jolo sokbaaha, songdonga`chana nama biapko sandie-am`e iachi uachi re`jojoaha.

Mande jatni a`gilsako skia man`banio A`chik Jatni maming on`gilani dongjaoba, dakgrikani bida, gama ge`anio, aski tanorirangni bidingo chanchianioba chu`ongani dongjaoba,

toromo aro 'Tantraism'-ni bidingode A`chikrangni on`gilaniko jechakna man`jawa. Iamangchikon mandeni itihaso North-East jolo 'Tantraism' toromko man`rika ine aganna man`gen. Da`ode 'Tantraism' Hindurangni toromoba ge`sa bak ong`aha. Tantraismni mongsonggipa biapde 'KĀMAKHYA' ong`a

A`chikrangni chengo songdonga`cha-bagipa biapara Tsangpoh Chibimani Salgro-Salgipengjolrangan ong`achim ine u`igiparang agana. Ia Tsangpoh Chibimani rikamo songdonga`chabaani giminan iamangko "Tsangma" ine mingbaachim ine chanchichipe aganna man`a. Iamang chong`motde Tsangpoh Chibimani paktangtango songdonga`chagiparang `Tsangma` ba `A`chikrangan` ong`a. Tsangma ine iano jatkosa miksonga. Tsangmarangni gisepe "Ma`rak"-gipa ba 'rakgipa'-kosa 'Ma`rak ba Marak' ine mingbaakon ine chanchiman`a. Baditaba chasong uamang iachi uachi tom`tom pangkamgipa songdongram biapko am`e re`jojoe brange roachim.

Songdongram A`song: Bon`kamao uamang Tsongdu Rikamni Salgipengchipak Garhurachal ba Garhur Paharo dongkamna ku`mikchetaha. Ia a`songni bimbingan da`o A`chik Jatni songdongenggipa "Garo Hills" ong`a. A`bri- buringrara daka aro uni

ja`rekrangara a`sal gnanggipa biap ong`a. Ia biapni ro`ara haida 200 km aro gipengara 150 km mang ong`naba donga. Janggi tangna neng`skime mitamrang Tripura, Bangladesh, West Bengal, Assam aro Nagalandrangonaba biap am`angaha gipangaha.

Noro Mande Dema Risi A`chikrangni ka`tongo mingsa ba ge`sa gualna man`gijagipa biming ong`a. Indiba ia Noro Mande Dema Risini gimin A`chikrangni ma`ambi aganania tale aganani dongjaoba, darangan ia Noro Mande Dema Risini bimingko ma`sitoka u`itoka. Indiba, ia Noro Mande Dema Risiara sawa manchachim, uni gimin name tale agananiko maming history ki`taprangoba nikna man`rongja.

Mitam ki`tap segiparang, Noro Mande Dema Risiko A`chik Jatni Pagitcham ba 'Progenitor' ine mesokaha. Noro Mande Dema Risi A`chik Jatni Pagitcham ong`bebeoba, baditaba chasong iachi uachi re`jojoe brange so`sojengjeng ong`e janggi tangbana nangani gimin, uni bimingko gisik ra`kuengoba uan A`chik Jatni Pagitcham ong`achim ine ukode gisik ra`sokatjaha.

Aryanrangni Toromni ki`tap Mahabharata-o (Bana Parva), Pandavarangni buringo dongnue dongna nangani somoio, sakgni Risirangni bimingko mesokaniko nikna man`a

- uamangni bimingara Lemosh aro Dhaumya ong`a. Mahabharata-o Dhaumya Risiko Pandavarangni Kamal ine agananiba donga. Dhaumya Risian Pandavarangko Kamakhya-ona re`dilbaachim ineba Mahabharata-o aganani donga. A`chik Jatni aganritingbaanio Noro Mande Dema Risi ine ma`sibagipa risiara ia Pandavarangni Kamal Dhaumyaan ong`na nanga. Pandavarangni Kamal Dhaumya Risian A`chik Jatni Pagitcham ong`ode A`chikrang Pandavarang baksa maiba dake bakdil nangachim ba melia nangrimani dongachim gita daknikman`a. Mahabharatani Dhaumya Risian A`chikrangni Noro Mande Dema Risi ine ma`sibagipa 'Risi' ong`chongmotna nanga. Dhaumya risikon A`chikrang Dema risi ine mingbaaha ine bebera`anio aro agananio maming gualani ong`jawa.

A`chikrang songdonga`chana ine nama biapko am`e re`jojoe brangroroe iachi uachi katbrange biap namako am`roroe dongmitingon, dintang dintang a`songni rajarang baksa chagrongarangko an`ching A`chikrangni ma`ambi aganritingbaaoniko knana aro u`ie ra`na man`a. Indake chagrongarangni gisepo Rori Sadepa Nokma Chigatpa baksa gronggrikanian A`chikrangna gualna man`gijagipa chagrongani ong`aha. Nokma Chigatpa saksa ka`saninggijagipa, an`chi ringsolrakgipa mandeskalchim.

Indiba ia Nokma Chigatpaara sawa manchachim, uko maming history-rangoba mesokaniko nikna man`ja. Indiba ia Nokma Chigatpaan A`chikrangni ma`ambi aganriting-baanio saksa gualna aro gelna man`gijagipa mande ong`a. Uko gale A`chikrangni ma`ambi aganani maming gitaba chu`sokgipa ong`na man`ja. A`chikrang Jino-Tibeto a`songgita jokbagipa chibima dilgnini rikamrangosa songdonga`chabagiparang ong`achim ine ma`ambi u`igiparangni agananiko nikna man`a. Ua chibima dilgnini bimingrangara Tsangpo aro Huwangho ong`a. Historyo 'Huwangho' chibimakode "China's Sorrow" ine minga. Maiba u`isokgijagipa a`selni gimin ua biaponi katbana nangan, A`chik pagitchamrang dingtang dingtang chasongo aro dingtang dingtang biap gitasa re`badilbaachim ine pagitchamrangni ma`ambi aganbaaoniko ma`sina man`a. Indaken pagitchamrang dingtang dingtang dilgiparangni bimingrangko minga. Salaram aro Salgipengchipak Tsongdu chibimako batsotna dakenggipa A`chik pagitchamrang Rori Sadepa Nokma Chigatpa baksa gronggrikaha. A`chikrang ia Nokma Chigatpa baksa haida maibani a`selo melina nangrimna man`jachim, ong`jaoba, A`chikrangni ka`donga aro bilak-wa`saako nike, mikkangchina kenchake, maibarango pa`sike, A`chikrangni bilgrimitingo, A`chikrangko ua biaponiko rikgalna budi

dakaha. Ua budi dakanio A`chik Nomil Dimbri, gipin jatni mikbokani sikar ong`aha. Dimbriko on`kangbaen A`chik pagitcham ma`gitcham-rang, ua ka`namgijagipa aro ka`saninggijagipa Rori Sadepa Nokma Chigatpani jakoni jokbaaha. Jatangko chonnikarangko nike Dimbriba chakchikna man`jae, mandeni bimango matburing gisikni ua mandeko, budi dakskae, ka`samike, chu pekate so`otaha. Bebera`tojaoba indaken ong`chongmotachim ine bebera`na nangao ga`aka. Indake maiba a`selrang ong`jaode, A`chikrang Tsongduko chobatbaani ja`manba ua nalsani rajarang A`chikrangko maina bobil dingbaachim ine darang chanchirakgipa A`chikrangni gisiko sing`a nakataigen. Nalsaona bobil dake dingbagiparangni gisepo Rori Sadepa Nokma Chigatpani bimingkode mingtaiako knana man`ja. Iani orto, Nokma Chigatpako Dimbri so`otaha ine u`ina man`ani ja`mansa ua nalsani rajarang A`chikrangko (Dimbrini ma`kringko) mangkimaatna ine ka`kim chae Tsongdu nalsaonaba bobil dingbaachim. Rori Sadepa Nokma Chigatpa sijaode uaba Tsongdu nalsaona A`chikrangko bobil dingbapagenchim. Indiba ua bobilrang A`chikrangko mangkim-aatna man`angjaha, bikpile uamangsa A`chikrangna kene katangaiaha.

Indiba dukni katta ian, A`chik Jatni salgisakni ching`begipa aski rongsa, bobilrangni

chri – bra watanio joksekjaha; uko baditaba chrirang uni chelo, janggilo nangeaha aro unon ua gitilgopaha, A`chik Jatna ma`ringe Manas rikamon ua ga`akgropaha. Dimbri Matgrik Tsongdu nalsachian sibaaha. Dimbriko ka`tongo gisik ra`esan A`chik Jat Tsongduko batsotna te`rik chap kagipao gatokaha. Me`gam Nongalde demechikna grapean sibokpilachim.

Tsongduko chobatna A`chikrang salsni walsni nangaha. Nokma Chigatpako so`otaha ne knae Koch Biharni raja bilongen aiao inmanaha aro rang`san Dhobani raja baksa ku`monge A`chikrangko bobil dingna Tsongdu nalsaonaba rikba-chabataiaha. Uamangko niksoe A`chik matgrikrang rang`san mi cha`ako dongale, mil`am sepi ra`bildange – me`a-me`chik nangrime bobilko warachaksona krimkro ku`cholsan ong`soaha. Dongdipgija salgittam walgittam chri bra watosi, mil`am sepi ra`bildange chingsoosa Raja Bihari aro Dhobani raja A`chik matgrikrangni ka`dongako nike, amchakjana kenchake katangpil`aiaha.

Neng`take ia biapo misal cha`mitingo bobilrang baksa dakgrikna nangani gimin ia dakgrikram biapkon “Misal Cha`ram” ine mingaha.

Misal Cha`ramoni bang`gija chel`aona jitange A`chikrang “A`song Neng`abat Chiga Neng`chibat” minggipa biapo dongeaha. Raja

Bihari aro Bijnini raja bolgni nangrime, adita sipairangko rimbitbae ia biaponaba A`chik-rangko bobil dingna rikbataiaha. A`chik matgrikrangni gisepo Chusinpa, Chuganpa, Olbin Kongdep, Baucheng Basuchengmang janggi jama galpile bobilko warachaksoaha aro ia dakgrikanio me`asarang baksa me`chik-rangba rimol sa`am pangpiké, sok kanako dongale, mil`am sepi chakpile bilongen dakgrikpaaha. Dolgninian bilongen an`chi pari ong`aha aro bang`en manderang siaha. Uni ja`man, Dimbrina ma`ringe aro dakgrikao sigipa matgrikrangna skime; adita salrangna chu cheke, wanti toke, ringe-cha`e salsni walsni ua biapo kalimkuaha. Ia dakgrikanio A`chik-rangan bobilrangko amchepataha aro ia biapkon "Garó Mari Topla Khawa"-ine da`oba mangkuenga.

Uni ja`man uamang salaramchi Tsongdu rikam joljol re`ange Ildek chisam Dolgomao, jekon A`chikrang "Dol jikjek jikjek, Gong mejek mejek, Roetara" ine mingachim, ua biapo re`ange dongeaha. Uanoniba mitamrang kosakchi doangkuaha aro bon`kamao Gua-a`te (Da`oni Guwahati) jolo, Saljongpatra, Rongdo`gachol, jeo Gaantini Ringringram Chiga Chironggini jinjinram a`song Kamagiriona sokeaha. Uni ja`mano, mitamrang Bokoni salgipeng jolo donggipa a`bri, Matcha Melaramo

dongeaha. Ia biapoba uamang tom`tom dongna man`jani gimin, saliramchipak mikkange an`tangtangni re`bagimin ja`kolko re`angtaiaha. Adita A`chik dilgiparang Rong`mikseram Tangka Dakram aro Me`tongbol A`brio songdongeaha. Mitam A`chikrang Sambol Me`dikku, Amak Bonda Turamo, A`song Dul Dokramo re`ange dongeaha. Indaken A`chikrang priprae dingtang dingtang biaprangona aro da`o A`chikrangni songdonga`chaenggipani ning`tugipa biaprangonaba gipangaha jelangaha. Dimbrini ma`gipa Me`gam Nongal aro uni ma`kringrang haida da`oni Nongal jolona re`bae songdonga`chaachim aro maiba mingsa obosta (incident) ong`aonisa, ua biapko Me`gam Nongalni bimingchi 'Nongal Bibra' ine mingbaakon ine chanchiman`a. Ong`jaode, ia 'Nongal' katta indinari maming ja`ting rikge gri chong`bana man`aijawa.

North-East jolo songdonga`chagipa Tribalrangni gisepo A`chikrangni gnigipa jelbatgiparang ong`gen ine angni ripeng saksa angna aganachim. Uni kattako anga bang`a bebera`na man`jachim. Indiba jensalo an`tangan a`songni iachi uachi re`na nangao ga`akaha aro gipin gipin a`songrangoba (State) A`chik songrang donga ine nikbaaha, unonisa anga angni jatangni jelako u`ina aro bebera`na

man`aha. Chong`motan A`chik jat jelbegipa
jat ma`sa ong`chongmota, indiba indake jelgipa
jatni maming ma`ambi ripingani dongja.
Aganritingbagipa ma`ambirangniba maming
ja`ting rikge donggija gita daknikman`aia.
Assam, Tripura, Nagaland, West Bengal,
Arunachal Pradesh aro Bangladeshoba
A`chikrang donga ine ma`sina man`on,
jatangna ka`pakman`ata aro ua pilak
A`chikrangko apsan biapo songdongate,
a`gilsakni manderangna A`chikrangba jelgipa
aro bilakgipa jat ma`sa ine parakna
man`genchim ine chanchiman`a. Indake
jelbegipa jatniara ma`ambi dongama?
Dongchongmota. Indiba indake sing`anina
aganchakaniko gipinchiko man`na ka`donggija,
an`ching an`tangtanganikon man`a ama, indiba
sakanti A`chikan on`tisa 'Home work' ka`na
nangangkugen. Jatangna, A`doktangna aro
Ku`siktangna ka`saani, on`kangani sakanti
A`chikni ka`tong ning`oni an`tangtang nabana
nanggen. Unosa, Somoi Nawangni Okningo
A`chikrangni gimaae dongenggipa ma`ambiko,
jatni rasong mikkimko, bilak-wa`saaniko,
changa sapaniko, pilakkon janerao nika gita
jrojrang nikna aro A`chik Jatni chu`gimik
Ma`ambiko bikote a`gilsakni manderangna
rasong gnange mesokna man`gen ine anga
ka`donga. Indiba A`chikrang bimchipangna aro

Jatangni ma`ambiko ka`tongoni u`ina
ka`oksiparang ong`na nanggen.

--Bon`aha--

Dear Mr. Sangma,

Going through the two Plays has been a wonderful and enriching experience for me. The plots are wonderful and the concept is extraordinary. I applaud the fertile imagination you have manifested in your writing.

The dialogue construction with rich vocabulary is terrific. Comparisons and use of Figures of Speech are enlightening, but on the heavy side. Too much use of comparisons sometimes takes a toll on the reader's patience. Otherwise, dialogues are lucid and catchy.

Please take care during proof reading. Too many mistakes can mar the reader's enjoyment.

Wish you all the very Best



Sd-

13/7/08

(Abi Re`nangma)

B. K. Sangma